

Kibaru Kətət ka Yesu nkε Matiye enacicəs mǝ Matiye

Kəsǝkəs ka Kibaru Kətət ka Yesu nkε Matiye encicəs mǝ

Səbuk səcempi man̄kələ səloku moloku mmε an̄we «Kibaru Kətət ka teta Yesu Krist mǝ». Kəmar ka Amera nəcempi ɲa Kanu, acəpsε a Yesu darəɲ man̄kələ ɲacicəs taruku ta Yesu. ɲa ɲayǝnε: Matiye, Mark, Luk kǝ Isan̄. Mba Matiye kǝ Isan̄ ɲanayi asom a Yesu an̄e wǝcǝ kǝ mērəɲ dacǝ.

Ntε kǝpε ka Yesu dəkǝm kəncəpər mǝ, kǝ Matiye encicəs buk bambε pǝcloku mecepərənε fǝp ma Yesu antǝf ɲan̄ε kəron̄, ntε tǝɲsǝɲε afum a doru ɲaccərə a Yesu ɔyǝnε Krist, wǝyek-yek nwε Kanu kənasom kǝder teta kǝyac afum doru dandε mǝ. CəKərək cǝ Matiye enacicəs buk bambε, mba sǝna sǝɲkafəli bi cǝBaka ntε tǝɲsǝɲε aBaka sǝ ɲacərə mes mamǝkǝ mǝ.

Buk bambε boloku mes mǝwɛy-wɛy mɛlarəm mmε Yesu enayǝ doru dandε, ntε tǝɲsǝɲε afum ɲacərə fǝnǝntər nfε Kanu kənasəɲ kǝ mǝ. Yesu enataməs acuy, pǝcbeləs yǝɲk yɛlɛc. Matiye enafan̄ sǝ a afum ɲacərə mɛtǝksε ma Yesu. Ntε Yesu enctǝksε afum mǝ, ɲanacərə a moloku ma Kanu m'oncloku, pǝcloku kance kəsoku pɛs. Tɛlpəs on̄, defi kǝ kǝfǝtε ka Yesu afi dacǝ kǝ kǝpε kǝn kǝ buk bambε boloku su.

Mame fǝp mɛɲmar su kəcərə fum nwε Yesu ɔyǝnε mǝ. Kəcərə ka buk bambε kəɲmar su kəcəpərənε

doru kəcərə kəkətənə mes disrə, bəmar su sə
kəlompəs ka kiya wəyəŋ ka doru o doru, k'afi-ε.
Kanu kəsəŋ su kəcərə ka moloku ma buk bambə!
Amina!

Tokotərənə ta Taruku ta Kibaru kətət ka Matiye:

1. Sora 1-4: Matiye oncop Kibaru Kətət kən
kəloṃ kəkom ka Yesu Krist kə tocop tən yəbəc
nyə Kanu kəsom kə mə.
2. Sora 5-25: Ta mərəŋ, Matiye ementər yəbəc ya
Yesu kə mətəkse mən mələrəm.
3. Sora 26-28: Təlpəs, Matiye ɔloṃ ntə Yesu
əmbəcə Kanu defi dən disrə kə kəfətə kən afi
dacə mə.

Atem a Yesu

Luk 3.23-38

¹ Kəbənda ka dokom da Yesu Krist kə kaŋkə,
wansə ka Dawuda, wansə ka Abraham:

² Abraham ənəkom Siyaka, kə Siyaka oŋkom
Yakuba, kə Yakuba oŋkom Yuda kə awənc əŋ,

³ Yuda okom Perəc kə Serah. Tamar əyənə ŋa
kərə. Kə Farəs oŋkom Hecərəŋ, kə Hecərəŋ oŋkom
Aram.

⁴ Kə Aram oŋkom Aminadab, kə Aminadab
oŋkom Nasəŋ kə Nasəŋ oŋkom Salməŋ.

⁵ Salməŋ kə wəran kən Rahab ŋəŋkom Bəs, Bəs
kə wəran kən Rut ŋəŋkom Yobed. Kə Yobed oŋkom
Yisay,

⁶ kə Yisay oŋkom Dawuda wəbə wəka Yisrayel.

Dawuda ənənasər wəran ka Uri, kə ŋəŋkom Sule-
mani.

⁷ Kə Sulemani oŋkom Roboyam, kə Roboyam
oŋkom Abiya, kə Abiya oŋkom Asaf.

⁸ Kɔ Asaf ɔŋkom Yosafat, kɔ Yosafat ɔŋkom Yoram kɔ Yoram ɔŋkom Osiyas.

⁹ Kɔ Osiyas ɔŋkom Yotam, kɔ Yotam ɔŋkom Akas, kɔ Akas ɔŋkom Esekiyas.

¹⁰ Kɔ Esekiyas ɔŋkom Manase kɔ Manase ɔŋkom Aməs kɔ Aməs ɔŋkom Yosiya.

¹¹ Yosiya ɔŋkom Yekoniya kɔ awɛnc aŋa tɛm ntɛ anasumpɛr aka Yisrayel pakekɛrɛ ŋa Babilɔŋ mɔ.

¹² Ntɛ tata kɔ tencepɛr mɔ, kɔ Yekoniya ɔŋkom Salatiyel kɔ Salatiyel ɔŋkom Sorobabel.

¹³ Kɔ Sorobabel ɔŋkom Abiyud kɔ Abiyud ɔŋkom Eliyakim, kɔ Eliyakim ɔŋkom Asor.

¹⁴ Kɔ Asor ɔŋkom Sadok kɔ Sadok ɔŋkom Akim kɔ Akim ɔŋkom Eliyud.

¹⁵ Kɔ Eliyud ɔŋkom Elasar kɔ Elasar ɔŋkom Matan kɔ Matan ɔŋkom Yakuba.

¹⁶ Kɔ Yakuba ɔŋkom Isifu wos ka Mari wɛkɔ ɔŋkom Yesu nwe aŋwe Krist, wɛbɛ nwe Kanu kɛyɛk-yɛk mɔ.

¹⁷ Awa, dɛtɛmp wɛco kɔ maŋkɛlɛ dɛnacepɛr kɛyɛfɛ Abraham haŋ kɛbɛp Dawuda, dɛtɛmp wɛco kɔ maŋkɛlɛ kɛyɛfɛ Dawuda haŋ kɛbɛp kɛkɛkɛrɛ ka aYisrayel Babilɔŋ, dɛtɛmp wɛco kɔ maŋkɛlɛ kɛyɛfɛ kɛkɛkɛrɛ kɛŋan Babilɔŋ haŋ kɛbɛp Krist.

Kɛkom ka Yesu Krist

¹⁸ Tokom ntɛ t'anakom Yesu Krist: Wɛrkun nwe ancwe Isifu mɔ, ɛncfac iya ka Yesu nwe ancwe Mari mɔ. Ta Isifu ɛntagbaŋnɛ Mari-ɛ, kɔ Mari ɛnɛŋkɛnɛ pɛbɛkɛ fɛnɔntɛr fa Amera Nɛcempi.

¹⁹ Isifu wos ka Mari nwe ɛnalomp, ta ɛfaŋ kɛcɛŋ kɔ gbasŋa mɔ, ɛncɛm-cɛmnɛ kɛlukɛ Mari nda afum ɔn kɛgbɔpnɛ disrɛ.

²⁰ Isifu eyi ti kəcem-cəmne, gbəncana babəkə kə mələkə ma Mariki mowurər kə dəmere, kə moloku kə: «Isifu wan ka Dawuda, ta mənese kələk Mari mənence kə, bawo wan nwe embəkəs mə, bafə dəfum eyefe, mba dəAmera Nəcempi.

²¹ Wəran kam Mari endekom wan wərkun mənəde məwe kə Yesu*, bawo nkən endeyac afum ɔn kiciya kəjan.»

²² Maməkə fəp mənayi nte tənɔɔnɛ nte Mariki ɛnalokə kusu ka sayibə mə, meyi:

²³ «Məcəŋkəl, wəyecəra wətəcərə wərkun endebekekəs.

Pəkom wan wərkun nwe andewe Emaniyel mə.»

Itə tatəkə: «Kanu kəyi kə səna.»

²⁴ Nte Isifu entime mə, k'ɔyɔ təkə mələkə ma Mariki mənəsom kə mə. K'ələk Mari k'ənence kə.

²⁵ Mba ɲanafəntərə fə kə Mari haɲ nte Mari ɛnakom wan wərkun, nwe Isifu ɛnasəɲ tewe ta Yesu mə.

2

Acərə mes ɲander kənəŋk Yesu

¹ K'əŋkom Yesu dare da Betləhem nde atəf ɲa Yude, təm tatəkə tɔ Herodu ɛnayɔnɛ di wəbɛ. Kə acərə mes aka ntende kəca nkɛ dec dəmpɛ mə ɲander Yerusalem,

² kə ɲayif: «Deke kənaka nkɛ kəndeyɔnɛ wəbɛ k'aSuyif nwe antɛp kəckom mə, eyi-ɛ? Bawo sənəŋk kəs kən ntende dec dəmpɛ mə, sənder kədetontnɛnɛ kə fər kirin.»

* **1:21** Yesu = cəHebərə «Wəyac» **1:23** Esayi 7.14

³ Nte wàbɛ Herodu ene toloku tatàkò mɔ, kò pɔyi kò yamayama, kò aka Yerusalem fɔp.

⁴ Kò wàbɛ Herodu olonka alonɛ apɔn fɔp kò atàkɛ sariyɛ s'aSuyif, k'eyif ɲa kàfo nkɛ andekom Krist, wɔyac nwɛ Kanu kàyɛk-yɛk mɔ.

⁵ Kò akakò ɲaloku kò: «Dare da Betlɛhem nde atɔf ɲa Yude andekom kò, bawo itò sayibɛ sɛncicàs:

⁶ Kò mɛna Betlɛhem atɔf ɲa Yuda, mɔyò dákacɛmɛ sɔdare sɔpɔn sa Yuda daco, bawo dare dam dɔ wàkirin endewur nwɛ endekɛkàs afum em aɲɛ ɲayɔnɛ aka Yisrayel mɔ.»

⁷ Awa, kò Herodu ewe acɛrɛ ɔn mes, k'eyif ɲa yòkyòk kàcɛrɛ yati tɛm tókò kòs kan̄kò kɛnamɛntàrnɛ mɔ.

⁸ Kò Herodu osom afum Betlɛhem, pàcloku: «Nàkò nàtɛnàs kàcɛrɛ pàsoku teta wan wàkawɛ. Kò nànan̄k kò-ɛ, nàder nàsɔn'em ti kàcɛrɛ, nte tɔɲsɔɲɛ ina sò ikò itontnɛnɛ kò fɔr kirin mɔ.»

⁹ Nte acɛrɛ mes ɲalip kàcɛɲkəl wàbɛ mɔ, kò ɲan̄kò. Awa, kòs nkɛ ɲanan̄k mɔ, kàyi ɲa tekirin, nte kòs kan̄kò kàmbɔp kàfo nkɛ wan nwɛ ɛnayi mɔ, kò kàncɛmɛ.

¹⁰ Nte ɲanan̄k kòs nkɛ mɔ, kò pàmbɔt ɲa pɔpɔn.

¹¹ Kò ɲamɛrɛ kəlò disrɛ, kò ɲan̄k wan kò kɛrɛ Mari, kò ɲancɔpɛ wan suwu dɛntɔf kàtontnɛnɛ kò fɔr kirin. Kò ɲasikəli lɔba ya daka dajan kò ɲampoɔɔ wan Yesu kɛma, suray sətət sa kələl ka kətək kò labundɛ da mir.

¹² Nte Kanu kəlɔk-lokər ɲa dàmɛrɛ a ta ɲaluksàrnɛ sò nda wàbɛ Herodu mɔ, kò ɲalɛk dɔpɔ dɔlɔma kəkò ka ndaran̄an.

Kəyekse ka Isifu, Mari kə wan kən Yesu ŋakə Misira

¹³ Nte ŋankə mə, gbəncana babəkə kə mələkə ma Mariki mowurər Isifu dāmere kə moloku kə: «Məyefe mələk wan kə kere, məyekse məkə Misira, məyi di haŋ tɛm nte indelok'əm kəlukus mə, bawo Herodu endetɛn wan pəmələk kə.»

¹⁴ Kə Isifu eyefe pibi disre, k'elek wan kə kere k'əŋkə Misira,

¹⁵ k'eyi di haŋ kə Herodu efi. Maməkə mənayi nte tɔŋsɔŋe məkə Mariki ɛnalokɛ kusu ka sayibɛ mə, mɛlarɛ: «Iwe wan kem pəwur Misira.»

Kədifət ka awut

¹⁶ Nte Herodu ɛnəŋk nte acərə mes ŋantiŋkər kə mə, kə pənaŋkanɛ kətɛɛ kə, k'osom a padifət awut fəp aŋe ŋanasɔtɔ meren mɛrəŋ haŋ kətor mə, aŋe ŋanayi Betlehɛm kə sədare nse səŋkɛl di mə, ɛnalɛk tɛcɛmɛmnɛ tatəkə nte acərə mes ŋanaloku kə tɛm nte kəs kənawur mə.

¹⁷ Awa, təkə Sayibɛ Yereɛmy ɛnaloku mə, tɛlarɛ:

¹⁸ «Ane kəbokɛnɛ nde dare da Rama, kəbok kəpəŋ kə kəkule-kule ka defi.

Rasɛl eyi kəbok awut ɔn.

Ɛfaŋ fɛ a palɛtsɛnɛ patorɛ-torɛ kə abəkəc, bawo awut ɔn ŋaŋkɔs-kɔs.»

Kəlukus kəŋan Yisrayel

¹⁹ Nte wəbɛ Herodu efi mə, gbəncana babəkə kə mələkə ma Mariki mowurər Isifu dāmere atɔf ŋa Misira,

²⁰ kɔ moloku kɔ: «Məyɛfɛ mələk wan kɔ kɛɛ, məlukus atɔf ɲa Yisrayel, bawo akɔ ɲanafaɲ kədɪf ka wan wəkawɛ mə ɲafis-fis.»

²¹ Kɔ Isifu ɛyɛfɛ, k'ɛlɛk wan kɔ kɛɛ kɔ ɲalukus Yisrayel.

²² Mba ntɛ ɛnane a Arkelayos ɔsɔtɔ kəyɔnɛ ka wəbɛ dəkəcəmɛ da kas Herodu mə, kɔ Isifu enesɛ kəkɔ atɔf ɲa Yude. Kɔ mɛlɛkɛ molok-lokər kɔ dəmɛrɛ, kɔ Isifu ɔɲkɔ atɔf ɲa Kalile.

²³ K'ɔɲkɔ pəyi dare da Nasarɛt, ɛnayɔ ti ntɛ tɔɲsɔɲɛ toloku ta Yecicəs Yosoku nyɛ sayibɛ ɲanacicəs mə tɛlarɛ: «Andewe kɔ wəka Nasarɛt.»

3

Kawandi ka Aɲnabi Saɲ Batis

Mark 1.1-8; Luk 3.1-6

¹ Mata maməkɔ kɔ Aɲnabi Saɲ Batis owur pəckawandi ndɛ tɛgbərəɛ ta atɔf ɲa Yude:

² «Nəsəkpər bəkəc nəlomp, bawo dɛbɛ da dəkəm dɔlɔtərɛ!»

³ Nkɔn sayibɛ Esayi ɛnaloku tetɔn: «Fum wəkɔ dim dɔn deyɪ kəwur dətɛgbərəɛ mə ɔfɔ:

«Nəlompəs dɔpɔ da Mariki,
Nəlompɛ səpɔ sɔn sa wɛcək!»»

⁴ Saɲ nwɛ, yamos ya cəfon ca yəkəmɛ y'ɛncbɛrɛnɛ, pəcgbəncɛnɛ bɛlɛt ba akata defɪ. Cəlaɲkma kɔ mɛsɛ ma cəmɛ ca dop gbəcərəm yɛnayɔnɛ kɔ yeri.

⁵ Afum aɲɛ ɲancyɛfɛ Yerusalem, akɔ ɲancyɛfɛ atɔf ɲa Yude fəp mə, kɔ akɔ ɲancyɛfɛ sədare nɛ səyi kəɲgbəkɔ ka Yurdɛn kəsək mə fəp ɲanckɔ ndɛ eyi mə,

⁶ ɲacsətər kɔ kəgbət dəromun teta Kanu nde kəɲgbəkɔ ka Yurdən, ɲaccen kiciya kəɲan afum daco.

⁷ Nte encnəɲk aka dinɛ da aFarisi* kɔ da aSadisi† ɲacderɛnɛ kəgbət dəromun teta Kanu mə, k'oloku ɲa: «Nəna aɲɛ nəyi pəmɔ ɲkisin mə! An'əsəɲɛ nu kəcərə nte aɲyeksər kiti ka Kanu nke kəyi kəder mə-ɛ?

⁸ Awa, nəde nəcyɔ məyɔ mətət mmɛ mənɲmentər a nəsəkpər mera kɔ nəncəmɛ pəlompɔ darən mə.

⁹ Ta nəcɛm-cɛmnɛ a Kanu kəndeyac nu bawo nəloku: «Abraham əyənɛ wətem kosu!» Ey, icloku nu, nənəɲk masar mame ba? Kanu kəntam kəkafəli mi məyənɛ awut a Abraham.

¹⁰ Ndekəl on, tomunt pelip kəcəmɛ kəcɛp ka tək haɲ nde ntentəl ya yi: Kətək nke o nke kəntəkom yokom yətət mə, ancɛp ki, paləm dənɛnc.

¹¹ Ina, dəromun ɲɲgbət nu teta kəmentər a nəsəkpər bəkəc, mba nwɛ eyi kəder im tadarən mə, dəAmerə Ƴecempi ɲa Kanu kɔ nɛnc ende pəcgbət nu. Wəkakɔ əyɔ fənəntər pətəs im. Isətɔ fɛ dofum dowurɛ kɔ cɔfta dəwɛcək.

¹² Pəcəmɛ dəkur pətəmpər kərəbɛ dəwaca pəcgbap, pəgbɛy mənɲben mətət mmɛ endemənɲkərɛ dəkələ mə, mba pəcɔf fonta dənɛnc ndɛ dəntənime mə.»

*Kəgbət ka Yesu dəromun teta Kanu
Mark 1.9-11; Luk 3.21-22; Isaɲ 1.29-34*

* **3:7** WəFarisi, aFarisi = Kəgba k'abeki ka dinɛ d'aSuyif aɲɛ ɲasektərənɛ sariyɛ kɔ məyɔ mokur ma aSuyif mə tin tin tin. † **3:7** WəSadisi, aSadisi = Kəgba k'abeki ka dinɛ d'aSuyif kəlma, aɲɛ ɲasektərənɛ sariyɛ kɔ məyɔ mokur ma aSuyif mə. **3:7** Luk 3.7

¹³ Təm tatəkə tə Yesu ənayefe atəf ɲa Kalile, k'ender nde kəɲgbəkə ka Yurdən kəsək nnə Saɲ eyi mə pədesətər kə kəgbət dəromun teta Kanu.

¹⁴ Mba kə Saɲ ɛfaɲ kəyamsər kə ti, k'oloku Yesu: «In'ə pəmar isətər mənə kəgbət dəromun teta Kanu, kə mənə mənder nnə iyi mə!»

¹⁵ Kə Yesu olukse kə: «Məwose ti kəresna. Tatəkə tə pəmar payə mes fəp mmə Kanu kəsom su mə.» Awa, kə Saɲ owose.

¹⁶ Yesu ənadelip kəsətə kəgbət dəromun teta Kanu, k'empɛ. Gbəncana babəkə kə kəm kəɲgbite tetən, k'ənəɲk Amera ɲa Kanu ɲoctorər kə pəmə antantoriya.

¹⁷ Awa kə dim dontor kəyefe dəkəm: «Wəkawɛ wan kem nwɛ imbətər mə əfə, nkən əbət im mes belbel.»

4

Nəɲk Njɛɛc ɲɛwakəs kəsəɲɛ Yesu kəciya

Mark 1.13; Luk 4.1-13

¹ Ntɛ tencepər mə, kə Amera ɲa Kanu ɲɛɲkekərə Yesu nde dətɛgbərə kəkəsak kə Nəɲk Njɛɛc ɲɛwakəs kəsəɲɛ kə kəciya.

² Ntɛ Yesu elip kəsun mata wəco maɲkələ (40) pibi kə dan mə, kə dor dəyə kə.

³ Ntɛ Nəɲk Njɛɛc ɲɛfaɲ kəsəɲɛ Yesu kəciya mə, kə ɲender ɲoloku kə: «Kə təyənɛ a Wan ka Kanu məyənɛ-ɛ, məloku oɲ masar mamɛ məyənɛ cəcom.»

⁴ Kə Yesu oloku: «Yecicəs Yosoku yoloku: «Bafə kəcom gbəcərəm kəɲsəɲɛ fum kəyi doru, mba moloku ma Kanu fəp məɲsəɲɛ fum kəyi doru.»»

⁵ Kɔ Nɔŋk Nɛlɛc nɛŋkɛkɛrɛ Yesu nde Yerusalem dare dosoku, kɔ nɔŋkɔ nɛcɛmbɛr kɔ nde dɛtɛlɛmpan pa kɛlɔ kɛpɔŋ ka Kanu kɛrɔŋ.

⁶ Kɔ nɔlɔku Yesu: «Kɔ tɔyɔnɛ a wan ka Kanu mɔyɔnɛ-ɛ, mɔyokɛ ma dɛntɔf, bawo dɔYecicɛs Yosoku ancicɛs:

«Kanu kɛndesom mɛlɛkɛ ɔn, nɔandɛtɔmpɛr ɛm dɔwaca

nɛ tɔŋsɔŋɛ ta mɛmpɛt tasar mɔ.»»

⁷ Kɔ Yesu oloku nɛ: «Mba ancicɛs dɔYecicɛs Yosoku sɔ: «Ta mɛcɔŋɛs Mariki Kanu kam kɔyɔ ka tes tɛwɛy-wɛy tɔn.»»

⁸ Kɔ Nɔŋk Nɛlɛc nɛŋkɛkɛrɛ Yesu sɔ tɔrɔ tɛŋɛci kɛrɔŋ, kɔ nɛmɛntɔr kɔ dɛbɛ da tɔf ya dɔru fɛp kɔ dɔtɔt da yɛ.

⁹ Kɔ Nɔŋk Nɛlɛc nɔlɔku Yesu: «Inɔŋ ɛm yayɛ fɛp kɔ mɔwosɛ kɛtɔntnɛn'ɛm fɔr kirin-ɛ.»

¹⁰ Kɔ Yesu oloku nɛ: «Mɛbɔlɛ, mɛna Sentani! Bawo ancicɛs dɔYecicɛs Yosoku:

«Mariki Kanu kam pɛmar mɛctɔntnɛnɛ fɔr kirin, nkɔn gbɛcɛrɛm pɛmar mɛcsalɛnɛ.»»

¹¹ Kɔ Nɔŋk Nɛlɛc nɛsɛk Yesu, awa kɔ mɛlɛkɛ mɛndɛr mɛbɛcɛ kɔ.

Yesu oncop yɛbɛc yɔn Kalile

Mark 1.14-15; Luk 4.14-15; Isaŋ 4.1-3,43-46

¹² Nɛ Yesu ene a alɛk Saŋ Batis k'ambɛr dɛbili mɔ, k'owur kɛkɔ ɔtɔf nɔ Kalile.

¹³ Yesu ɛnayi dare da Nasarɛt, k'ɛndɛ pɛcɛpɛ dare da Kaparnam ndɛ deyɛ kɛba ka Kalile kɛsɛk dɛɛndɔ tɔf ya Sabulon kɔ Naftali,

¹⁴ nte tɔɲsɔɲe tɔkɔ Kanu kənalokɛ kusu ka sayibɛ Esayi mɔ, telarɛ:

¹⁵ «Atɔf ɲa Sabulon

kɔ ɲa Naftali dɔpɔ ndɛ dɔɲkɔ ndɛ kəba ka Kalile,

kəɲgbɔkɔ ka Yurdɛn kəsək,

atɔf ɲa Kalile ndɛ atɔyɔnɛ aSuyif ɲandɛ mɔ,

¹⁶ afum a di aɲɛ ɲanacɛm-cɛmnɛ a Kanu kəmbɛr ɲa kumunt mɔ,

ɲanəɲk nte Kanu kəɲkafɛlɛ kɔ kəntɛfərnɛ ɲa mɔ.

Aɲɛ ɲanayi kubump ka kətɔgbɛkər amera mɔ,

kɔ pəwanɲara pomot ɲa.»

¹⁷ Tɛm tatɔkɔ tɔ Yesu ɛnacɔp kəkawandi: «Nəsəkpər bəkɛc nəlomp, bawo dɛbɛ da dɔKɔm dɔlɔtərnɛ.»

Yesu ewe acɛpsɛ ɔn darəɲ acɔkɔ-cɔkɔ maɲkɛlɛ

Mark 1.16-20; Luk 5.1-11; Isay 1.35-51

¹⁸ Nte Yesu ɔɲckɔtəs kəba ka Kalile kəsək mɔ, k'ɛnəɲk dɛwɛncɔ mɛrəɲ, Simɔɲ nwe ancwe Piyɛr mɔ, kɔ wɛnc Andərə, ɲacɣbal manta dəkəba, bawo awɛnt ɲɔ ɲanayɔnɛ.

¹⁹ Kɔ Yesu oloku ɲa: «Nəder nəcɛps'em darəɲ, indɛsɔɲɛ nu kəyɔnɛ awɛnt a afum.»

²⁰ Gbəncana babɔkɔ kɔ ɲasak manta maɲan kɔ ɲancəmə Yesu darəɲ.

²¹ Nte Yesu ɔɲkɔ pipic mɔ, kɔ ɛnəɲk sɔ dɛwɛncɔ mɛrəɲ Sak wan ka Sebede kɔ wɛnc Isay, aɲɛ ɲanayi sɔ abil ɲaɲan disrɛ kɔ kas kəɲan Sebede, ɲaclompəs-lompəs manta mɔ. Kɔ Yesu ewe ɲa.

²² Gbəncana babɔkɔ kɔ ɲasak abil kɔ kas kəɲan, kɔ ɲancəmə Yesu darəɲ.

Yesu enctàksɛ pàctamàs sɔ

Mark 1.39; Luk 4.44; Luk 6.17-18

²³ Yesu ɔnckɔtəs atɔf ɲa Kalile fəp pàctàksɛ dəkətola Kanu da aSuyif, pàckawandi Kibaru Kətət ka dɛbɛ da dəkəm, pàctamsɛnɛ sɔ docu kɔ lanɲiru fəp ndɛ dɛnayi afum mɔ.

²⁴ Ti tɛnasɔɲɛ tewɛ tɔn tɛsamsər atɔf ɲa Siri fəp disrɛ. Pàckɛrɛ kɔ afum fəp akɔ docu ya-mayama dɛnasumpər, pàccu ɲa mɔ: Akɔ yɔɲk yɛlɛc yɔnctɔrəs, akɔ docu da kətempɛnɛ dɛnayi, kɔ akɔ ɲanayɔ lanɲiru mɔ, Yesu enctamàs ɲa fəp.

²⁵ Kənay k'afum alarəm kəncder kəyɛfɛ Kalile, atɔf ɲa Sədare Wəco, dare da Yerusalem, atɔf ɲa Yude, kɔ sədare sa kəca nkɛ dec dɛmpɛ Yurdɛn mɔ.

5

Kawandi ka Yesu ndɛ tɔrɔ kəronɲ

Mark 3.13; Luk 6.12-13

¹ Ntɛ Yesu ɛnəɲk kənay ka afum mɔ, k'ɛmpɛ tɔrɔ kəronɲ, k'ɔɲkɔ pəndɛ, kɔ acɛpsɛ ɔn darəɲ ɲander nnɔ eyi mɔ.

² Kɔ Yesu ɛlɛk moloku k'ɛyɛfɛ kətàksɛ ɲa:

Amera ɲətət nɲɛ ɲəsɔɲ fum pəbotu nnɔ Kanu kəyi mɔ

Luk 6.20-26

³ «Pəbotu peyi aɲɛ Kanu kəsɔɲ pətət kɔ ɲancərənɛ a ɲancəmə Kanu fər kirɲ waca wəsəkər mɔ, bawo dɛbɛ da dəkəm, danan dɔ!

⁴ Pəbotu peyi aɲɛ Kanu kəsɔɲ pətət kɔ ɲayi kəbok mɔ,

bawo Kanu kəndekɔfɛɲət ɲa mɛncər.

⁵ Pəbotu peyi aɲɛ Kanu kəsɔɲ pətət kɔ ɲandɛncɛ mɔ, bawo ɲandekəsɔtɔ doru fəp, dɔyɔnɛ ɲa kɛ!

6 Pəbotu peyi anɛ Kanu kəsən pətət kə tɛfan ta Kanu
tɛmbas ɲa kənənɲk pəmɔ nte amera ɲonɲwos
fum dor dəyɔ kə mɔ,

bawo ɲandekənembərə!

7 Pəbotu peyi anɛ Kanu kəsən pətət kə ɲanyɔnɛ
awɛnc anɔ nənɔfər mɔ,

bawo Kanu kəndekəyɔnɛ ɲa nənɔfər!

8 Pəbotu peyi anɛ Kanu kəsən pətət kə ɲasək bəkəc
mɔ,

bawo ɲandekənənɲk Kanu!

9 Pəbotu peyi anɛ Kanu kəsən pətət kə ɲayɔnɛ
alompəs a pəforu awɛnc anɔ daco mɔ,

bawo andekəwe ɲa awut a Kanu!

10 Pəbotu peyi anɛ Kanu kəsən pətət kə antərəs ɲa
teta kəyi kənən tɛfan ta Kanu mɔ,

ɲa ɲandekəsɔtɔ dəbe da dəKəm!

11 Pəbotu peyi anɛ Kanu kəsən pətət mɔ k'aləməs
nu, pactərəs, k'andele nu moloku mɛlɛc fəp ma
yem teta ina Yesu.

12 Kə tatəkɔ tɛmbəp nu-ɛ, nəwoləs-woləs, nəyi
pəbotu disrɛ, bawo kəway konu kəmbək nde
dəKəm. Tante t'anatərəs sayibɛ anɛ ɲananunɲkɛnɛ
kəder a nənə nəcder mɔ.»

Nəyi pəmɔ mɛr kə pəwanɲkərə

Mark 9.50; Luk 14.34-35

13 «Nənə mɛr ma doru mɔ nəyɔnɛ. Mba kə mɛr
mɛndɛncɛ-ɛ, afɔtam kədɔktəsɛ mi paka o paka.
Mentesɛ fɛ sɔ təlɔm o təlɔm, mɛnɛ pagbal mi afum
ɲanas-nas.

14 Nən'əyɔnɛ pəwanɲkərə pa doru. Dare ndɛ denɲi
tərə kəron mɔ, afɔtam kəmɛnɲk di.

¹⁵ Afomot lamp pagbapər di kəfala, mba andet di kədet dəm pədetē lamp kəron, dəsəŋ pəwanjkəra akə ŋayi kələ disre mə fəp.

¹⁶ Tin tayi tə pəmar pomot ponu pəsəŋ pəwanjkəra tatəkə afum fər kirin, nte təŋsəŋe ŋanəŋk yebəc yonu yətət, ŋakor-koru Kanu Papa konu nwe eyi nde dəkəm mə.»

Yesu entəksə sariye nse Musa enasəŋ mə

¹⁷ «Ta nəcem-cəmnə a teta Sariye kə pəyənə fə ti mətəksə ma sayibə fəp m'inder kəlin day. Inder fə kəlin mi day, mba kəsəkəs ka mi pəs k'inderenə.

¹⁸ Kance, inloku nu ti, kəwon nke o nke ka kəm kə antəf afəlin nte o nte dəsariye. Afəlin ali toloku tefet tin, afəlin ali tēgbeyəs-gbeyəs tin, tatəkə haŋ doru delip.

¹⁹ Məna nwe o nwe mənɣfani tosom tefet tin mə, mətəksə sə afum kəfani tosom tatəkə, fum wəkakə endekəfete dəkəcəmə nde dəbə da dəkəm. Mba kə fum eleləs mosom pətəksə sə afum kələləs mi-ε, fum wəkakə endekəyɔ dəkəcəmə dəpəŋ nde dəbə da dəkəm.

²⁰ Icloku nu, pəmar nəcəmə dolompu da Kanu darəŋ nətas atəksə sariye s'aSuyif kə aFarisi. Kə təntəyi-ε, nəfəbərə dəbə da dəkəm.»

Kətəksə teta mətəle

Mark 11.25; Luk 12.57-59

²¹ «Nənane nte analoku atem anu mə: «Ta mədif fum.» Məna nwe məndif fum mə, aŋkekər'am dənkiti.

²² Mba ina iloku nu: Nwe o nwe pəntele nnə wənc eyi mə, aŋkekərə kə dənkiti. Kə fum oloku wənc «Daku də məyənə»-ε, pakekərə kə aboc kiti fər kirin.

Ko fum oloku wenc: «Məntəŋkələ-ε,» palək ko pakə paləm dənenc da yahanama.

²³ Ko məndəkə kəmentər polonjə pam nde tetek tolonjə Kanu kəronj a məcəm-cəmnə dənda, a wenc əm emənjk'am tes tələma-ε,

²⁴ məsak polonjə pam papəkə tetek tolonjə Kanu kirin, məkə kərəsna məlompəsne daco ko wenc əm a məluksərne kədelonjə.

²⁵ Ko nəsol ko wəyəfərəne kam kəkə dəŋkiti-ε, nətən kətəŋne dəpə, ta wəyəfərəne kam pəkəber əm wəboc kiti dəwaca, wəkəkə pəsəŋ əm wəsədar nwε ŋkəber əm dəbili mə.

²⁶ Kance, iclok'am, məfəwur dəndo ta məlip kəlukse fərəŋk fəlpəs nfε məntəmpərə ko mə-ε.»

Kətəksε teta kəsumpər dalakə

MAT 18.8-9; Mark 9.43,47-48

²⁷ «Nənane pacloku: *«Ta məsumpər dalakə.»*

²⁸ Mba ina iloku nu: Nwε o nwε əməmən wəran haŋ pəfaŋ kəfəntərər ko mə-ε, elip kəsumpər dalakə ko wəran wəkəkə dəbəkəc.

²⁹ Ko təyəne dəfər dam da kəca kətət dendesəŋ'am kəciya-ε, məkakti di mələm di dəbəl'am. Bawo kəlinj kəfo kələma dis dam kəncepər kəyə dis dam məlməl paləm əm yahanama.

³⁰ Ko təyəne kəca kam kətət kəndesəŋ'am kəciya-ε, məgbinti ki mələm ki kəbəl'am. Bawo kəlinj kəfo kələma dis dam kəncepər kəyə dis dam məlməl paləm əm yahanama.»

Sariye nse səncəmə anəncəne mərəŋ aŋe ŋayi kəcənəne mə

Mat 19.7-9; Mark 10.4-5,10-12; Luk 16.18

³¹ Kɔ Yesu oloku sɔ: «Ancicɛs dɔYecicɛs Yosoku nte: «Kɔ wɛrkun endece wɛran-ɛ, pɛmar pɛcicɛ wɛran wɛkakɔ areka ɲecɛnɛ kɔ.»

³² Mba ina icloku nu: Nwɛ ence wɛran kɔn mɔ, ɔɲsɔɲɛ wɛran wɛkakɔ kɛsumpɛr dalakɔ kɔ wɛrkun wɛlɔma ɛnɛncɛ kɔ-ɛ, mɛnɛ tɔyɔnɛ a kɛnɛncɛnɛ kaɲkɔ kɛyi fɛ sariyɛ disrɛ. Mba nwɛ ɛɲnɛncɛ wɛran nwɛ wɛrkun wɛlɔma ence mɔ, nkɔn sɔ dalakɔ d'ɔɲsumpɛr.»

Kɛtɔkɛ tɛta kɛdɛrɛm

³³ «Nɛncɛrɛ tɔkɔ anacicɛs atɛm anu dɔYecicɛs Yosoku mɔ: «Ta mɛyi ta mɛyɔ tɔkɔ mɛnɛdɛrɛm kɛyɔ mɔ. Mba mɛyɔ tɔkɔ mɛnɛdɛrɛm Mariki fɔr kirin kɛyɔ mɔ fɛp.»

³⁴ Mba ina icloku nu, ta nɛdɛrmɛ tɔlɔm o tɔlɔm: Ta nɛdɛrmɛ kɛm, bawo dɔcɔm da Wɛbɛ Kanu dɔ.

³⁵ Ta nɛdɛrmɛ antɔf, bawo antɔf ɲɔyɔnɛ dɛkɛcɛmbɛr dɔn wɛcɛk, ta nɛdɛrmɛ sɔ ali Yerusalem bawo dare da Kanu Wɛbɛ wɛpɔɲ dɔ.

³⁶ Ta nɛdɛrɛm sɔ domp, bawo mɛfɔtam kɛsɔɲɛ ali kɛfon kam kin kɛfɛrɛ kɔ pɛyɔnɛ fɛ ti kɛbiyɛ.

³⁷ Dɛmɛdɛrɛm monu pɛmar mɛlɔku: «Ey,» kɔ pɛyɔnɛ kance kɔ-ɛ, mɛlɔku: «Ala,» kɔ pɛyɔnɛ a bafɔ kance kɔ-ɛ. Ntɛ o ntɛ ambɛrɛnɛ mɛlɔku ma kɛdɛrɛm mamɔkɔ mɔ, dɛɲɔɲk ɲɛlɛc tɛyɛfɛ.»

Kɛtɔkɛ tɛta kɛlukɛ ayɛk

Luk 6.29-30

³⁸ Kɔ Yesu oloku sɔ ɲa: «Nɛne paɔloku dɔYecicɛs Yosoku: Dɔfɔr d'ɔɲsɔɲɛ dɔfɔr kɛway, desɛk d'ɔɲsɔɲɛ desɛk kɛway.

³⁹ Mba ina iloku nu ta nàlukse ayek nwe ònyò nu pàléc mọ. Kò fum efer àm kàca dèkanca ña kàca kàtòt-é, mácence kò sò ña méréñ ñòkò.

⁴⁰ Kò fum éfan àm kàkiti teta kàbanjèr kam duma-é, mäsakàre kò sò burumus bam.

⁴¹ Kò fum éntar'am kàkòt kilomètèr kin-é, məkòt kilomètèr méréñ kò nkòn.

⁴² Məpocə wəkò ontol'am mọ, ta məbər kəmunt nwe éñfan kàlékər àm debe da paka pələma mọ.»

Nəbətər aterene anu

Luk 6.27-28,32-36

⁴³ Kò Yesu oloku ña sò nté: «Nəne a analoku: «Məbətər wənc àm, məter wəterene kam.»

⁴⁴ Mba ina icloku nu: Nəbətər aterene anu nətola Kanu pətòt akò ñantərəs nu mọ.

⁴⁵ Kò nəyò ti-é, nəntubucene mọyò mətòt ma Kanu Papa konu nwe eyi nde dəkəm mọ, bawo enjyektər dec dən ayeñki bəkəc kò atòt, pətufər wəcafən alompu kò atòlomp.

⁴⁶ Kò təyone nəbətər gbəcərəm akò ñambətər nu mọ, kəway kəre kò nəsətəne ti-é? Ali abanəs dut tatòkò tò ñanyò pəmò nəna.

⁴⁷ Kò təyone awənc àm aña gbəcərəm ñò mənɣif-é, pətòt pere pò mọyò-é mpé pencepər pa akò mọ? Ali atəyone aSuyif, bafò tatòkò tò ñanyò pəmò nəna ba?

⁴⁸ Awa, nəna nəlare dolompu nəcemp pəmò nté Papa konu nwe eyi nde dəkəm élare dolompu k'encemp mọ.»

6

Kətəksə teta kəpocə atəyò daka

¹ Kɔ Yesu oloku ɲa sɔ: «Nəkembərne kacyɔ mɔyɔ monu ma dinɛ afum fɔr kirin ɲtɛ tɔɲsɔɲɛ ɲaməmən nu mɔ. Kɔ teyi-ɛ, Papa konu nwe eyi nde dəkəm mɔ ɔfɔdesɔɲɛ nu ti kəway.

² Nənɔfɔr disrɛ kɔ mɛnde kɛmar atɔyɔ daka-ɛ, ta mɛcam ti afum ɲacɛrɛ. Abanɛnɛ kəlomp ɲanɲɔ ti, nde wɔlɔ wa dəkətola Kanu kɔ dɔpɔ daco, ɲactɛn a afum alɔma kəyek-yekəs ɲa. Icloku nu, kance kɔ: Kəway kəɲan mɛlmɛl kɔ ɲayi kəban.

³ Mba kɔ mɛndepocɛ atɔyɔ daka-ɛ, ta mɛsɔɲɛ kɛca kəmeriya kɛcɛrɛ tɔkɔ kətɔt kəyi kəyɔ mɔ.

⁴ Nənɔfɔr disrɛ kɔ mɛnde mɛcmar fum-ɛ, mɛmar kɔ kəgbɔpɲɛ disrɛ ta wɔlɔma pɛcɛrɛ ti. Papa kam nwe ɛɲnəɲk ali ɲtɛ tɔɲgbɔpɲɛ mɔ, endesɔɲ əm kəway.»

Metəksɛ mmɛ antola Kanu mɔ

⁵ «Kɔ nɛnde kɛtola Kanu-ɛ, ta nacyɔ pəmɔ abanɛnɛ kəlomp anɛ kɛcɛmɛ dəkətola Kanu kɔ mɔgbɔkɛnɛ ma sɔpɔ sɔpɔɲ kəmbɔt, ɲtɛ tɔɲsɔɲɛ ɲamentərne afum mɔ. Kance, icloku nu, kəway kəɲan kɔ ɲayi kəban tatɔkɔ.

⁶ Mba mɛna, kɔ mɛnde kɛtola Kanu-ɛ, mɛbɛrɛ dukulɔ, mɔgbɔtərne kumba, mətola Papa kəgbɔpɲɛ disrɛ, Papa kam nwe ɛɲnəɲk ɲtɛ tɔɲgbɔpɲɛ mɔ, ɔɲsɔɲ əm kəway.

⁷ Kɔ mɛndetola Kanu-ɛ, ta mɛla moloku pəmɔ atɔcɛrɛ Kanu, anɛ ɲancɛm-cɛmnɛ a kɔ ɲalok-loku pɛlarɛm-ɛ, tɔɲsɔɲɛ Kanu pɛcəɲkəl ɲa.

⁸ Ta nɛctubucɲɛ akakɔ, bawo Papa konu ɛncɛrɛ mes mmɛ nɛfanɲər kɔ dɔsɔk o dɔsɔk mɔ, ta nɛntatola kɔ-ɛ.

⁹ Mba nɛna, ɲtɛ tɔ pɛmar nɛtola Kanu: Kas kosu nwe eyi nde dəkəm mɔ,

məsəŋe paleləs decempi da tewe tam topus!

¹⁰ Məsəŋe a dəbe dam deder.

Məsəŋe afum ɲacəme tɛfaŋ tam darəŋ dəntəf pəmə dəKəm!

¹¹ Məpocə su kəcom kəməkə.

¹² Məŋaŋnənə su kiciya kosu,

pəmə nte səŋaŋnənə akə ɲanciyanə su mə.

¹³ Ta məsak su səyɔ mes mme məŋsəŋe su kəciya mə,

mba məbaŋ su Ƴəŋk Ƴələc dəwaca. [Bawo mənə mən'ɔyɔ dəbe, fənəntər kə kəkorkoru teta meren kə meren disre.]*

¹⁴ Awa, kə nəŋaŋnənə afum pələc mpɛ ɲayɔ nu mə-
ɛ, Kas konu nkɛ kəyi nde dəKəm mə kəŋaŋnənə
nənə sə,

¹⁵ mba kə nəntəŋaŋnə afum-ɛ, Kas konu
ɔfəŋaŋnənə nənə sə pələc ponu.»

Kətəksɛ teta kəsun

¹⁶ «Kə məsuŋ-ɛ, ta məŋɛy kəro pəmə abanənə
kəlomp, ɲa ɲandukut kəro kəmentər a ɲasuŋ. Kance
icloku nu: Kəway kəŋan məlməl kə ɲayi kəbaŋ
kaŋkə.

¹⁷ Mba mənə, kə məsuŋ-ɛ, məsopnə labundɛ,
məbufərɛ kəro,

¹⁸ nte təŋsəŋe ta məmentər afum a kəsun kə
məndɛ mə, mba məmentər ti Papa kam Kanu nwe
ɔŋgbəpnɛ, pəcnəŋk nte o nte təŋgbəpnɛ mə. Ƴəŋəŋ
əm kəway.»

Daka da dəkəm dətas da doru *Luk 11.33-34*

* **6:13** Yecicəs yələma yəyɔ fɛ moloku mamɛ.

19 «Ta nāten kəsətə daka dēlarəm nnə doru dandε, ndε ate kə mārka yēnləsər fəp, ndε akiyε ɲambεrε dəwələ ɲakiyε mə.

20 Mba nāten kəyɔ daka dēlarəm da dəKəm nde Kanu kəyi mə. Dəndo, ate kə mārka yəfələsər mpε o mpε, akiyε ɲafəbεrε, ɲafəkiyε.

21 Bawo kəfo nkε daka dam denyi mə, difo abəkəc ɲam ɲenyi.»

Pəwan̄kəra pa dis

Luk 11.34-36

22 «Dəfər dəyənε lamp da dis. Kə dəfər dam dentesε-ε, dis dam fəp don̄mot,

23 mba kə dəfər dam dεlεcε-ε, dis dam fəp, kubump kə denyi. Kə təyənε pəwan̄kəra mpε peyi dis dam mə kəbump kə-ε, kubump kam kəmbək!»

Kanu kə pəsam: Ake mələk-ε?

Luk 16.13

24 «Nwε o nwε əfətam kəbəcε abε mērən̄. Kə teyi-ε, enter wəkin pəbətər wəkə, kə pəyənε fε ti-ε, pəsəktərne wəkin, pəbər wəkə kumunt. Nəfətam kəbəcε Kanu kə pəsam tēm tin.»

Məgbəkər Kanu kəlan̄

Luk 12.22-32

25 «It'əsən̄ε ntε iloku nu: Ta nəcēm-cēmne pəlarəm teta tecepərənε tonu doru, paka mpε nəndedi kə pəkə nəndemun mə. Ta nəcēm-cēmne sɔ teta dis donu, pəkə nəndebər di mə, bafə kəyi wəyən̄ kəncepər yeri yedi kə dis dencepər yamos ba?

26 Nəməmən̄ bəmp ya darenc: Yəfəgbal defet, yəfətəl, yəfəmen̄kərne mən̄gben̄ dəcεlε, mba Kas konu nkε kəyi dəKəm mə kən̄sən̄ yi yeri. Bafə

kəyi wəyeŋ ka nəna kəncepər ka bəmp ya darenc yayəkə dəkəcəmə ba?

²⁷ Fum wəre eyi nu daco nwe məcəmcəmnə mən məntam kəbələs kiyi kən doru ali kururu katin gboŋ mə-ε?

²⁸ Ta ake tə nəncəm-cəmnənə teta yamos-ε? Nəməmən nte yələŋk ya dalə yompon mə: Yəfəbəc, yəfədu yamos.

²⁹ Mba icloku nu, ali wəbə Sulemani yati kə daka da debeki dən fəp ənasətə fə yamos nyə yənatesə pəmə ya pələŋk papəkə pin mə.

³⁰ Yika yeyi məkə dalə, alna pacləm yi dənənc, mba Kanu kəŋsəŋə pəmar yi. Nəntam kələŋ tes tin: Pipicə oŋ cəke o cəke, Kanu kəndəbər nəna apicə kələŋ yamos pəcepər tatəkə!

³¹ Ta nəcəm-cəmnə kəyi konu doru, nəcyifnə: Ake səndedi-ε? Ake səndemun-ε? Yamos yere yə səndəbərənə-ε?

³² Məməkə mə atəcərə Kanu ŋantən tēm fəp. Mba Kas konu nkə kəyi nde dəKəm mə kəncərə a pəmar nəyə ca yayəkə fəp.

³³ Nənuŋkənə kərəsna kəten dəbə da Kanu[†] kə pəlompə pən. Kə nəyə tatəkə-ε, nkən Kanu end-edenərə nu yayəkə fəp.

³⁴ Ta nəcəm-cəmnə pəlarəm teta tecepərənə doru tonu alna, nəce alna ŋecəm-cəmnə teta ŋisərka. Pəcuy pa dəsək o dəsək pəntəŋnə dəsək da di.»

7

Ta nələk dəkəcəmə da Kanu dəŋkiti fum

[†] **6:33** Yəgbəkərə ya Yecicəs Yosoku yokur yələmə yəyə fə «da Kanu.»

¹ Yesu oloku ɲa: «Ta nəkiti akɔ nte tɔɲsɔɲe ta andesəkiti nana mɔ.

² Bawo tɔkɔ nɔɲkiti akɔ mɔ, itɔ Kanu kəndekəkiti sɔ nana! Kɔ potubcɛ pɔkɔ nɛntubcɛ akɔ mɔ, ip'andekɔsɔtubcɛ nu.

³ Ake'sɔɲe nte mɔɲgbətne ayika ɲɲe ɲeyi wɛnc əm dərɔfɔr mɔ, mba ta mɔɲnɔɲk tɔmbɔɲk ta kətɔk pɔkɔ pey'əm dərɔfɔr mɔ-ɛ?

⁴ Pəlompɔ pɔ ba, kəloku wɛnc əm: «Wɛnc im, məwɔsɛ a ilɲ əm ayika ɲɲe ɲey'əm dərɔfɔr mɔ,» mba mɔna məyɔ tɔmbɔɲk ta kətɔk dərɔfɔr ba?

⁵ Mɔna wəbaɲɛnɛ kəlomp, məlɲɲɛ kərəsna tɔmbɔɲk ta kətɔk dɔfɔr dam, it'ɔɲsɔɲ'am kənɔɲk belbel ayika ɲɔkɔ məfan kəlɲ wɛnc əm dərɔfɔr mɔ.

⁶ Ta məsɔɲ daka dɔkɔ ampus mɔ cɛn, yɛntam kəlɔksərne yɛɲɲ əm. Ta nələmər sɔ mətɔt monu meyenki kəway sɔp, ta yedenas-nas mi.»

Kɔ mɔnten-ɛ, mɔɲsɔtɔ

Luk 11.9-13

⁷ «Nətola, nəndesɔtɔ. Nəten, nəndenɔɲk. Nəsut-sut kumba, andegbite nu.

⁸ Bawo nwɛ o nwɛ ontola Kanu mɔ, ompocɛ kɔ. Nwɛ o nwɛ ɛnten mɔ, ɛɲnɔɲk. Nwɛ o nwɛ ɔɲsut-sut kumba mɔ, aɲgbite kɔ.

⁹ Kas kərə kəyi nu dacɔ nwɛ wan kən ontola kɔ kəcom, nkən pəsɔɲ kɔ tasar mɔ-ɛ?

¹⁰ Kɔ pəyɔnɛ fɛ ti, an'eyi nu dacɔ nwɛ wan kən ontola kɔ alop, nkən pəsɔɲ kɔ abok mɔ?

¹¹ Kɔ pəyɔnɛ nana aɲɛ nələcɛ mɔ, nəncərə kəsɔɲ awut anu ca yɔtɔt-ɛ, Kas konu nkɛ kəyi nde dəKəm kəndenɔɲkanɛ kəsɔɲ aɲɛ ɲantola kɔ ca yɔtɔt yayɔkɔ mɔ!

¹² Nəyənə afum təkə nəfan a nəyənə nu mə. Tatəkə to Səriye sa Musa kə Yecicəs ya Sayibə yosom.»

Dəkəbəre da nde Kanu kəyi mə dəwəkene

Luk 13.23-24

¹³ «Nəbəre dəkəbəre nde dəwəkene mə! Dəkəbəre nde dentefernə kələsar mə dəwəkəl, dəpə dəkə anka di mə doncuca fə kəkət. Afum ane nənkət dəpə dadəkə mə nala.

¹⁴ Mba dəkəbəre nde dentefernə kiya wəyej mə dəwəkene, dəpə nde anka di mə doncuca kəkət, ane nənkət di mə nala fə.»

Sayibə sa yem

Luk 6.43-44

¹⁵ «Nəkəmbərne sayibə sa yem. Na nander nu nəkerə nu moloku mobotu, mba alec bəkəc nə ane nəwəy-wəy mə.

¹⁶ Məyə manan mələc mə nənde nəcnepələ nə. Awa, nəcərə sə a afəpim yokom ya wən kə pəyənə fə ti cəyabə dəbejk!

¹⁷ Yokom yətət yə tək yətət fəp yonkom, mba kətək nke kəntətamne mə, yokom yələc yə kənkə.

¹⁸ Kətək kətət kəfəkom yokom yələc, kətək kəntətamne kəfəkom yokom yətət.

¹⁹ Kətək nke o nke kəntəkom yokom yətət mə, ancəp ki paləm dənenc.

²⁰ Awa məyə ma sayibə sa yem akakə mə nənde nəcnepələ nə pəmə nte anepələ kətək kətət kə pəyənə fə ti kəntətamne yokom ya ki mə.»

Ayemə acəmə Mariki darəj

Luk 6.46; 13.25-27

²¹ «Bafə nwe o nwe onlok'im: «Mariki! Mariki!» nandəkəbəre dəbe da kəm dəntəf, mba nwe

gbəcərəm ɔɲɔ tɛfɔŋ ta Papa kem nwɛ eyi nde dəkəm mə.

²² Dəsək ndɛ Kanu kəndeboc kiti afum a doru fəp daco mə alarəm ɲandeloku: «Mariki, Mariki, bafɔ tewe tam tɔ sənɕbonɕ ntɛ sənɕloku mosom mam mə, bafɔ tewe tam tɔ sənɕbɛlsɛ yɔŋk yɛlɛɕ, bafɔ tewe tam tɔ sənɕyɔnɛ mes mɛwɛy-wɛy ba?»

²³ Indelukɛ ɲa dəsək dadəkɔ: «Incərə fɛ nu ali katin! Nəbɔl'em day fəp fonu nɔɲɔ mes mɛlɛɕ!»

Wɔlɔ nwɛ mɛrɔŋ

Luk 6.47-49

²⁴ «Awa nwɛ o nwɛ ɛɲnɛn'em moloku mamɛ pəkɔt sɔ mi mə, endeyi pəmɔ wərkun wəɕərə kəkɔtɛnɛ mes, nwɛ ɛncəmbər kəlɔ kən dətasar teyenki mə.

²⁵ Wəɕafən pətuf, mənɕaca mɛyɛksɛ, afɛf ɲowur yɛwɛkərɛnɛ kəlɔ kaŋkɛ: Kəfɔwunɛ bawo dətasar ancəmbər ki gbiɲ.

²⁶ Nwɛ o nwɛ ɛɲnɛn'em moloku mamɛ ta ɔŋkɔt mi mə, endeyi pəmɔ wərkun wətɕərə kəkɔtɛnɛ mes, nwɛ ɛncəmbər kəlɔ kən dɛsənc mə.

²⁷ Wəɕafən pətuf, mənɕaca mɛyɛksɛ, afɛf ɲowur yɛwɛkərɛnɛ kəlɔ kaŋkɛ. Kəwunɛ, kətɛmpɛnɛ ka ki kəbɛk.»

Yesu kətam kən mes

Mark 1.22; Luk 4.32

²⁸ Ntɛ Yesu elip kəlɔk-loku mə, kɔ cusu cəwos kənay teta kətəkɛ kən,

²⁹ bawo ɛntəkɛ ɲa pəmɔ fum nwɛ ɔntəmpər kətam mə, kətəkɛ kən kənaciyanɛ kɔ ka atəkɛ sariyɛ s'aSuyif.

8

*Yesu entaməs wəcunə sen
Mark 1.40-44; Luk 5.12-14*

¹ Ntɛ Yesu ontor kəyɛfɛ dətəɾə mə, kə kənay ka afum kəncəmɛ kə darəŋ.

² Awa kə wəcunə sen ender pətontnɛnɛ kə fər kirin pəcloku: «Mariki, kə məfan ti-ɛ, məntam kəsəkəs im.»

³ Kə Yesu ɛntɛnc kəca, k'ɔŋgbuŋɛnɛ kə, k'oloku: «Ifan ti, məsək.» Gbəncana babəkə kə sen sən səntamɛ.

⁴ Kə Yesu oloku kə: «Məkembərɛnɛ kəloku ti fum, mba məkə məmentərɛnɛ wəloŋnɛ, pəməmən əm teta kəsəkəsɛnɛ kam, məkekərɛ polonɛnɛ pəmə təkə Musa encic ti mə. Tendeyənɛ afum fəp kəcərɛ a məntamɛ.»

*Yesu entaməs wəbəcɛ ka wəbɛ wəka asədar a Rom
Luk 7.1-10; Isaŋ 4.46-54*

⁵ Ntɛ Yesu ɛmbɛrɛ dare da Kaparnam mə, kə wəbɛ k'asədar wəRom ender pəloku kə.

⁶ Kə wəsədar nwɛ ɛlɛtsɛnɛ Yesu: «Mariki, wəbəcɛ kem ɛfəntərɛ nde kəlɔ kem, ɔfətam kəkət, kə pəcuy pəpəŋ peyi kə.»

⁷ Kə Yesu oloku kə: «Indekə ndaram kətaməs kə.»

⁸ Kə wəbɛ k'asədar oloku Yesu: «Mariki, isətə fɛ dofum dəfaynən'am nde kəlɔ kem disrɛ, mba məloku toloku tin gbəcərəm, wəbəcɛ kem pətamɛ.

⁹ Bawo ina yati kətam ka abɛ em k'iyi dəntəf, k'iyə sə asədar aŋɛ ŋayi kətam ka ina sə dəntəf mə. K'iloku wəkin: «Məkə,» wəkayi ŋkə. K'iloku wəkə: «Məder,» wəkayi ender. K'iloku wəcər kem: «Məyɔ ntɛ-ɛ,» ŋɲə ti.»

¹⁰ Ntɛ Yesu ɛncɛŋkɛl moloku mɔn mɔ, kɔ teta wəsɔdar nwɛ tenciyanɛ kɔ, k'oloku akɔ ŋanacɛmɛ kɔ darɛŋ mɔ: «Iclokɔ nu kance: Inɛŋkɛ fɛ fum o fum aYisrayel daco kɛlan pɛmɔ kanɛ!»

¹¹ Iloku nu: Afum alarɛm ŋandedɛr kɛyɛfɛ kɛca nkɛ dec dɛmpɛ kɔ nkɛ dɛŋkalɛ mɔ, ŋandɛ dɛmɛsa ndɛ dɛbɛ da dɛKɔm dɛntɔf kɔ Abraham, Siyaka kɔ Yakuba.

¹² Mba afum aŋɛ pɛnamar ŋalɛk kɛ ka di mɔ, andɛlɛm ŋa dɛkubump. Difɔ kɛbok kɔ kɛŋaŋɛrɛnɛ sɛk kɛndɛkɔyi.»

¹³ Kɔ Yesu oloku wəsɔdar wɛkakɔ: «Mɛlukus ndɛ ndaram, tɔkɔ mɛŋgbɛkɛr kɛlan mɔ tɛdɛr ɛm.» Tɛm tatɔkɔ yati tɔ wɛbɛcɛ kɔn ɛnatamɛ.

Yesu ɛntamɛs acuy alarɛm

Mark 1.29-34; Luk 4.38-41

¹⁴ Kɔ Yesu ɔŋkɔ nda Piyɛr, k'ɔŋkɔ pɛnɛŋk iya ka wɛran ka Piyɛr pɛfɛntɔrɛ ta ɛntamɛnɛ-ɛ. Fiba fɛnayi kɔ.

¹⁵ Kɔ Yesu ɔŋgbuŋɛnɛ kɔ kɛca, kɔ fiba fɛsak kɔ, kɔ wɛran nwɛ ɛyɛfɛ, k'osumpɛr kɛbɛcɛ Yesu.

¹⁶ Dɔfɔy dɛndɛbɛp, k'aŋkɛrɛ Yesu afum alarɛm aŋɛ yɔŋk yɛlɛc yɔnɛtɔrɛs mɔ. Kɔ Yesu ɛmbɛlsɛ moloku mɔn yɔŋk yɛlɛc, k'ɛntamɛs acuy fɛp.

¹⁷ Tatɔkɔ tɔ mɛs mɛnalɛrɛ, mɛmɛ Sayibɛ Esayi ɛnaloku mɔ: «ɛnalɛŋ tɔkɔ tɔnɛtɔrɛs su mɔ, k'ɛsarɛ docu dosu.»

Aŋɛ ŋafan kɛcɛmɛ Yesu darɛŋ mɔ

Luk 9.57-60

¹⁸ Ntɛ Yesu ɛnɛŋk kɛnay kɛkɛl kɔ mɔ, k'osom acɛpsɛ ɔn darɛŋ a ŋacali kɔ nkɔn ntɛndɛ mokuru ma kɛba kanɛkɔ.

19 Kɔ wətəksɛ sariyɛ sa aSuyif ɔlətərnɛ Yesu, k'oloku kɔ: «Wətəksɛ, ifaŋ kəyɔnɛ wəcepɛ kam, indecəm'am darəŋ nnɔ o nnɔ mändekɔ mɔ.»

20 Kɔ Yesu oloku kɔ: «Məsəŋk məyɔ bi dəkədirɛ kɔ bəmp yɔyɔ wɔlə dəkədirɛ. Mba ina Wan ka Wərkun, iyɔ fɛ kəfo nkɛ intam kəboc domp dem mɔ.»

21 Kɔ fum wələma acɛpsɛ ɔn darəŋ dacɔ oloku kɔ: «Mariki, məwos'em kərəsna kəkɔ, ikɔ iwup papa kem.»

22 Kɔ Yesu oloku kɔ: «Məcəps'em darəŋ, məce afi ŋawup afi aŋan.»

Yesu ontore-tore afef

Mark 4.35-41; Luk 8.23-25

23 Kɔ Yesu embəkɛ debil kɔ acɛpsɛ ɔn darəŋ.

24 Pəwon fɛ kɔ afef ŋəpəŋ ŋeyɛfɛ kəwur dəkəba. Ntɛ yam yeyi kəgbəpərɛ abil mɔ, Yesu pəcdirɛ.

25 Kɔ acɛpsɛ ɔn darəŋ ŋalətərnɛ, kɔ ŋantimi kɔ ŋacloku: «Mariki, məyac su! Kəfi kɔ sənder!»

26 Kɔ Yesu eyif ŋa: «Ta ake tɔ nəŋnesɛnɛ-ɛ? Nəyɔ fɛ kələŋ kəpəŋ!» Kɔ Yesu eyɛfɛ k'ɛŋgbəŋ-gbəŋər afef kɔ kəba, kɔ pəyɔ yɛŋ.

27 Kɔ cusu cəwos acɛpsɛ ɔn darəŋ, kɔ ŋaloku: «Ake wərkun ɔfo wəkawɛ-ɛ, ntɛ afef kɔ domun yɛncəmɛ tɛfaŋ tən darəŋ mɔ?»

Yesu entaməs arkun mɛrəŋ aŋɛ yəŋk yɛlɛc yɛnayi mɔ

Mark 5.1-20; Luk 8.26-39

28 Ntɛ Yesu ɛncali mokuru ntende atɔf ŋa Kadara mɔ, kɔ afum mɛrəŋ ŋawur nde cufu dacɔ, kɔ ŋander ŋacəmɛ kɔ fɔr kirin. Afum akanɛ yəŋk yɛlɛc yɛnayi ŋa, ŋanayɔ wɛywey, ali fum ɛnctam fɛ kəcəpər dəpɔ dadəkɔ.

²⁹ Awa kɔ ɲayɛfɛ kɛkulɛ-kulɛ: «Wan ka Kanu, ake mɛfaɲɛr su-ɛ? Mɛnder nnɔ kɛdetɔrɛs su a tɛm tɛɕbɛp ba?»

³⁰ Awa, ɲanabɔlɛnɛ fɛ kɔ sɔp yɛlarɛm nyɛ yɔncsɔmɛt mɔ.

³¹ Kɔ yɔɲk yɛlɛɕ yɛlɛtsɛnɛ Yesu, yocloku: «Kɔ mɛfaɲ kɛbɛlɛs su-ɛ, mɛkɛkɛrɛ su dɛsɔp yɛlarɛm yayɛ!»

³² Kɔ Yesu oloku: «Nɛkɔ dɛndɔ!» Kɔ yɔɲk yɛlɛɕ yowur afum akanɛ kɔ yɔɲkɔ yɛbɛrɛ dɛsɔp. Gbɛncana babɔkɔ kɔ sɔp yayɛ yɛyɛfɛ tɔrɔ kɛrɔɲ kɔ yontɔr dɛkɛba, kɔ yɛɲgbɛtsɛ, kɔ yɛfis-fis fɛp dɛromun.

³³ Kɔ akɛk a sɔp yayɔkɔ ɲayɛksɛ kɛkɔ dare. Kɔ ɲalɔm tɔkɔ tɛnacɛpɛr mɔ fɛp kɔ tɔkɔ tɔsɔtɔ afum mɛrɛɲ akakɔ yɔɲk yɛlɛɕ yɛnayi mɔ.

³⁴ Awa, kɔ aka dare fɛp ɲawur kɛkɔnɔɲk Yesu. Ntɛ ɲambɛp kɔ mɔ, kɔ ɲalɛtsɛnɛ Yesu a pɛbɔlɛ atɔf ɲaɲan.

9

*Yesu entamɛs wɛrkun nwɛ ɛnafi wɛɕɛk mɔ
Mark 2.3-12; Luk 5.18-26*

¹ Kɔ Yesu ɛmbɛkɛ debil, k'ɛncali kɛba k'ɔɲkɔ dare dɔn.

² Gbɛncana babɔkɔ kɔ afum ɲaɲkɛrɛ Yesu wɛrkun nwɛ ɛnafi wɛɕɛk pɛfɛntɔrɛ dɛpɔko mɔ. Ntɛ Yesu ɛncɛrɛ a kɛlaɲ kɛɲan kɛmbɛk mɔ, k'oloku wɛfi wɛɕɛk: «Wɛnc im, mɛbɛknɛ! Aɲaɲɲɛn'am kiciya kam.»

³ Awa kɔ atɛksɛ sariyɛ s'aSuyif alɔma ɲayɛfɛ kɛɕɛm-ɕɛmɲɛ dɛbɛkɛɕ: «Fum wɛkawɛ, Kanu k'ɛyi kɛlɔmɛs!»

⁴ Nte Yesu encære mɛcɛm-cɛmnɛ maɲan mɔ, k'eyif ɲa: «T'ake tɔ nɛncɛm-cɛmnɛnɛ pələc dəbəkəc yonu-ɛ?

⁵ Mosom mɛrəɲ mɔ mame: «Aɲaɲnɛn'am kiciya,» kɔ «Məyɛfɛ, məkət,» tosom tere tətɔcuca kəloku-ɛ?

⁶ Awa, indeyɔ nu tantɛ nte tɔɲsɔɲɛ nəcərə a ina, Wan ka Wərkun, intɔmpər kətam kəɲaɲnɛnɛ kiciya nnɔ doru dandɛ.» Kɔ Yesu oloku wəfi wɛcək: «Məyɛfɛ mələk poko pam məkɔ nde ndaram!»

⁷ Kɔ wərkun nwe ɛyɛfɛ k'ɔɲkɔ ndərən.

⁸ Nte kənay k'afum kənəɲk ti mɔ, kɔ cusu cəwos ɲa pəpəɲ, kɔ ɲaɲkor-koru Kanu nkɛ kəsəɲ afum kətam kaɲkɛ mɔ.

Yesu ewe Matiye

Mark 2.13-17; Luk 5.27-32

⁹ Kɔ Yesu osumpur dɔpɔ kəkɔ, k'ɛnəɲk wərkun wəlɔma pacwe kɔ Matiye pəndɛ aɲgbancan ɲa abanəs dut. Kɔ Yesu oloku kɔ: «Məcəps'em darəɲ!» Kɔ Matiye ɛyɛfɛ k'ɛncɛpsɛ Yesu darəɲ.

¹⁰ Dɔsək dɔlɔma, Yesu kɔ acɛpsɛ ɔn darəɲ ɲaɲkɔ ɲadi yeri nda Matiye. Awa, k'abanəs dut alarəm kɔ aciya ɲander ɲadi yeri kɔ Yesu.

¹¹ Nte aFarisi ɲanəɲk tatəkɔ mɔ, kɔ ɲayif acɛpsɛ darəɲ a Yesu: «Ta ake tɔ wətəkse konu eyi kədinɛ yeri kɔ abanəs dut kɔ aciya-ɛ?

¹² Kɔ Yesu ene ɲa sim, k'oloku: «Pəmar fɛ atamɛ ɲafan wəɛn cɔl, mba acuy ɲɔ pəmar a ɲafan kɔ.

¹³ Nəkɔ nətəkəs təkɔ moloku ma Kanu mmɛ mementər mɔ: «Nənəfər d'ifan, bafɔ yolonɛ.» Awa, bafɔ alompu ɲ'inder kəwe, mba aciya.»

*Yesu kə kəsuj**Mark 2.18-22; Luk 5.33-39*

¹⁴ Kə acəpsə a Saŋ Batis darəŋ ɲalətərne Yesu kə ɲayif kə: «T'ake tə acəpsə am darəŋ ɲantəsujə, mba səna kə aFarisi səcsuj pəlarəm-ε?»

¹⁵ Kə Yesu eyif ɲa: «Pəmar afum aŋε awe kəgbanne mə, ɲaməncne kə ɲasəɾəyi kə wəfura ba? Mba dəsək dendeɓəp nte andelin wəfura mə. Awa, ɲandesuj dəsək dadəkə.

¹⁶ Ali fum əfəfapəre kəloto kəfu yamos yeməcə-məcə. Kə teyi-ε, kəloto kəfu kəɲwali yamos yeməcə-məcə, təsəŋe pəwali pa kəloto kəkur pəɓək petas pəwale pəcəkə-cəkə.

¹⁷ Ali fum əfəɓer wən wofu dətələba pa akata pokur, kə teyi-ε, wən wəɲwəsəli tələba, woləŋe dəntəf, tələba pələcə. Mba wən wofu, dətələba tofu t'ambər wi. Ti disre, wən kə tələba yəɲyi belbel.»

*Yesu entaməs wəran, k'eyekti wəyecəra wəfi**Mark 5.21-43; Luk 8.40-56*

¹⁸ Nte Yesu eyi kəloku ɲa moloku mame mə, kə wəkiriŋ k'aSuyif wələma ender. K'ontontne Yesu fər kiriŋ, k'oloku kə: «Wan kem wəran entəp kəcfi. Mba məkə mədenər kə waca, endefəte.»

¹⁹ Kə Yesu eyefe k'encəme wəkiriŋ nwe darəŋ, kə acəpsə ən darəŋ ɲasol kə ɲa.

²⁰ Gbəncana babəkə kə wəran wələma nwe docu da kəwur mecir dənayi tənəsətə meren wəco kə mərəŋ mə, ender Yesu tadarəŋ, k'əŋgbuŋene doɓol da yamos yən.

²¹ Awa kə wəran nwe olokune dəɓəkəc: «K'ingbuŋene gbəcərəm yamos yən-ε, intamne!»

22 Kɔ Yesu ɛŋkafɔlɛ, k'ɛnɛŋk wɛran nwɛ, k'oloku kɔ: «Mɔbɛknɛ, wan kem! Kɛlan kam kɛntamɛs ɛm.» Gbɛncana babɔkɔ kɔ wɛran nwɛ ɛntamnɛ oŋ.

23 Ntɛ Yesu ender kɛlɔ ka wɛkirin nwɛ mɔ, k'ɛnɛŋk afula luk ya defi kɔ kɛnay ka afum ɲacbok ɲacpɛ ɲactor.

24 Kɔ Yesu oloku ɲa: «Nɔwɔr nde dabanƙa! Wɛyecɛra wɛkawɛ efi fɛ, kɛdirɛ k'ɛndɛ.» Kɔ afum ɲayɛfɛ kɛfani Yesu.

25 Ntɛ awurɛnɛ kɛnay ka afum dabanƙa mɔ, kɔ Yesu ɛmbɛrɛ dukulɔ k'osumpɛr wɛyecɛra kɛca, kɔ wɛkakɔ ɛyɛfɛ.

26 Kɔ tes tatɔkɔ tɛsamsɛr dɔtɔf fɛp.

Yesu ɛntamɛs atɔnɛŋk mɛrɛŋ

Mat 20.29-34

27 Ntɛ Yesu osumpɛr dɔpɔ kɛkɔ mɔ, kɔ atɔnɛŋk mɛrɛŋ ɲancɛmɛ kɔ darɛŋ ɲackulɛ-kulɛ: «Wan ka Dawuda, mɛyɔnɛ su nɔnɔfɔr!»

28 Kɔ Yesu ɛmbɛrɛ kɛlɔ kanƙɔ ɛnayi mɔ disrɛ, k'atɔnɛŋk ɲalɔtɔrɛnɛ kɔ, kɔ Yesu eyif ɲa: «Nɛncɛm-cɛmnɛ a intam kɛtamɛs fɔr yonu ba?» Kɔ atɔnɛŋk ɲalukɛ kɔ: «Ey, Mariki.»

29 Kɔ Yesu oŋgbuɲɛnɛ fɔr yaɲan pɛcloku: «Mes mecepɛr nnɔ nɛyi mɔ, pɛmɔ ntɛ nɛlan mɔ!»

30 Kɔ fɔr yaɲan yoluksɛrɛnɛ sɔ kɛnɛŋk. Kɔ Yesu olok-lokɛr ɲa pɛctin-tin ɲa: «Nɛkɛmbɛrɛnɛ, ta nwɛ o nwɛ pɛcɛrɛ til.»

31 Mba ntɛ akakɔ ɲawur mɔ, kɔ ɲaloku teta Yesu dɔtɔf fɛp.

Yesu ɛntamɛs wɛrkun wɛtɔlok-loku

Luk 11.14-15

³² Akakɔ Yesu enatɛp kɛtamɛs mɔ ɲandewur, gbɛncana babɔkɔ k'anƙɛɛ kɔ wɛtɔlok-loku nwɛ ɲɔɲk ɲɛlɛc ɲɔnctɔrɛs mɔ.

³³ Kɔ Yesu embelɛs ɲɔɲk ɲɛlɛc ɲaɲɔkɔ, kɔ wɛtɔlok-loku eyɛfɛ kɛlok-loku. Kɔ cusu cɛwos kɛnay ka afum pɛpɔɲ, kɔ ɲaloku: «Sɛntanɔɲk fɛ tes pɛmɔ tantɛ atɔf ɲa Yisrayel!»

³⁴ Mba kɔ aFarisi ɲaloku: «Wɛkirin ƙa yɔɲk yɛlɛc ɔsɔɲ kɔ fɛnɔntɔr fɛbelɛsɛ yɔɲk yɛlɛc.»

Yesu ɔyɔnɛ kɛnay k'afum nɔnɔfɔr

Mark 6.6

³⁵ Kɔ Yesu encepɔr-cepɔr sɛdare sɛpɔɲ kɔ sɛfɛt sa dɔtɔf fɛp. Pɛtɛkɛ mofɔ maɲan ma dɛkɔtɔla Kanu d'aSuyif, pɛckawandi Kibaru Kɛtɔt ka dɛbɛ da Kanu, pɛtamɛsɛnɛ sɔ docu kɔ lanɲiru fɛp.

³⁶ Ntɛ Yesu enanɔɲk kɛnay ka afum mɔ, k'ɔyɔnɛ ɲa nɔnɔfɔr. Dis dɔlɔl afum kɔ bɛkɛc yɛlɛcɛ ɲa, ɲanayi dɛpɛcuca pɛmɔ ɲkesiya nyɛ yɔntɔyɔ wɛkɛk mɔ.

³⁷ Awa kɔ Yesu oloku acɛpsɛ ɔn darɔɲ: «Dɛlɛ dɛtɛl dɛmbɛk, mba atɛl ɲampicɛ.

³⁸ Nɛlɛtsɛnɛ Mariki ma kɛtɛl pɛbɛrɛnɛ sɔ atɛl alɔma aɲɛ ɲandɛtɛlɛ kɔ mɔ.»

10

Asom a Yesu aɲɛ wɛcɔ kɔ mɛrɔɲ

Mark 3.16-19; Luk 6.14-16

¹ Kɔ Yesu ewe acɛpsɛ ɔn darɔɲ aɲɛ wɛcɔ kɔ mɛrɔɲ, k'ɔsɔɲ ɲa fɛnɔntɔr fɛtamɛ kɛbelɛs yɔɲk yɛlɛc, kɛtamɛs ka docu kɔ lanɲiru fɛp.

² Mewe ma Asom ɔn wɔco kɔ mɛrɛɲ mɔ mameɛ: wɔcɔkɔ-cɔkɔ Simɔɲ nwɛ aɲwe Piyɛr mɔ, kɔ wɛnc Andɛrɛ, Sak kɔ wɛnc Isan awut a Sebede,

³ Filip, Bartelemy, Tɔma, Matiye wɛbaɲɔs dut, Sak wan ka Alfe, Tade,

⁴ Simɔɲ wɛKananj* kɔ Yudas wɛka dare da Keriyot nwɛ ɛnabɛr Yesu aterɛnɛ ɔn dɔwaca mɔ.

Kɔsom ka acɛpsɛ Yesu aɲɛ wɔco kɔ mɛrɛɲ

Mark 6.7-11; Luk 9.2-5; 10.3-12

⁵ Acɛpsɛ darɛɲ wɔco kɔ mɛrɛɲ aɲɛ ɲɔ Yesu ɛnasom dɔtɔf, k'endenɲɔr ɲa sɔ mosom mmeɛ: «Ta nɛkɔ nda atɔyɔnɛ aSuyif, ta nɛbɛrɛ dare da aSamari.

⁶ Mba nɛkɔ nda aYisrayel aɲɛ ɲayi pɛmɔ ɲkesiya yɔsɔlɛ mɔ.

⁷ Kɔ nɔyi dɔpɔ-ɛ, nɛcdɛɲk: «Dɛbɛ da dɛKɔm dɔlɔtɛrɛ!»

⁸ Nɛtamɔs atɔtamnɛ, nɛtimi afi, nɛtamɔs acunɛ sen, nɛbɛlɔs yɔɲk yɛlɛc. Ampocɛ nu kifɛli, nɛna sɔ nɛpocɛ kifɛli.

⁹ Ta nɛdɛmnɛ kɛma, kɔ pɔyɔnɛ fɛ ti gbɛti, ta nɛbɛr pɛsam dɔyuba.

¹⁰ Ta nɛtɔmpɛr lɔba kɛkɔ marɛnt. Nɛkɛkɛrɛ burumus bin bin gbɔɲ. Ta nɛtɔmpɛrɛnɛ cɔfta, ta nɛtɔmpɛrɛnɛ kɛgbɔ. Ti disrɛ pɛmar wɛbɛc pɛsɔtɔ yɛri yɔn.

¹¹ Kɛbɛrɛ nkɛ o nkɛ kɔ nɛmbɛrɛ dare dɔpɔɲ kɔ pɔyɔnɛ fɛ ti dɛfɛt-ɛ, nɛtɛn fum wɛlɛl nwɛ ɔɲwɔsɛ kɛmɛɲk nu mɔ. Nɔyi nda fum wɛkakɔ haɲ dɔsɔk ndɛ nɔɲyɛfɛ kɛwɜr dare dadɔkɔ nɛsɛmpɛr dɔpɔ donu kɛkɔ mɔ.

* **10:4** Simɔɲ wɛKananj nwɛ Luk pɛwɛ Simɔɲ wɛsaɲka-saɲka.

¹² Kələ nke nəmberə mə, nəkulə: «Kanu kəsən nu pəforu!»

¹³ Kə aka kələ kanke nəwosə kəban nu belbel-ε, kətolanə konu kənsən nə pəforu! Mba kə nəntəwosə kəban nu-ε, kətolanə konu ka pəforu kanke kənluksərnə nu!

¹⁴ K'afati kəban nu waca mərən, ta awosə kəcənkəl moloku monu kələ kələma, kə pəyəne fə ti dare dələma-ε, nəyəfə kəfo kanke, nəckən-kən kəfəl nke wəcək wonu wələk mə, ti tendeyənə aka dare dadəkə sede a nənaban fə nu.

¹⁵ İloku nu kance: Dəsək ndə Kanu kəndekiti afum fəp mə, Kanu kənayən kə abəkək nno afum aləc a təf ya Sodom kə Komora nəyi mə pəmə ntə kəndeyən kər aka dare dadəkə abəkək mə.»

Mətarəs mme meyi kəder mə

Mark 13.9-13; Luk 12.11-12; 21.12-19

¹⁶ «Nəcənkəl! İsom nu, mba nənkəyi pəmə ntə nəkesiya yən yi calma dəcə mə. Awa, nəkəmbərnə pəmə bok, nəyəne atələsər mes pəmə ntantoriya.

¹⁷ Nəkəmbərnə afum nəndekəkəkəre nu aboc kiti fər kirin dənkiti. Nəndəkəsute nu cəngban-gban ndə dəkətola Kanu dənən.

¹⁸ Nəndekəkəkəre nu nda akirin a sədare səpən kə abə a təf fər kirin teta ina. Nən'endəkəyən'em sede fər yənən kirin kə ya atəyəne aSuyif.

¹⁹ K'andekəkəkəre nu fər ya aboc kiti kirin-ε, ta nədekə nəccəm-cəmnə pələrəm nəcyifnə: «Cəke cə sənkəlok-loku, kə moloku mere mə sənkəloku-ε?» Ey, təm tatəkə, Kanu kəndəkəsən nu təkə pəmar nəloku mə.

²⁰ Ti disrə bafə nən'endəkəlok-loku, mba Amera nə Papa konu Kanu nəndəkəlok-lokə nu.

²¹ Wenc endekəsəŋ wenc padif. Tatəkə tə kas kəndekəsəyə wan kən. Awut ɲandekəcəmə akombəra aŋan dəbəkəc, ɲasəŋ ɲa padif.

²² Fəp fəndeter nu teta tewe tem. Mba nwɛ endebəkɲɛ ti haŋ mes maməkə melip mə, Kanu kəndeyac kə.

²³ K'andekə pactərəs nu dare dadəkə-ɛ, nəcepe nəkə dare dələma. Icloku nu kance kə: Kə Wan ka Wərkun endeder-ɛ, tendetəŋɲɛ ta nəntalip kəkət sədare sa Yisrayel fəp-ɛ.

²⁴ Wəcepsɛ darəŋ ɔfəbək dəkəcəmə pətəs wətəkse kən. Wəcar ɔfəyə dəkəcəmə dəpəŋ pətəs mariki mən.

²⁵ Ntɛ tentesɛ mə, pəmar wəcepsɛ darəŋ pəyi pəmə wətəkse kən, wəcar pəyi pəmə mariki mən. K'aloku wəkiriŋ ka kələ: «Sentani Belsebul bə məyənɛ-ɛ,» aləmsɛnɛ sə aka kələ kən disrɛ haŋ pacepərər.»

Nwɛ pəmar panesɛ mə

²⁶ «Ti disrɛ ta nənesɛ afum! Ntɛ o ntɛ tɛmɛŋkɲɛ mə andenəŋk ti, kə ntɛ təŋgbəpnɛ mə, andecərə ti.

²⁷ Ntɛ iŋloku nu kubump mə, nəgbəkərə ti kələku daŋ peŋ. Ntɛ imɛŋkəs nu dələŋəs mə, nədəŋk ti pəpəŋ mofo mɛbəpsɛnɛ.

²⁸ Ta nənesɛ afum aŋɛ ɲandif dis gbəcərəm, ta ɲantam kədif kəyi wəyɛŋ nkɛ kəyi nu mə. Mba nwɛ pəmar nənesɛ mə, nkən ɔyənɛ Kanu nkɛ kəntam kədif nu kədifɛnɛ sə afəkəl nde yahanama mə.

²⁹ Ali pacaməs gbaŋa mɛrəŋ fərəŋk fin, tɔfəsəŋɛ agbaŋa ɲaŋəkə ɲin ɲɛtempɛnɛ dəntɔf ta Papa konu ɛncərə ti-ɛ.

³⁰ Mba nəna, ali dəlay da cəfon ca domp donu Kanu kəncərə di fəp.

³¹ Awa, ta nānesε! Nnō Kanu kāyi mō nāyō dākēcāmε ndε dēmbek dėtas da gbāṇa yayōkō mō!»

Māna nwε māncārε Yesu mō, endekēcār'am fōr ya Kanu kirin

Luk 12.8-9

³² «Kō fum nwε o nwε oloku afum fōr kirin: «Incārε Yesu, nkōn oy'em»-ε, ina Yesu indekōwosε teta fum wākayi ndena Papa kem nwε eyi nde dākōm mō.

³³ Mba kō fum oloku afum fōr kirin: «Incārε fε Yesu, bafō nkōn oy'em»-ε, ina Yesu sō ifōdekēcārε kō ndena Papa kem nwε eyi nde dākōm mō.»

Bafō pāforu p'in̄kerε nu, mba kāsutεnε kō kāgbeyεnε
Luk 12.51-53

³⁴ «Ta nēcēm-cēmne a pāforu p'in̄kerε kāsōṇ doru, bafō pāforu p'in̄kerε mba kāsutεnε.

³⁵ Bawo inder kāgbey kas kō wan kōn wārkun, wan wāran kō kērε, wansō kō kōncāra kōn.

³⁶ Afum a kālō kōn disrε yati ṇandeyōnε aterεnε ṇn.

³⁷ Nwε ɔmbōtār kas kō kērε pētās ina Yesu mō, oyō fε dākēcāmε kāyōnε wēcεpsε kem darēṇ. Nwε ɔmbōtār wan kōn wārkun kō pāyōnε fε ti wan kōn wāran pētās ina Yesu mō, oyō fε dākēcāmε kāyōnε wēcεpsε kem darēṇ.

³⁸ Kō māna nwε mātōwosε kōtōrās kō kōfi teta kēcεpsε kem darēṇ mō, māfōyō dākēcāmε kāyōnε wēcεpsε kem.

³⁹ Māna nwε māndetēn kāyac kiyi kam doru mō, kāndesalpār ɔm. Māna nwε kiyi kam doru kāṇsalpār ɔm teta ina Yesu mō, māndesōtō ki.»

*Yesu emban nwe o nwe emban acepse on darəŋ mə
Mark 9.37,41; Luk 9.48; 10.16; Isaŋ 13.20*

⁴⁰ Nnə o nnə nəŋkə kədəŋk Kibaru kətət paban nu mə, ina Yesu amban. Fum nwe emban im mə, emban sə nwe osom im mə.

⁴¹ Kə fum emban sayibə bawo sayibə sə-ε, wəkayi endesəto kəway nkε aŋsəŋ sayibə mə. Kə fum emban fum wəlompu teta dolompu dən-ε, kəway ka wəlompu k'əŋkəsəto.

⁴² Icloku nu ti kance kə: Kə fum əsəŋ nwe efεte dəkəcəmə acepse em daco domun dεcəŋk təmbəl katin teta kəyənε kəŋan acepse em darəŋ mə, əfədekəbut kəsəto kəway kən kətət.

11

Asom a Aŋnabi Saŋ Batis

Luk 7.18-35

¹ Ntε Yesu elip kəsom tosom tatəko acepse on darəŋ wəco kə mεrəŋ mə, k'əŋkə pəctəksε pəckawandi sədare səŋan.

² Ntε Aŋnabi Saŋ Batis εnayi dəbili mə, k'ene pacloku teta Krist kə yεbəc nyε əncyə mə. Kə Saŋ osom acepse on darəŋ aləma nnə Krist eyi mə,

³ kəkəyif Yesu: «Mən'əyənε nwe eyi kəder kədəyac afum a Kanu mə, kə təyənε fε mənə-ε, ka pəmar səkar sə wələma ba?»

⁴ Kə Yesu olukse ŋa: «Nəko nəloku Saŋ təkə nəne kə təkə nənəŋk mə:

⁵ Atənəŋk ŋanəŋk, atətam kəkət ŋəŋkət, k'asəkəs acunε sen, atəne ŋane, afi ŋafəte, aŋkawandi Kibaru Kətət nnə atəyə daka ŋayi mə.*

* 11:5

⁶ Pəbət nwε ɔntədesak kəgbəkər im kəlanj kən mə!»

⁷ Nte acεpse a Sanj darənj ɲayefe kəlukuś mɔ, kɔ Yesu eyefe kəluku kənay ka afum teta Sanj pəcyif: «Ake nənako kəməmən nde dətəgbərə-ε: Fum nwε efane pəmɔ awo ɲɛ afef ɲeyikəc mɔ ba?

⁸ Anɔ nənako kəməmən: Wərkun wəsəkəp ba? Mba nəcərə a aɲe ɲaɲsəkəp belbel mɔ, dəwɔlɔ wa abε wɔ ɲayi!

⁹ Mba anɔ nənako oɲ kəməmən-ε: Sayibε ba? Ey, icloku nu, Sanj encepər sayibε fəp dəkəcəmε.

¹⁰ Tetən t'ancicəs nde Yecicəs Yosoku disre: «Məcəɲkəl: Indekekərə wəsom kem fər yam kirin, pəkɔlomp's'am dɔpɔ.»

¹¹ Kance icloku nu: Afum aɲe aran ɲaɲkom mɔ dacɔ, ali fum ɔyɔ fε dəkəcəmε pətəs Sanj Batis. Mba wəkɔ efete dəbe da dəKɔm mɔ, ɔyɔ dəkəcəmε pətəs kɔ.

¹² Kəyefe dəsək da Sanj Batis haɲ ndəkəl, dəbe da dəKɔm kədəktər disre deyɪ, adəktər a di ɲayi kəten kəbaɲ di.

¹³ Bawo sariye sa Musa kɔ Sayibε fəp ɲanadəɲk təkɔ tendeder mɔ haɲ tɛm ta Sanj,

¹⁴ kɔ nəwose kance ka ti-ε, Sanj ɔyɔnε Aɲnabi Eli nwε pənamar kəder mɔ.

¹⁵ Məna nwε mənɲɔ ləɲəs mɔ, mənε ti!

¹⁶ An'indetubucənε dɛtɛmp dandε-ε? Awa, nənəɲk aɲe ɲaɲwurenε mɔ: Awut aɲe ɲandε kəfo nkε afum ɲambəpsənε mɔ, ɲacwe akɔ mɔ.

¹⁷ ɲacloku: «Səfulanε nu luk, kɔ nəntəpise! Kɔ səlɛɲsε nu melenj ma defi, kɔ nəntəbok.»

¹⁸ Bawo Saṇ ender: Pəcsun, ta oṇmun wən-ε, k'aloku: «Ṭyō ṇōṇk ṇēlec!»

¹⁹ Kō ina Wan ka Wərkun inder, icdi yeri icmun wən, awa k'aloku: «Wəcelək iyōne, wəcis, wanapa ka abanəs dut k'aciya!» Mba k'anəṇk nte kəcəre kəkəteṇe mes ka Kanu kəṇyō mō-ε, ancəre a belbel bō kəyi kəyō.»

*Sədare nse səfati kəgbekər kəlan kəṇan Yesu mō
Mat 10.15; Luk 10.12-15*

²⁰ Kō Yesu eyefe kənal pəpəṇ sədare nse anayō mes mēwēy-wēy mələrəm mō, bawo ṇanasəkpər fē bəkəc yēlec yaṇan:

²¹ Pələc pəpəṇ peyi məna dare da Korasin! Pələc pəpəṇ peyi məna dare da Betsayida! Bawo tōcyōne a mes mēwēy-wēy mme Kanu kənayō nnō ndoronu mō, m'anayō aka sədare sa Tir kō Sidəṇ-ε, kō ṇanasəkpər bəkəc pəwōn, ṇacəme pəlompu darəṇ, ṇabərne yamos ya kəbal, ṇaməncne!

²² It'ōsəṇe nte iloku nu, dəsək nde Kanu kəndekiti afum fəp mō pəndeyəṇkər nu pətas aka sədare sa Tir kō Sidəṇ.

²³ Kō nəna aka Kaparnam, nəncəm-cəmnε a an-depənε nu haṇ dəkəm ba? Ala! Andetore nu dəntəf haṇ nde afum afi ṇayi mō. Bawo mes mēwēy-wēy mme anayō ndoronu mō, im'anayō dare da afum alec aSodom-ε, kō dare dadəkō dəsəryi haṇ məkō!

²⁴ It'ōsəṇe, icloku nu: Dəsək nde Kanu kəndekiti afum fəp mō, pəndeyəṇkər nu pətas aka dare da Sodom.»

*Nəder nnō Yesu eyi mō, nəndesəto kəṇesəm
Luk 10.21-22*

²⁵ Təm tatəko tō Yesu enatola Kanu ntē: «Inkor-kor'əm Papa, Mariki ma dəkəm kō dəntəf, bawo məmənkər mes maməko acərə kəkətənē mes kō asoku səbomp, kō məmentər mi afət dəkəcəmə.

²⁶ Ey, Papa, bawo tatəko tō məfan ti.

²⁷ Papa kem əsəŋ im mes fəp, nwε o nwε encərə fε Wan mənε Papa, nwε o nwε encərə fε sō Papa kō pəntəyənε Wan-ε, kō nwε Wan enfan kəmentər kō mō.

²⁸ Nəder nnō iyi mō, nəna aŋε nəntarpənε yesarε yonu mō. Inten fε kətasərne nu, imbət mes. Kəŋesəm k'indəsəŋ nu.

²⁹ Nələk oŋ nəna sō yebəc nyε ifan a nəsumpər mō, nəcəŋkəl metəksε mem, bawo imbət amera, k'indəncε. Ti disrε nəndəsətō kəŋesəm nənasərka.

³⁰ Ey, yebəc nyε ifan a nəsumpər mō yoncuca fε. Pəsarε mpε isarsər nu mō pəfəfərənε.

12

Yesu entəksε afum teta dəsək da kəŋesəm ndε ampuse Mariki mō

¹ Təm təlōma Yesu pəccali dale, dəsək da kəŋesəm ndε ampuse Mariki mō dənayi. Dor dənayo acəpsε ən darəŋ, kō ŋayefε kəcŋosuru səbomp sa mənġbən ŋacsəm.

² Ntε aFarisi ŋanəŋk ti mō, kō ŋaloku Yesu: «Mənəŋk! Acəpsε am darəŋ ŋayi kəyō ntε Sariye səntəwosε dəsək da kəŋesəm ndε ampuse Mariki mō.»

³ Mba kō Yesu eyif ŋa: «Nəŋkaraŋ fε dəYecicəs Yosoku təkō Dawuda kō asol ən ŋanayo ntε dor dənayo ŋa mō ba?

⁴ Nte ɛnabɛɛ kɛlɔ ka Kanu, kɔ ɲasɔm cɛcom nɛɛ analoŋɲɛ Kanu, nɛɛ Sariyɛ sɛnatɔwosɛ nkɔn kɔ asol ɔn kɛsɔm mɛnɛ alonɲɛ gbɛcɛrɛm mɔ?

⁵ Kɔ pɛyɔnɛ fɛ ti nɛŋkaraŋ fɛ sɔ dɛsariyɛ sa Musa, a dɔsɔk da kɛɲɛsɔm ndɛ ampusɛ Mariki mɔ, bafɔ alonɲɛ ɲafɔlɛlɛs sariyɛ sa kɛɲɛsɔm dɛkɛlɔ kɛpɔŋ ka Kanu ba? Mba ti disɛ ɲafɔsarɛ kiciya!

⁶ Icloku nu ti, paka pɔlɔma peyi nnɔ mpɛ dɛkɛcɛmɛ da pi dɛmbɛk dɛtas kɛlɔ kɛpɔŋ ka Kanu mɔ.

⁷ Kanu kɛnaloku dɛYecicɛs Yosoku: «Nɔnɔfɔr d'ifan, bafɔ yolonɲɛ!» Nɛccɛrɛ tatɔkɔ-ɛ, kɔ nɛntɔrɛs fɛ atɔciya.

⁸ Bawo Wan ka Wɛrkun ɔyɔnɛ mariki ma dɔsɔk da kɛɲɛsɔm ndɛ ampusɛ Mariki mɔ.

Yesu ɛntamɛs wɛrkun nwe kɛca kɔn kɛnadɛmtɛr mɔ

Mark 3.1-6; Luk 6.6-11

⁹ Kɔ Yesu ɔŋkɔ ndɛ dɛkɛtola Kanu danɲan dɔlɔma.

¹⁰ Awa wɛrkun wɛlɔma ɛnayi dɛndo pɛdɛmtɛr kɛca. Kɔ aFarisi ɲayif Yesu: «Aɲwosɛ fum kɛtamɛs dɔsɔk da kɛɲɛsɔm ndɛ ampusɛ Mariki mɔ ba?» Njanayɔ ti nte tɔŋsɔŋɛ ɲayɛmsɛnɛ kɔ mɔ.

¹¹ Kɔ Yesu eyif ɲa: «An'eyi nu daco nwe ɔɲyɔ aɲkesiya ɲin gboŋ, ɲɛtɛmpɛnɛ debi dɔsɔk da kɛɲɛsɔm ta ɛmpɛnɛ ɲi dɔsɔk din dadɔkɔ-ɛ?»

¹² Dɛkɛcɛmɛ da fum dencepɛr da aɲkesiya pɛbɔlɛ! Ti disɛ, Sariyɛ sɛwosɛ kɛyɔ pɛtɔt simiti dɔsɔk da kɛɲɛsɔm.»

¹³ Kɔ Yesu oloku wɛrkun nwe: «Mɛtenci kɛca!» Kɔ wɛrkun nwe ɛtenci kɛca kɔn kɔ kaŋkɔ sɔ kɛntamɲɛ pɛmɔ kaŋkɔ.

14 Ti tenasɔŋe kɔ aFarisi ɲawur dəkətola Kanu danɲan kəkənɲkɛnɛ nte tɔŋsɔŋe ɲatɔŋnɛ tedife ta Yesu mɔ.

Yesu ɔyɔnɛ wəbɔcɛ nwe Kanu kəyɛk-yɛk mɔ

15 Nte Yesu encərə mecemcemnɛ mɛlɛc maɲan mɔ, k'ɛyɛfɛ kəfo kanɲkɔ. Kɔ kənay k'afum kəncəmɛ kɔ darəŋ, k'entaməs acuy fəp.

16 Mba Yesu pəctiŋ-tiŋ ɲa, pəcmɔnɛ ɲa kəloku afum nwe ɔyɔnɛ mɔ.

17 ɛnaloku ti nte tɔŋsɔŋe mes mɛlarɛ, mmɛ sayibɛ Esayi ɛnaloku mɔ:

18 «Kɔ Kanu kəloku:

«Mənəŋk, wəbɔcɛ kem ɔfo wəkawɛ: Nkən iyek-yek, nkən imbɔtər,

nkən, ɔŋsɔŋ im pəbotu fəp.

Indeber kɔ Amera ɲem,

pəde pəcdəŋkər afum a tɔf ya doru fəp dolompu dem.

19 ɲafɔdecɔp kɔ fum, ɔfɔdekulɛ-kulɛ.

Afɔdecəŋkəl dim dən dabanɲka.

20 ɔfɔdetepi awo ɲonutnɛ,

ɔfɔdenim lamp depicɛ pomot.

Tantɛ tendɛ pəcyɔ sɔ haŋ pəsɔŋɛ pəlompu kətam.

21 Afum a tɔf fəp ɲandegbəkər tewɛ tən amera.»

Yesu oluksɛ moloku ma yem məkɔ anaboncɛ kɔ mɔ

Mark 3.22-30; Luk 11.14-23

22 K'anɲkɛrɛ Yesu fum nwe ɲəŋk ɲɛlɛc ɲənɔctərəs ta ɛɲəŋk, ta ɛntam sɔ kəloku-loku mɔ. Kɔ Yesu ɛntaməs kɔ, k'ɛnəŋk k'oloku-loku sɔ.

²³ Nte pānciyanē kēnay k'afum fəp mō, kō ŋaloku: «Bafō Wan ka Dawuda ɔfō, nwe Kanu kəsom kədeyac afum ɔn mō ba?»

²⁴ Nte aFarisi ŋane ti mō, kō ŋaloku: «Wəkirin ka yōŋk yełec Sentani Belsebul, Yesu wəkawē embelse yōŋk yełec!»

²⁵ Nte Yesu encərə pēcemcemne paŋan mō, k'oloku: «Atəf o atəf nŋe ŋeŋyerene ŋisərka mō, dəkələcē ŋōŋkō, tōyōne dare o dare, kələ o kələ disre, ca fəp nyē yeŋyerene yisərka mō, yəfətam kəcəmə.

²⁶ Kō Sentani səmbeləs Sentani-ε, səyerne sisərka. Cəke cō dəbe da si dentam kəcəmə gbīn-ε?

²⁷ Kō tōyōne ina Yesu, Belsebul imbelse yōŋk yełec-ε, afum anu oŋ, an'ō ŋambelse yōŋk yełec-ε? Ti tōsōŋe nte akakō yati ŋandeyōne akiti anu mō.

²⁸ Mba kō tōyōne Amera ŋa Kanu ŋ'ina imbelse yōŋk yełec-ε, awa dəbe da Kanu dender haŋ nno nəyi mō.

²⁹ Cəke cō fum entam kəberē kələ ka wəka səkət disre, pəwetəs daka dōn fəp, ta onuŋkene pəsekət kəresna wəka səkət wəkakō-ε? K'elip kəsekət kō-ε a pədefonət daka da kələ kōn.

³⁰ Nwe ɔntōyi kō ina mō, enter im, mba nwe ɔntolonkan'em mō, esamsər'em.

³¹ It'əsōŋe nte iloku nu, kiciya kō kələməs fəp andekəŋaŋnene yi afum, mba afədekəŋaŋnene kələməs ka Amera ŋa Kanu.

³² Məna nwe o nwe mənloku pələc pa Wan ka Wərkun mō, andekəŋaŋnen'am ti, mba nwe o nwe onloku pələc pa Amera Necempi mō, afəŋaŋnene kō ti kəyefe nno doru dandē haŋ doru ndē dendeder mō.»

*Kətək kə yokom ya ki**Mat 7.16-20; Luk 6.43-45*

³³ Kə Yesu endənər sə moloku mmε: «Kə kətək kəntesε-ε, yokom ya ki yentesε. Kə kətək kəntətamnε-ε, yokom ya ki yəfətesε. Yokom ya kətək y'añnepələ ki.

³⁴ Nəna Nkisin! Cəke cə nəntam kəcərə kəloku moloku mətət ta nəna nəntesε-ε? Bawo nte tənlas abəkəc mə, tə kusu kənloku.

³⁵ Fum wətət, dəabəkəc nən nətət ənlek mes mətət məkə meyi kə mə. Fum wələc, dəabəkəc nən nələc ənlek mes mələc məkə meyi kə mə.

³⁶ Icloku nu ti: Dəsək ndε andekiti afum fəp mə, nandələmər Kanu moloku manjan mələc fəp mmε məntəyə dəkəcəmə mə.

³⁷ Bawo moloku mam mendesəñε Kanu kələm əm wəlompu, kə pəyənε fε ti-ε, pətərəs əm.»

*Kəwer ka təgbəkərə təwəy-wəy ta dəKəm**Mark 8.11-12; Luk 11.29-32*

³⁸ Atəksε sariyε sa aSuyif kə aFarisi nəloku Yesu: «Wətəksε, səfan kənəjk təgbəkərə təwəy-wəy tam tin nte tementər a Kanu kəsom əm mə.»

³⁹ Kə Yesu oloku nı: «Dətemp dələc dətəcəmə danapa da Kanu darəñ nıyı kəten təgbəkərə təwəy-wəy nte tementər a Kanu kəsom im mə. Afəsəmentər nı təgbəkərə nte o nte kə pəntəyənε ta sayibε Yunusa-ε.

⁴⁰ Ey, Yunusa ənıyı mata maas dan kə pibi kor ka alop nənən disrε. Ti tə pəndeyi Wan ka Wərkun sə, endeyi mata maas dan kə pibi antəf disrε.

⁴¹ Aka Niniwe nandeyεfε dəsək ndε Kanu kəndeboc kiti ka afum fəp mə, nıabonε afum a

dεtemp dandε kεtsεkpεr bεkεc, bawo kawandi ka Yunusa kεnasεŋε aka Niniwe kεsεkpεr bεkεc yaŋan yeλεc kε ŋalomp. Awa fum eyi nu dacε nwe εntas Yunusa dεkεcεmε mε.

⁴² Wεbera ka atεf nŋε ŋeyi Yisrayel kεca kεtεt mε, endetime dεsεk da kiti kε dεtemp dandε, pεboncε di kεtεwosε kεcεŋkεl kεcεre kεkεtεnε mes kεtεt, bawo pεbεle p'εnayεfε kεdecεŋkεl kεcεre kεkεtεnε mes kεtεt ka Sulemani*. Awa fum eyi dε nwe εntas Sulemani dεkεcεmε mε.»

Kεlukus ka ŋεŋk ŋελεc

Luk 11.24-26

⁴³ «Nte ŋεŋk ŋελεc ŋεŋkε ŋowur fum nwe dεris mε, ŋεcyara-yara mofε mowosu, ŋεcten dεkεŋεsεm, mba ŋεnasεtε fε.

⁴⁴ Kε ŋolokunε: <Iluksεrne nde kεlε kem, nkε inawur disre mε.> Nte ŋolukus mε, kε ŋεmbεp kεlε fos, pafεŋ ki palompεs ki belbel.

⁴⁵ Kε ŋolukus kεkεtεn yεŋk yeλεc camεt-mεrεŋ nyε yεnanŋkanε kελεcε yεtas ŋi mε. Kε yεmbεre kεlε disre kε yendε. Nte tencepεr mε, kε pελεc pεnanŋkanε fum nwe pεtas tεkε pεnayi kε tεcεkε-cεkε mε! Ti tendesεtε afum a dεtemp dελεc dεmεkε dandε!»

Iya kε awεnc a Yesu

Mark 3.31-35; Luk 8.19-21

⁴⁶ Nte Yesu onclok-lokεr afum mε, awa kε kεre k'awεnc aŋa ŋacεmε dabanŋka, ŋacfaŋ kεlok-lokεr kε.

⁴⁷ Kε fum wεlεma oloku Yesu: «Mεcεŋkεl, wiri kε awεnc εm aŋa ŋancεmε nde dabanŋka, ŋafaŋ kεlok-lokεr εm.»

* **12:42** Mεmεmεn 1 Abε 10.1-10

⁴⁸ Mba kɔ Yesu oloku fum wɛkakɔ ɛnaloku kɔ toloku tatɔkɔ mɔ: «An'ɔyɔnɛ iya kem-ɛ? Are nɔyɔnɛ awɛnc im aɲa-ɛ?»

⁴⁹ Kɔ Yesu entenci kɛca nnɔ aɛɛpɛ ɔn darɔɲ nɔyi mɔ, k'oloku: «Nɛnɔɲk: Iya kem kɔ awɛnc im aɲa nɔ akanɛ!

⁵⁰ Nwɛ o nwɛ ɔɲyɔ tɛfaɲ ta Kanu Papa kem nwɛ eyi nde dɛKɔm mɔ, wɛkakɔ ɔyɔnɛ wɛnc im, wɛkirɛ kɔ iya kem.»

13

Totubɛnɛ ta wɛgbal defet

Mark 4.1-9; Luk 8.4-8

¹ Dɔsɔk dadɔkɔ kɔ Yesu owur dɛkɛlɔ k'ɔɲkɔ pɛndɛ agbɛɲ nɔ kɛba.

² Kɔ kɛnay ka afum alarɛm nɔɲkɔ nɔlɔɲkanɛ kɔ kɛsɛk, kɔ tɔsɔɲɛ kɔ kɛbɛkɛ debil k'ɛndɛ. Kɔ kɛnay ka afum fɛp kɛncɛmɛ agbɛɲ nɔ kɛba.

³ Kɔ Yesu olok-lokɛr nɔ pɛlarɛm dɛmotubɛnɛ, k'oloku nɔ: «Nɛɛɲkɛl: Wɛbɔf ɛnawur kɛkɔgbal defet.

⁴ Ntɛ ɛncɛgbal defet mɔ, kɔ mɛɲgbɛn mɔlɔma mɛntɛmpɛnɛ dɔpɔ. Kɔ bɛmp yɛndɛr yɔsɔm mi.

⁵ Kɔ mɛɲgbɛn mɔlɔma mɛntɛmpɛnɛ antɔf nɔ masar nde kɛbɔf kɛlarɛm kɛnatɔyi mɔ. Ntɛ antɔf nɛnadɛm mɔ, kɔ mɛɲgbɛn mompon kɛtɛna.

⁶ Mba ntɛ nne yɛnadɛwɔnɛ mɔ, kɔ yɛncɔf buma yayɔkɔ, kɔ yowosɛrɛnɛ, bawo yɛnayɔ fɛ ncɔnc.

⁷ Kɔ mɛɲgbɛn mɔlɔma mɛntɛmpɛnɛ dɛbɛɲk, kɔ mompon, mba kɔ bɛɲk yɛmpɛ kɔ yɛndi mi.

⁸ Kɔ mɛɲgbɛn mɔlɔma mɛntɛmpɛnɛ antɔf nɔtɔt, kɔ mompon kɔ mɛlɛpsɛr kɛkom yokom nyɛ tasar

tin (100), yəko wəco camət-tin (60), ko yələma wəco maas (30).

⁹ Məna nwe mənyə ləyə mə, mənə ti.»

Ta ake tə Yesu enctəksə dəmotubcənə-ə?

¹⁰ Ko acəpsə a Yesu darəy nander nəyif ko: «Ta ake tə mənlək-lokərə nə dəmotubcənə-ə?»

¹¹ Ko Yesu olukse nə nte: «Bawo Kanu kəsəy nənə kəcərə kance kəgbəpne ka dəbə da dəKəm, mba nə, asəy fə nə ki.

¹² Ti disre, nwe ənyə kəcərə ka təgbəpne ta dəbə da dəKəm mə ambərəne ko, hañ pəlar ko, mba nwe əntəy mə, andəbanər ko ali pəko əy mə.

¹³ Ti təsəy nte ilək-lokərə nə dəmotubcənə mə, bawo nəygbətne belbel mba nəfənək, ko nəncəkəl belbel mba nəfəne, nəfəcərə sə.

¹⁴ Nte Kanu kənalokə kusu ka sayibə Esayi tetəyən mə telərə:

«Nəndewon kəcəkəl mba nəfədecərə few.

Nəndewon kəgbətne mba nəfədenək few,

¹⁵ bawo səbomp sa afum akanə səfətam kəcərə.

Nəsunc ləyə yəyən,

ko nəmər fər

ntə təsəy ta nənəkə yi,

ta nənə ləyə yəyən,

ta bəkək yəyən yəsəy nə kəcərə,

nədəkəfəle, nəlüksərne nno iyi mə,

təsəy itaməs nə!»

¹⁶ Mba pəmbət nu, bawo fər yonu yənək ko ləyə yonu yənək!

¹⁷ Kance, icloku nu: Sayibə səlarəm ko alompu alarəm nənafən kənək məmə nəyi kənək mə, mba

ɲananəŋk fɛ mi. Kɔ ɲanafaŋ kəne mame ɲayi kəne mɔ, mba ɲanane fɛ mi.

Kətəkse dətotubcɛnɛ ta wəbɔf

Mark 4.13-20; Luk 18.11-15

¹⁸ Awa nəcəŋkəl tedisɛ ta totubcɛnɛ ta wəgbal defet.

¹⁹ Mɛŋgbɛn məkɔ mənatempɛnɛ dɔpɔ meyi pəmɔ fum nwe ɛɲne toloku ta dɛbɛ da dəkɔm ta tɔsəkər kɔ mɔ. Wələc pader pələk təkɔ anabɔf abəkəc ɲən mɔ. It'ɔyɔnɛ nwe ɛnasɔtɔ mɛŋgbɛn dɔpɔ daco mɔ.

²⁰ Mɛŋgbɛn mme mənatempɛnɛ kəfo ka masar mɔ meyi pəmɔ fum nwe ɔnckənane Toloku ta Kanu pəbaŋ ti katəna pəbotu disɛ mɔ,

²¹ mba wəkayi eyi pəmɔ pəbɔf pətɔyɔ ncənc: Kəcəmə kən kəfɔwɔn, pəcuca kɔ kətərəs kənckənader teta Toloku tatəkɔ, tɔŋsɔŋɛ kɔ kəsak ti fɛw.

²² Mɛŋgbɛn mme anabɔf dɛbɛŋk mɔ meyi pəmɔ fum nwe ɛɲne Toloku ta Kanu, mba mɛcɛm-cɛmɛ mɛlarəm ma doru kɔ kəten daka, mes maməkɔ mɛrəŋ medi Toloku tatəkɔ, tɔsɔŋɛ ti kətəkom.

²³ Mɛŋgbɛn mme mənatempɛnɛ antɔf ɲətɔt mɔ meyi pəmɔ fum nwe ɛɲne Toloku pəcərə ti, tokom ntɛ tasar tin (100), təkɔ wəco camət-tin (60), kɔ tɔlɔma wəco maas (30).»

Totubcɛnɛ ta defet dətɔt kɔ yika yɛləc

²⁴ Kɔ Yesu oloku ɲa sɔ totubcɛnɛ tɔlɔma: «Dɛbɛ da dəkɔm dowurɛnɛ kɔ wərkun nwe ɔmbɔf defet dətɔt dalɛ dən mɔ.

²⁵ Pibi pɔlɔma afum ɲacdirɛ, kɔ wəter kən ender pəbɔf yika yɛləc dɛbɔlə, k'ɔŋkɔ.

²⁶ Ntɛ yɔbɔf yomponɲ kɔ yokom mɔ, mba yika yɛləc yomponɲ sɔ.

27 Kɔ acar a wɔka dale ɲander ɲaloku kɔ: «Mariki, bafɔ mɛɲgbɛn mɔtɔt mɔ mɛnabɔf dale dam ba? Deke yika yɛɛc yɛyɛfɛ yedepon ɲnɔ-ɛ?»

28 Kɔ mariki oloku ɲa: «Wɔter kem wɔlɔma ɔyɔ ti.» Kɔ acar ɲayif kɔ: «Mɔfan a sɔkɔ sɔwas yika yɛɛc yayɔkɔ ba?»

29 Kɔ mariki oloku ɲa: «Ala, inɛse kɔ nɛndewas yika-ɛ, nɛndesɔ kɛgbuktɛnɛ bɔle.

30 Nɔce yika yɛɛc yɛbɛk kɔ bɔle han patɛl, kɔ tɛm ta kɛtɛl tendɛbɔp-ɛ, indeloku atɛl: Nɛnɔɲkɛnɛ kɛrɛsna nɛgbuktu yika yɛɛc nɛsek yi pacɔf, kɔ nɛlip-ɛ, nɛbɛr bɔle kɛɛ kem disrɛ.»

Totubɛnɛ ta tɛɲgbɛn tɛfɛt pa dɔlakɔ

Mark 4.30-32; Luk 13.18-19

31 Kɔ Yesu oloku ɲa totubɛnɛ tin: «Dɛbɛ da dɔKɔm dowurɛnɛ tɛɲgbɛn tɛfɛt mpɛ fum ɛɛk k'ɔmbɔf pi dale dɔn mɔ.

32 Tɛɲgbɛn tatɔkɔ pɛfɛtɛ pɛtas mɛɲgbɛn fɔp, mba nte pompon mɔ, kɔ pɛmbɛk pɛtas yɔbɔf ya dɔlakɔ fɔp, kɔ pende pɔyɔnɛ kɔtɔk, kɔ tɔsɔɲɛ bɛmp ya darenc kɔder yɔlɔ dɔwara wa ki.

Totubɛnɛ ta lebin

Luk 13.20-21

33 Kɔ Yesu ɛntɔkɛ sɔ afum totubɛnɛ tɔlɔma, pɛcloku: «Nte tɔ dɛbɛ da dɔKɔm dowurɛnɛ pɛmɔ lebin ndɛ wɛran ɛɲɛk pɛnɔktɛrɛnɛ di kɛmbefe kilo wɔcɔ mɛrɔɲ (20) mɔ. Kɔ kɛmbefe fɔp kɛmpɛ!»

Ta ake tɔ Yesu onclokɛnɛ motubɛnɛ-ɛ?

Mark 4.33-34

34 Mamɔkɔ fɔp Yesu oncloku mi kɛnay ka afum dɛmotubɛnɛ. Ti disrɛ Yesu oncloku fɛ nte o nte ta oloku totubɛnɛ ta ti-ɛ,

³⁵ nte tɔɲsɔɲe moloku mme sayibe ɲanaloku ma melare:

«Motubcɛne m'indelok-lokɛre ɲa.

Indedɔɲk moloku mme mɔɲgbɔɲne kɛyɛfɛ dɛkɛɔp da doru ma.»

Yesu oloku tedisre ta totubcɛne ta defet dɔtɔt kɔ yika yɛɛc

³⁶ Kɔ Yesu ɛsak kɛnay ka afum k'ɛmbɛrɛ dɛkɛr, kɔ aɛpse ɔn darɔɲ ɲander ɲaloku kɔ: «Mɛloku su tedisre ta yika yɛɛc dale disre.»

³⁷ Kɔ Yesu oloku ɲa: «Nwe ɔmbɔf mɛɲgbɛn mɔtɔt ma, Wan ka Wɛrkun ɔfɔ.

³⁸ Dale, doru dandɛ dɔ. Defet dɔtɔt, awut a dɛbɛ da dɛKɔm ɲɔ. Yika yɛɛc, awut a Nɔɲk Nɛɛc ɲɔ.

³⁹ Wɛter nwe ɔmbɔf yi ma, ɔyɔne Nɔɲk Nɛɛc. Kɛtel kɛyɔne dɛkɛlip da doru, atɛl ɲayɔne mɛɛkɛ.

⁴⁰ Pɛma tɔkɔ aɲgbuktu yika yɛɛc palɛm yi dɛnɛnc ma, itɔ pɛndeyi dɛkɛlip da doru.

⁴¹ Wan ka Wɛrkun endekɛrɛ mɛɛkɛ mme mendewurɛ dɛbɛ dɔn disre aɲɛ ɲaɲsɔɲɛ akɔ kɛbɛrɛ kiciya kɔ akɔ ɲaɲyɔ pɛɛc ma,

⁴² mendelɛm alɛc dɛnɛnc da Yahanama, difɔ kɛbɔk kɛɲkɔyi kɔ kɛɲaɲɛrɛnɛ sek.

⁴³ Alompu ɲandekɔmot pɛma dec ndɛ deyi ndɛ dɛbɛ da Papa kɛɲan ma. Mɛna nwe mɛɲyɔ lɛɲɔs ma, mɛne ti!»

Totubcɛne ta daka dɔtɔt dɔgbɔɲne

⁴⁴ Kɔ Yesu endɛɲɛr sɔ totubcɛnɛ nte: «Nte tɔ dɛbɛ da dɛkɔm dowurɛnɛ pɛma daka deyenki kɛway ndɛ dɔɲgbɔɲne dale ma. Wɛrkun nwe ɛnɔɲk di ma, pɛgbɔkɛrɛ sɔ di kɛmɛɲk. Pɛlarɛ pɛbotu, pɛkɔ

pəcaməs daka dəkɔ ɔyɔ dɛcaməs mɔ fəp, pəder pəway dalɛ dandɛ.

⁴⁵ Dɛbɛ da dɛKɔm dowurɛnɛ sɔ ntɛ: Wɛcaməs nwɛ ɛntɛn tɛncəmbəl pa kɛma mɔ.

⁴⁶ Ntɛ ɔŋkɔ pənəŋk tɛncəmbəl pa kɛma pətɔt mɔ, k'ɔŋkɔ pəcaməs daka dəkɔ ɔyɔ mɔ fəp kəkəway tɛncəmbəl pa kɛma papəkɔ.»

Totubɛnɛ ta manta

⁴⁷ Kɔ Yesu oloku sɔ totubɛnɛ ntɛ: «Dɛbɛ da dɛkɔm dowurɛnɛ manta mɛmɛ aŋgbal dəkəba mɔ, kɔ mo-sumpər lop dokom fəp.

⁴⁸ Kɔ mɛlarɛ-ɛ, palin mi nde pəwosu, pandɛ kəpit-piti yəkɔ yentesɛ mɔ, pabɛr dɛtaŋku, pagbal yɛlɛc yəkɔ.

⁴⁹ Itɔ pəndeyi dəkəlip da doru. Mɛlɛkɛ mendekɔ mɛgbɛy alompu alɛc daco.

⁵⁰ Mendeləm alɛc dənɛnc da Yahanama, difɔ kəbok kəŋkɔyi kɔ kəŋaŋərənɛ sek.»

Totubɛnɛ ta daka dofu kɔ dokur

⁵¹ Kɔ Yesu eyif aɛpɛsɛ ɔn darəŋ: «Nəncərə tedisrɛ ta maməkɔ inatəksɛ nu mɔ ba? Kɔ ŋawosɛ: «Ey.»

⁵² Kɔ Yesu oloku ŋa: «Ti tɔsɔŋɛ ntɛ atəksɛ fəp aŋɛ ŋayɔnɛ aɛpɛsɛ darəŋ a dɛbɛ da dɛKɔm mɔ ŋawurɛnɛ kɔ wəkiriŋ ka kəbɔ nwɛ ɔŋwurɛ daka dɔn daco ca yofu kɔ yokur mɔ.»

Aka Nasarɛt ŋafati kəgbəkər Yesu kəlan

Mark 6.1-6; Luk 4.16-30

⁵³ Ntɛ Yesu elip kəlɔku totubɛnɛ tantɛ mɔ, k'ɛyɛfɛ di,

⁵⁴ k'ɔŋkɔ dare dɔn Nasarɛt. Dəndo, kɔ Yesu ɛyɛfɛ kətəksɛ nde dəkətola Kanu danan, ntɛ cusu cəwos afum mɔ, kɔ ŋayɛfɛ kəyiftɛnɛ: «Deke Yesu ɔsɔtɔ

kəcərə kəkətene mes kətət kanke kə mes mɛwɛy-wɛy mamɛ-ɛ?

⁵⁵ Bafɔ wan ka kamder ɔfɔ ba? Bafɔ kɛɛ aɲwe Mari kə awɛnc aɲa Sak, Isifu, Simɔɲ kə Yuda ba?

⁵⁶ Bafɔ akirɛ ɔn ɲayi su daco ba? Deke ɔsɔtɔ mamɛ fəp-ɛ?»

⁵⁷ Mes maməkə mənayamse ɲa kəgbəkər Yesu kəlan. Awa kə Yesu oloku ɲa: «Afɔfati kələləs sayibɛ, mɛnɛ dare dɔn kə kələ kən disrɛ.»

⁵⁸ Dəndo Nasarɛt, Yesu ɛnayɔ fɛ di mes mɛwɛy-wɛy mɛlarəm, bawo aka di ɲanabut kəlan.

14

Defi da Aɲnabi Saɲ Batis

Mark 6.14-29; Luk 9.7-9

¹ Tɛm tatəkə, Herodu nwe ɛnatəmpər dɛbɛ da Kalile mɔ, ene pacloku teta Yesu.

² K'oloku afum ɔn aka dəsɔɲka: «Saɲ Batis ɔfɔ! Afum afi daco ɔfɔtɛ, it'ɔsɔɲɛ nte ɛntam kəyɔnɛ mes mɛwɛy-wɛy mɔ.»

³ Herodu ɛnaloku ti bawo nkɔn ɛnasom afum, ɲasumpər Saɲ Batis, ɲakot kə, ɲabɛr kə dɛbili teta Herodiyad wəran ka wɛnc Filip.

⁴ Saɲ oncloku Herodu: «Sariyɛ sɛmɔn'am kənɛncɛ kɔ.»

⁵ Herodu ɛnafɔɲ kədif Saɲ, mba ɛncnesɛ kənay ka afum, bawo ɲanacɛm-cɛmɛnɛ a sayibɛ sɔ Saɲ ɔyɔnɛ.

⁶ Kəsata ka teren toluksər ta kəkom ka Herodu, kə wan wəran ka Herodiyad empise fɔr ya afum aɲɛ ɲanatəɲnɛ kəsata kanke mɔ kirin, kə tɔmbɔt Herodu,

⁷ hanj kɔ Herodu ɛnderɛm kəsɔŋ wan ka Herodiyad paka mpɛ o mpɛ ɛɲwer kɔ mɔ.

⁸ Kɛmɛɲkəs ka iya kɔn Herodiyad, kɔ wɛyɛcɛra oloku: «Məsɔŋ im domp da Saɲ Batis depɛlet.»

⁹ Wɛɛ Herodu, kɛmɔncɛɛ disrɛ, ɛnafan fɛ kɛbupɛrɛ tes tɔkɔ ɛnaderɛm fɔr ya afum akɔ ɛnawe kɛtɔɲɛ kəsata kɔn mɔ, kɔ Herodu osom a pasɔŋ wan ka Herodiyad domp dɔkɔ ɛnawer kɔ mɔ.

¹⁰ K'asom kɛkɔgbinti domp da Saɲ Batis nde dɛbili.

¹¹ K'anƙɛrɛ wɛyɛcɛra ka Herodiyad domp da Saɲ Batis depɛlet, k'ɛɲkɛɛ di kɛrɛ.

¹² Kɔ aɛɛpsɛ a Saɲ Batis darɔŋ ɲander ɲalɛk kɛbɛl kɔn kɔ ɲaɲkɔ ɲawup. Ntɛ telip mɔ, kɔ ɲaɲkɔ ɲasɔɲɛ ti kɛcɛrɛ Yesu.

Yesu ɔsɔŋ afum wul kɛcamɛt yeri

Mat 15.32-39; Mark 6.30-44; Luk 9.10-17; Isaɲ 6.1-14

¹³ Ntɛ Yesu ene moloku mamɔkɔ mɔ, k'ɛlɛk abil k'ɔɲkɔ kɛfo kɛyer-yer. Mba kɔ kɛnay ka afum kɛnde kɛcɛrɛ a Yesu ɛyɛfɛ di, kɔ ɲawur sɛdare sɔɲan, kɔ ɲasolɛ dɛgbɛp kɔ ɲaɛɛpsɛ kɔ darɔŋ.

¹⁴ Ntɛ Yesu ontɔr dɛbil mɔ, k'ɛnɔɲk kɛnay ka afum, k'ɔyɔɛ ɲa nɔnɔfɔr, k'ɛntaməs acuy aɲan.

¹⁵ Ntɛ dɔfɔy dɛmbɛp mɔ, kɔ aɛɛpsɛ a Yesu darɔŋ ɲalɔtɛrɛ ɲalɔku kɔ: «Kɛfo kɛɲkɛ kɛyɔ yer-yer kɔ dec dɛlɛp. Məsak kɛnay ka afum akanɛ ɲakɔ ɲawayəs yeri nde sɛdare sɛlɔma.»

¹⁶ Mba kɔ Yesu oloku ɲa: «Ali ɲaɲkɔ fɛ kɛfo, nɛnasɛrka nəsɔŋ ɲa yeri.»

¹⁷ Kɔ aɛɛpsɛ ɔn darɔŋ ɲalɔku kɔ: «Cɛcom kɛcamɛt kɔ lop mɛrɔŋ gbɛcɛrɛm yɔ sɔyɔ nnɔ.»

¹⁸ Kɔ Yesu oloku: «Nɛkɛr'em yi nnɔ.»

19 Kɔ Yesu osom kɛnay ka afum kɛndɛ yika kɛron, k'ɛlɛk cɛcom ncɛ kɛcamɛt kɔ lop mɛrɛn, k'eyɛkti fɔr darenɛ, k'eyif Kanu barka. K'entɛpi cɛcom k'ɔsɔn ci acɛpsɛ ɔn darɛn a nɔyɛr ci kɛnay ka afum.

20 Kɔ fɛp fɛsɔm ci kɔ nɔnɛmbɛrɛ, k'anɛkɛnɛ Yesu cɛfala wɛco kɔ mɛrɛn cɛlarɛ cɛcom cɛlpɛs.

21 Kɛnay ka afum anɛ nɔnasɔm cɛcom cɛcɔkɔ mɔ nɔnabɛp arkun wul kɛcamɛt (5.000), ta alɔm aran kɔ awut-ɛ.

Yesu ɔɛkɔt kɛba kɛron

Mark 6.45-52; Isaɔ 6.16-21

22 Ntɛ tɛncɛpɛr mɔ, gbɛncana babɔkɔ kɔ Yesu ɛntarɛ acɛpsɛ ɔn darɛn kɛbɛrɛ debil, nɔnɔɛkɛnɛ kɛcali mokuru mɔkɔ, nkɛn pɛcsak kɛnay ka afum kɛkɔ ndaranɔn.

23 Ntɛ elip kɛsak ka kɛnay ka afum kɛkɔ ndaranɔn mɔ, k'ɛmpɛ tɔrɔ kɛron kɛkɔtola Kanu. Kɔ dɔfɔy dɛmbɛp kɔ di pɛyi sona.

24 Tɛnatɛnɛnɛ abil nɔbɔlɛ pɛpɛn pɛwosu, yam yɛc-fikɛli-fikɛli abil, bawo kɛgbɔfnɛ kɔ nɔncndɛ.

25 Dɔsɔka dɛlɛpɛs, kɔ Yesu endɛr nnɔ nɔyi mɔ pɛckɔt kɛba kɛron.

26 Ntɛ acɛpsɛ ɔn darɛn nɔnɔɛk kɔ pɛckɔt kɛba kɛron mɔ, kɔ pɛyi nɔ yamayama. Kɛnɛsɛ kɛnɔn disrɛ kɔ nɔlɔku: «Tubari tɔ,» kɔ nɔɛnkulɛ-kulɛ.

27 Mba kɔ Yesu oloku nɔ gbɛncana babɔkɔ: «Nɛbɛknɛ! In'ɔfɔ, ta nɛnɛsɛ!»

28 Kɔ Piyɛr oloku kɔ: «Mariki, kɔ tɔyɔnɛ mɛn'ɔfɔ-ɛ, mɛsɔm im ikɔt domun kɛron idɛr ndɛ mɛyi mɔ.»

29 Kɔ Yesu oloku kɔ: «Mɛdɛr.» Kɔ Piyɛr ontɔr debil, k'ɔɛkɔt domun kɛron, k'ɔɛkɔ ndɛ Yesu eyi mɔ.

³⁰ Mba nte enanəjk afef ɲɛbɛk mɔ, k'enesɛ k'ɔŋkulɛ-kulɛ: «Mariki, mɔyac im!»

³¹ Gbancana babɔkɔ kɔ Yesu ɛntɛnc kɔca k'osumpɛr Piyɛr, k'oloku kɔ: «Mɛna mɛmpicɛ kɛlan, ta ake tɔ mɛnesɛrnɛnɛ-ɛ?»

³² Yesu kɔ Piyɛr ɲambɛrɛ debil, kɔ afef ɲɛsak kɔwɜr.

³³ Acɛpsɛ a Yesu darɛɲ aɲɛ ɲanayi debil mɔ ɲantɔntɛnɛ kɔ fɔr kirin, kɔ ɲaloku: «Wan ka Kanu yati mɔyɔnɛ!»

Yesu ɛntamɔs acuy atɔf ɲa Kenesarɛt

Mark 6.53-56

³⁴ Yesu kɔ acɛpsɛ ɔn darɛɲ ɲancali, kɔ ɲambɛp atɔf ɲa Kenesarɛt.

³⁵ Kɔ afum a dare dadɔkɔ ɲanɛpɛl Yesu, kɔ ɲandəɲk kɛdɛr kɔn sɛdare sɛkɔ fɛp, k'anɲkɛrɛ kɔ acuy fɛp.

³⁶ K'alɛtsɛnɛ kɔ pɛwɔsɛ afum ɲagbuɲɛnɛ ali dobol da burumus bɔn. Akɔ ɲanagbuɲɛnɛ di mɔ fɛp ɲanatamɛ kɛɲ.

15

Mɔyɔ mokur ma atɛm kɔ mosom ma Kanu

Mark 7.1-13

¹ AFarisi kɔ atɛksɛ sariyɛ s'aSuyif ɲander nnɔ Yesu eyi mɔ kɛyɛfɛ Yerusalem, kɔ ɲayif kɔ:

² «Ta ake tɔ acɛpsɛ am darɛɲ ɲantɔcɛmɛnɛ tɔyɔ tokur ta atɛm darɛɲ-ɛ? Bawo ɲafɔsɛkɛsnɛ saliyɛ a ɲacdi yɛri-ɛ.»

³ Kɔ Yesu eyif ɲa: «Kɔ nɛna, ta ake tɔ nɛntɔcɛmɛnɛ mɛtɛksɛ mmɛ Kanu kɛsom mɔ, kɔ nɛncɛmɛ mɔyɔ mokur ma atɛm anu darɛɲ-ɛ?

⁴ Bawo Kanu kəloku: «Məleləs wisi kə wiri, k'oloku sə: «Nwə ɔŋlək-lokər kas pəyənə fə ti kərə pələc mə, padif wəkayi.»

⁵ Mba nənə nənloku a kə məloku wisi kə pəyənə fə ti wiri: «Paka mpe pəmarna isəŋ əm kəmar kam mə, isəŋ pi Kanu,»

⁶ ali wəkayi əyənə fə sə kas kə pəyənə fə ti kərə tes tələma.» Ti disrə, nənime tosom ta Kanu məyɔ mokur ma atem anu.

⁷ Nənə abanənə kəlomp, Esayi enaloku belbel tetonu cəsayibə:

⁸ «Afum akanə dəcusu gbəcərəm nənleləs im, mba bəkəc yanən yəmbəl'em pəpən.

⁹ Kəsali nke nənctolan'em nənclən'em mə kəyɔ fə dəkəcəmə, bawo mosom mme nənəkse mə, afum nəpər mi, bafɔ Kanu.»»

Ca nyə yəŋsəŋe fum kətəsək mə

Mark 7.14-23

¹⁰ Kə Yesu ewe kənay ka afum k'oloku nən: «Nəcənəkəl, nəcərə sə ti belbel!

¹¹ Bafɔ peri mpe pəmberə fum dəkusu mə pənəŋe fum kətəsək, mba mpe pənəwər kə dəkusu yati mə.»

¹² Kə acəpse ɔn darən nənəŋ nənəŋ kə: «Məncərə a toloku tatəkə tənəsəŋe aFarisi kəfətənə?»

¹³ Kə Yesu oloku: «Pəbɔf mpe o mpe Papa kem nwə eyi nde dəkəm enatəbɔf mə, andegbuktu pi.

¹⁴ Nəcə nən: Atənənək nən ənə nənəŋ kəkətənə atənənək aləma mə. Kə wətənənək endəkətənə wətənənək-ə, mənən manən fəp nənəmpənə debi.

¹⁵ Kɔ Piyer oloku Yesu: «Məsəksər su tedisrɛ ta tətəksɛ tatəkɔ.»

¹⁶ Kɔ Yesu eyif ɲa: «Nəna sɔ nəsərɔyi kətɔcərə disrɛ ba?

¹⁷ Nəncərə fɛ a peri mpɛ pɛmbɛrɛ fum dəkusu mə dəkɔr pɔŋkɔ a padewurɛ pi nde dəkofi?

¹⁸ Mba ntɛ tɔŋwur dəkusu mə, dəbəkəc tɛɲyɛfɛ, tatəkɔ tɔŋsɔŋɛ fum kətəsək.

¹⁹ Bawo mɛcɛm-cɛmnɛ mɛlɛc, kədif fum, kəsumpər dalakɔ, məkət mɛlɛc, deke, sede sɛlɛc, kəfor, dəbəkəc mes maməkɔ fəp mɛɲyɛfɛ.

²⁰ Mes maməkɔ mɔŋsɔŋɛ fum kətəsək, mba kədi peri ta məmbikɛnɛ kəfɔsɔŋɛ fum kətəsək.»

Wəran wəcikəra ɛŋgbəkər Yesu kəlan

Mark 7.24-30

²¹ Kɔ Yesu ɛyɛfɛ dəndo, k'ɔŋkɔ atɔf ɲa Tir kɔ Sidɔŋ.

²² Gbəncana babəkɔ kɔ wəran wəKanan nwɛ ɛnayɛfɛ atɔf ɲaŋkɔ mə, ɛyɛfɛ kəkulɛ-kulɛ: «Məyɔn'em nənɔfər, Mariki, Wan ka Dawuda! Nɔŋk ɲin ɲɛlɛc ɲontɔŋkulu-tonkulu wan kem wəran pəpɔŋ.»

²³ Ali toloku Yesu ɛnaloku fɛ kɔ. Kɔ acɛpsɛ a Yesu darəŋ ɲander ɲalɛtsɛnɛ nkɔn Yesu: «Məbɛləs kɔ, bawo eyi kəkulɛ-kulɛ su kumunt darəŋ.»

²⁴ Kɔ Yesu oluksɛ ɲa: «Mba Kanu kəsom im nda aYisrayel gbəcərɛm, aɲɛ ɲayi pəmɔ ɲkesiya nyɛ yɔsɔlɛ mə.»

²⁵ Mba kɔ wəran nwɛ ender pətontnɛnɛ Yesu fər kirin pəcloku: «Mariki, mədɛ məmar im!»

²⁶ Mba kɔ Yesu oloku kɔ: «Pəntesɛ fɛ kələkər awut kəcom mələmɛ ki cɛn.»

²⁷ Wəran nwe olukse kə: «Kance kə, Mariki. Mba mecen, yeri nyε yentempene amesa dəntəf ya aka mi mə, yə mendi.»

²⁸ Kə Yesu oloku kə: «Wəran, kəlan kam kəmbək! Kanu kəsəne tefan tam teyi.» Gbəncana babəkə bə wan kən wəran enatamne.

Yesu entaməs acuy alarəm

Mark 7.31

²⁹ Kə Yesu eyefe kəfo kanəkə k'osumpər dəpə da agbep ɲa kəba ka Kalile. K'ənkə pəpese tərə kəron k'ende.

³⁰ Kə kənay ka afum alarəm kənder nnə Yesu eyi mə. Kə afum atətam kəkət, atənənk, bobo, alanyiru kə acune docu delarəm, kə ɲander ɲabocər ɲa Yesu dəntəf, k'entaməs ɲa,

³¹ kə cusu cəwos kənay ka afum kənənk bobo ɲaclok-loku, aka lanyiru ɲaluksərne sə kətamne, atətam kəkət ɲackət, atənənk ɲacnənk. Kə ɲanjkorkoru Kanu ka Yisrayel.

Yesu əsəɲ arkun wul maɲkələ yeri

Mark 8.1-10

³² Kə Yesu ewe acəpse ɔn darəɲ k'oloku ɲa: «Nənəfər deyi'm teta kənay ka afum kanke: Mata maas ɲayi kə ina, ɲayə fe sə paka o paka pedi. Ifan fe kəsak ɲa ɲakəne dor, ɲnese ta dis dəkələl ɲa dəpə.»

³³ Kə acəpse ɔn darəɲ ɲayifkə: «Deke sənəkəsəto nnə kəfo kəyer-yer kanke cəcom nce səndenəmbərse kənay ka afum alarəm akanε mə-ε?»

³⁴ Kə Yesu eyif ɲa: «Cəcom cəke cə nəyə-ε?» Kə acəpse ɔn darəɲ ɲaloku: «Cəcom camət-mərən kə molop mələma.»

³⁵ Kə Yesu osom kənay ka afum kənde dəntəf.

³⁶ Kɔ Yesu ɛlek cɛcom nɛ camɛt-mɛrɛn kɔ lop, nte elip kɛyif Kanu barka mɔ, k'entepi yi, k'eyɛfɛ kɛsɔnɔs yi aɛɛpsɛ ɔn darɛn nɔyɛrɛs kɛnay ka afum.

³⁷ Kɔ kɛnay ka afum kɛdi yeri nyɛ kɔ nɔanɛmbɔrɛ, k'awɛtɛs cɛcom cɛlpɛs nɛ cɛnalɛrɛ cɛfala camɛt-mɛrɛn mɔ.

³⁸ Arkun aɛn nɔnadi yeri yayɔkɔ mɔ nɔanabɔp afum wul manɔkɛ (4.000), ta alɔm aran kɔ awut-ɛ.

³⁹ Nte Yesu ɛsak kɛnay ka afum kɔ nɔalukus nde ndaranɔn mɔ, kɔ nkɔn ɛmbɛrɛ debil k'ɔnɔkɔ atɔf nɔ Makadan.

16

AFarisi kɔ aSadisi nɔawɛr Yesu tɛgbɛkɔrɛ tɛwɛy-wɛy ta dɔKɔm

Mark 8.11-13; Luk 12.54-56

¹ AFarisi kɔ aSadisi nɔnɔkɔ nɔabɔp Yesu kɔ nɔancɔpɛ kɔ towul dɛmoloku, kɔ nɔawɛr kɔ a pɛmentɔr nɔ tɛgbɛkɔrɛ tɛwɛy-wɛy nte tementɔr a Kanu kɛsom kɔ mɔ.

² Kɔ Yesu olukɛ nɔ: «Dec dɔrɔfɔy kɔ kɔm kɛyimbɔrɛ-ɛ, nɔloku a pɛndenayɔ wanɔkɛra.

³ Bɛtbɛt kɔ kɔm kɛnɔnɔkɛl pɛyim kɔ pɛbi-ɛ, nɔloku: «Afɛf nɔpɔn nɛnde mɔkɔ wur!» Kɔ nɔnɔgbɛtɛ kɔm-ɛ, nɔncɔrɛ kɔloku tɔkɔ kɛndenayi mɔ, mba nɔncɔrɛ fɛ kɔloku mɛgbɛkɔrɛ ma tɛm tosu!

⁴ Dɛtɛmp dɛlɛc dɔtɔcɛmɛ danapa da Kanu darɛn nɔayi kɛtɛn tɛgbɛkɔrɛ tɛwɛy-wɛy nte tementɔr a Kanu kɛsom im mɔ, mba afɔsɔmentɔr nɔ tɛgbɛkɔrɛ nte o nte kɔ pɛntɔyɔnɛ ta Yunusa-ɛ.» Kɔ Yesu ɛsak nɔ k'ɔnɔkɔ.

*Mɛtɔksɛ mɛlɛc m'aFarisi k'aSadisi
Mark 8.14-21*

⁵ Nte acepse darəŋ a Yesu ŋanccali mokuru məkə mō, kō ŋampələrne kələk cəcom.

⁶ Kō Yesu oloku ŋa: «Nəkembərne lebin d'aSadisi kō d'aFarisi!»

⁷ Kō acepse ɔn darəŋ ŋayefe kəgbəkələne taŋan: «Nte səntələk cəcom mō tɔŋloke ti.»

⁸ Kō Yesu encərə mecemcemne maŋan, k'eyif ŋa: «Ta ake tō nəŋyifene-ε, nəna apice kəlan, nəcloku a nəyō fe cəcom?»

⁹ Haŋ ndekəl nəntacərə fe? Nəncem-cemne fe teta cəcom kəcamət nce arkun wul kəcamət (5.000) ŋanasom kō cəfala cəke c'anaker'em cəcom cəlpəs-ε?

¹⁰ Nəncem-cemne fe sō cəcom camət-mərəŋ nce arkun wul maŋkələ (4.000) ŋanasom, kō cəfala cəke cō nənalukəs'em cəcom cəlpəs-ε?

¹¹ Cəke cō nəntam kətəcərə a bafō teta cəcom t'iyi kəloku nu-ε? Mba nəkembərne lebin d'aFarisi kō d'aSadisi.»

¹² Itō acepse a Yesu darəŋ ŋanacərə oŋ a bafō teta lebin da cəcom t'onclək-lokərə ŋa, mba teta metəksə ma aFarisi kō aSadisi.

*Yesu ɔyone wəyac nwe Kanu kənayek-yek mō
Mark 8.27-30; Luk 9.18-21*

¹³ Nte embərə sədare sa Sesari sa Filip mō, kō Yesu eyif acepse ɔn darəŋ: «Nte afum ŋaŋloku mō, an'ō Wan ka Wərkun ɔyone-ε?»

¹⁴ Kō acepse ɔn darəŋ ŋalukse kō: «Afum alōma ŋaloku a Aŋnabi Saŋ Batis, kō alōma a Eli, mba alōma ŋaloku sō a Yeremy kō pəyone fe ti-ε, sayibe səlōma sō ɔyone.»

¹⁵ Kō Yesu eyif ŋa: «Pecemcemne ponu, an'iyone-ε?»

¹⁶ Kɔ Simɔŋ Piyɛr oloku: «Məna, Krist məyənɛ, wan ka Kanu nkɛ kəyi doru o doru mə.»

¹⁷ Kɔ Yesu oloku kɔ: «Pəbət əm, Simɔŋ wan ka Yunusa, bawo bafɔ afum ɲasɔŋ'am ti kəcərə, mba Papa kem nwɛ eyi nde dəkəm mə!

¹⁸ Mba ina, iclok'əm, Piyɛr məyənɛ, itɔ tatɔkɔ «tasar», mpɛ indecəmbər kələ ka kəlɔŋkanɛ ka alan em kəronj mə. Ali defi dɔfɔdetam təlɔm o təlɔm nɔ pɛyi mə.

¹⁹ Indesɔŋ əm masapa ma dəbɛ da dəkəm: Ntɛ o ntɛ mändəmənɛ nɔ doru dandɛ mə, Kanu kəndekəmənɛ ti dəkəm. Ntɛ o ntɛ mändewosɛ nɔ doru dandɛ mə, Kanu kəndekəwosɛ ti nde dəkəm.»

²⁰ Kɔ Yesu əmənɛ acɛpsɛ ɔn darəŋ kəlɔku ti ali fum a Krist ɔyənɛ, wəyɛk-yɛk nwɛ Kanu kənasom kədeyəc afum a doru mə.

Yesu endəŋk defi dən kɔ kəfɔtɛ kən

Mark 8.31-9.1; Luk 9.22-27

²¹ Tɛm tatɔkɔ kɔ Yesu oncop kəlɔk-lokər acɛpsɛ ɔn gbasɲa a mənɛ pəkɔ Yerusalem. Dəndo abeki, alonɲɛ apəŋ kɔ atəksɛ sariyɛ sa aSuyif ɲaŋkɔtərəs kɔ pəlarəm, padif kɔ, pəfɔtɛ afi dacɔ tataka ta maas.

²² Kɔ Piyɛr ewe Yesu kəsək k'eyɛfɛ kənal kɔ, pəcloku: «Kanu kəyəc əm ti, Mariki! Tatɔkɔ tɔfɔbər əm few.»

²³ Mba kɔ Yesu ɛŋkafələ k'olukɛ Piyɛr: «Məkafəl'em kumunt darəŋ, məna Sentani! Məyamsər'em kəcɛpər dɔpɔ ndɛ pəmar icɛpər mə. Iw'am tewe ta Sentani bawo məfɔcɛm-cɛmnɛ pəmɔ Kanu, mba pəmɔ afum.»

²⁴ Kɔ Yesu oloku acɛpsɛ ɔn darəŋ: «Kɔ fum ɛfan kəcɛps'em darəŋ-ɛ, wəkayɪ pəsək kəcɛm-cɛmnɛ

teta nkənsərka, pəgbanne kətək kən kəpəmpəl, pəcəm'em darəŋ.

²⁵ Bawo nwe o nwe eŋsep kəyac kiyi kən doru mə, kəndesalpər kə, mba nwe o nwe kiyi kən doru kəŋsalpər teta ina mə, məndesətə ki.

²⁶ Dəkacəmə dere də təyə fum kəsətə kən doru kərkar, kiyi kən doru kəsələr kə-ε? Ake fum entam kəsəŋ kəwurse ka kiyi kən doru-ε?

²⁷ Iloku nu ti, bawo Wan ka Wərkun endeder dənərə da debeki da Kas kə mələkə əŋ, endesəŋ nwe o nwe kəway ka mes mən məyə.

²⁸ Kance icloku nu: Aləma ŋayi su dacə nnə, aŋe ŋantədefi ta ŋanəŋk Wan ka Wərkun pəcder dəbe dən disre mə-ε.

17

Kətəŋkələ ka Yesu

Mark 9.2-13; Luk 9.22-36

¹ Nte mata camət-tin mencepər mə, kə Yesu elək Piyer, Sak kə wenc Isəŋ, k'əŋkekəre ŋa kəsək tərə teŋeci kəron.

² Kə Yesu əŋkə pətəŋkələ kəro fər yaŋan kirin: Kə kəro kən kəncop kəmotər-motər pəmə dec, kə yamos yən pəmə pəwanəkəra.

³ Gbəncana babəkə kə acəpse əŋ darəŋ ŋanəŋk Aŋnabi Musa kə Aŋnabi Eli ŋawurər Yesu ŋaclok-loku.

⁴ Kə Piyer oloku Yesu: «Mariki, pəntese su kəyi nnə! Kə məwose-ε, incəmbər nnə ŋgbancan maas, ŋin ŋa mənə, ŋin ŋa Musa kə ŋin ŋa Eli.»

⁵ Nte Piyer eyi kəlok-loku mə, gbəncana babəkə kə kəp kəmotər-motər kəŋgbəpərne ŋa. Awa kə

dim dowur dākəp kaŋkə docloku: «Wəkawε, wan kem nwε imbətər mə ɔfɔ, nkən ɔbət im mes belbel. Nəcəŋkəl kə!»

⁶ Ntε acεpse darəŋ a Yesu ɲane moloku maməkə mə, kə ɲantempene ɲagbɔpse ntε kənese kəpəŋ kəsumpər ɲa mə.

⁷ Mba kə Yesu ɔlətərne, k'ɔŋgbuɲene ɲa kəca kən k'oloku: «Nəyεfε, ta nənese!»

⁸ Ntε ɲayekti fər mə, ɲanəŋk fε fum nwε o nwε mēne Yesu sona.

⁹ Ntε ɲanctor dətərɔ mə, kə Yesu osom ɲa ntε: «Ta nəloku nwε o nwε ntε nənəŋk mə haŋ Wan ka Wərkun pəfɔtε afi daco.»

¹⁰ Kə acεpse darəŋ a Yesu ɲayif kə toloku ntε: «Ta ake tɔ atəkse sariye s'aSuyif ɲaŋloke a mēne Aŋɲabi Eli pənunkenε kəder kəesna a wəyek-yek pədeder-ε?»

¹¹ Kə Yesu olukse ɲa: «Kance kə, a mēne Eli pənunkenε pəder kədelompəs mes fəp.

¹² Mba icloku nu a Eli elip kəder: ɲanɛpəl fε kə, kə ɲayɔ kə pəmɔ təkə ɲafaŋ mə. Itɔ ɲandetərəs sɔ Wan ka Wərkun.»

¹³ Kə acεpse darəŋ a Yesu ɲancərə ɔŋ a teta Saŋ Batis tɔ Yesu eyi kəloku.

Yesu entaməs wan nwε docu da kətempene denayi mə

Mark 9.14-29; Luk 9.37-43

¹⁴ Ntε Yesu kə acεpse ɔn darəŋ ɲalətərne kənay ka afum mə, kə wərkun wəlɔma ender pəcəpε kə suwu fər kirin,

¹⁵ pəcloku: «Mariki, məyɔne wan kem nɔnɔfər, nwε ɔyɔ docu da kətempene mə, təntərəs kə belbel. Dənenc kə dəromun elasne kətempene.

16 Inkenε kɔ acεpsε am darəŋ mba ɲantam fε kətaməs kɔ.»

17 Kɔ Yesu oŋkulərne: «Nəna afum a detemp da tɛm tantε dekafələ-kafələ, dətolan Kanu, ake tɛm t'indesoyi kɔ nəna-ε, icəme nu dəntɔf han tɛm tere-ε? Nəkεr'em kɔ nnɔ.»

18 Kɔ Yesu εŋgbəŋ-gbəŋər ɲoŋk ɲələc ɲaŋkɔ, kɔ ɲowur wan wərkun nwe, k'entamnε gbəncana babɔkɔ.

19 Kɔ acεpsε ɔn darəŋ ɲander ɲayif Yesu yɔkyɔk: «Ake'soŋε nte sənə səntɔtam kəbeləs ɲi sənəsərka mɔ-ε?»

20 Kɔ Yesu oloku ɲa: «Bawo kəlan konu kəmpicε. Kance, icloku nu, kɔ kəlan konu kəyi pəmɔ tɛŋgben tɛfɛt-ε, nəŋloku tərɔ tantε: «Məcəpε nnɔ, məkɔ nde,» pencepε di. Tes o tes tɔfɔyi nte nəntɔtam mɔ.» [

21 *]

Yesu ɲgbəkəre sɔ kəsəŋε kəcərə defi kɔ kəfɔtε kən

Mark 9.30-32; Luk 9.43-45

22 Dɔsɔk dɔlɔma nte acεpsε a Yesu darəŋ ɲanalɔŋkanε Kalile mɔ. Kɔ Yesu oloku ɲa: «Andelɛk Wan ka Wərkun, pabər kɔ arkun dəwaca.

23 Akakɔ ɲandedif kɔ, mba tataka ta maas ta defi dɔn pəfɔtε afi daco.» Kɔ acεpsε ɔn darəŋ ɲaməncnε han kɔ təntɔrəs ɲa dəbəkəc.

Kəsəŋ dut da kələ kəpəŋ ka Kanu

24 Nte Yesu kɔ acεpsε ɔn darəŋ ɲambərə dare da Kaparnam mɔ, k'abanəs dut da kələ kəpəŋ ka Kanu ɲander ɲayif Piyer: «Wətəkse konu ɔfəsəŋ dut da kələ kəpəŋ ka Kanu ba?»

* **17:21** Yecicəs yokur yolma yedəŋər moloku mame: «Mba kətola Kanu kɔ kəsəŋ gbəcərəm kɔ məntam kəbelse yəŋk pəmɔ yaye.»

²⁵ Kɔ Piyer owose, «Ey, ɔɲsɔɲ di.» Tɛm ntɛ Piyer ɛnɔbɛrɛ kɛlɔ disrɛ mɔ, kɔ Yesu onunɣenɛ kɛlɛk moloku, k'eyif: «Simɔɲ, cɛke cɔ mɛnɔcɛm-cɛmnɛ-ɛ? Are ɲɔ pɛmar kɛcsɔɲ abɛ a doru dandɛ dut da teren kɔ dɔkɔ ambanɣsɛr arkun tɛm tɔlɔma mɔ: Afum aka tɔf yaɲan, kɔ pɔyɔnɛ fɛ ti acikɛra ba?»

²⁶ Kɔ Piyer oloku: «Acikɛra ɲɔ pɛmar ɲasɔɲ di.» Kɔ Yesu oloku kɔ: «Afum aka dɔtɔf ɲa ɲafɔsɔɲ dut.

²⁷ Mba ta payamsɛr abanɣsɛr dut anɛ. Itɔ mɛndekɔnɛ nde dɛkɛba mɛfɛkɛs, alop ɲɔcɔkɔ-cɔkɔ ɲɔkɔ mɛnkɔsumpɛr mɔ, mɛmɛpi ɲi kusu. Mɛɲkɔbɛp ɲi disrɛ pɛsam, mɛlɛk pi mɛsɔɲ dut dem kɔ dam.»

18

*Nwɛ ɛmbɛk dɛkɛcɛmɛ nde dɛbɛ da dɛKɔm mɔ
Mark 9.33-37; Luk 9.46-48*

¹ Tɛm tatɔkɔ kɔ acɛpsɛ darɔɲ a Yesu ɲander ɲayif kɔ: «An'ɛbɛk dɛkɛcɛmɛ nde dɛbɛ da dɛKɔm-ɛ?»

² Kɔ Yesu ewe wanfɛt, k'ɛncɛmbɛr kɔ ɲa daco,

³ k'oloku: «Kance, icloku nu: Kɔ nɛntɔsɛkpɛr mera nɔyi pɛmɔ awut afɛt-ɛ, nɛfɔdekɔbɛrɛ dɛbɛ da dɛkɔm.

⁴ Ti tɔsɔɲɛ, nwɛ o nwɛ ontore banca pɛmɔ wanfɛt wɛkawɛ mɔ, nkɔn endekɔyɔnɛ nwɛ ɛmbɛk dɛkɛcɛmɛ nde dɛbɛ da dɛKɔm mɔ.

⁵ Nwɛ o nwɛ ɛmbanɣ wanfɛt pɛmɔ wɛkawɛ tewɛ ta ina Yesu mɔ, ina yati ɛmbanɣ.»

Kɛbɛɲɛ kɛpɔɲ

Mark 9.42-48; Luk 17.1-2

⁶ Mba kɔ fum ɔsɔɲɛ wanfɛt kɛlɔɲɛ nwɛ ɛɲgbɛkɛr im kɛlanɣ mɔ-ɛ, pɛlɛc papɔkɔ pɛncɛpɛr kɛgbɛk kɔ tasar tɔpɔɲ dɛkilim, palɛm kɔ dɛkɛba.

⁷ Apayo, pələc pere peyi doru! Mes mmə mənşəne afum kəlonə mə mələ! Mes maməkə məfəlip, mba pələc peyi nwe ənsənə mes maməkə kəyi mə!

⁸ Kə kəca kam kə pəyonə fə ti kəcək kam kəndəsən'am kəciya-ə, məgbinti ki mələm ki kəbəl'am. Kəberə kiya kam ka doru o doru məyo kəca kin kə pəyonə fə ti kəcək kin kəncepər kələm kam yahanama məyo waca mərən kə wəcək mərən. Bawo dəndo nəc dəfənimə di doru o doru.

⁹ Kə təyonə dəfər dam dəndəsən'am kəciya-ə, məkakti di mələm dəbəl'am. Kəberə kiya kam ka doru o doru məyo dəfər din kəncepər kələm kam dənəc da yahanama məyo fər mərən.

*Totubcənə ta ankesiya ɲəsələ ɲɛ ɲolukus mə
Luk 15.3-7*

¹⁰ Ta nədəcəs teta fum wəfət nwe o nwe, icloku nu, a mələkə manjan mmə meyi nde dəkəm mə, menyi tēm fəp fər ya Kanu Papa kem nwe eyi nde dəkəm mə.

¹¹ [*]

¹² Cəke cə nəncəm-cəmnə-ə? Kə fum əyo ɲkesiya tasar tin (100), ɲin ɲəsələ-ə, fum nwe əfəsək ɲkesiya yəkə wəco camət-manəkələ kə camət-manəkələ (99) nde dəmərə kəkəten ɲin ɲəkə ɲəsələ mə ba?

¹³ Kance icloku nu: Kə fum ənəjk ankesiya ɲəsələ ɲən ɲin-ə, teta ɲin ɲanəkə ənəjk mə təmbət kə tetas ta yəkə wəco camət-manəkələ kə camət-manəkələ (99) nyə yənətəsələ mə.

* **18:11** Yəgbəkərə yokur ya Yecicəs Yosoku yelərəm yendenər moloku mmə: «Bawo Wan ka Wərkun ender kədetən kə kəyac anj ɲanasələ mə.»

14 Tin tayi tɔ: Kanu Papa konu nwε eyi nde dɛkɔm mɔ, ɛfan fε afɛkɛl ɲa wɛkin ɲɔsɔle awut akanɛ daco.

Mɔyɔ nte kɔ wɛnc ɔm ɔyɔ'm pɔlɛc-ε

15 Kɔ wɛnc ɔm enciyan'am-ε, mɛkɔ mɛbɔp kɔ mɛrɛɲ monu, mɛlɔku kɔ ti. K'enen'am toloku tatɔkɔ-ε, mɛntam kɔ.

16 Mba k'ɔntɔnen'am toloku tatɔkɔ-ε, mɛkɔ mɛtɛn fum wɛkin kɔ pɔyɔnɛ fε ti afum mɛrɛɲ, nte tɔɲsɔɲɛ afum mɛrɛɲ, maas ɲayɔnɛ toloku tatɔkɔ sede mɔ.

17 K'ɛfati sɔ kɛcɛɲkɛl ɲa-ε, mɛkɔ mɛlɔku ti aka kɛlɔɲkanɛ ka alaɲ a Yesu, k'ɛfati sɔ kɛcɛɲkɛl kɛlɔɲkanɛ kanɲkɔ-ε, nɛsumpɛr kɔ pɛmɔ wɛtɔlaɲ kɔ wɛbɔɲɛs dut.

18 Kance icloku nu, tes nte o nte nɛndemɔnɛ doru dandɛ mɔ, Kanu kɛndekɔmɔnɛ ti nde dɛKɔm, tes nte o nte nɛdewosɛ nnɔ doru dandɛ mɔ, Kanu kɛndekɔwosɛ ti nde dɛKɔm.

19 Kance icloku nu sɔ: Kɔ tɔyɔnɛ afum mɛrɛɲ ɲasol kɛtɔɲnɛ disrɛ ɲatola Kanu mpɛ o mpɛ, Papa kem Kanu nwε eyi nde dɛkɔm mɔ ɔɲsɔɲ ɲa pi.

20 Bawo nnɔ afum mɛrɛɲ, maas ɲambɔpsɛnɛ teta tewe tem mɔ, inɲi ɲa daco.

Totubcɛnɛ ta wɛmarɛs nwε ɛɲfati kɛɲaɲnɛ mɔ

21 Kɔ Piyɛr ender pɔyif Yesu: «Kɔ wɛnc im ender pɛciyan'em, cɛke cɔ pɛmar im inɲaɲnɛnɛ kɔ-ε? Haɲ camɛt-mɛrɛɲ ba?»

22 Kɔ Yesu oloku: «Iloku f'am haɲ camɛt-mɛrɛɲ gbɛcɛrɛm, mba haɲ wɛcɔ camɛt-mɛrɛɲ yoboc camɛt-mɛrɛɲ (70 yoboc 7).

23 Bawo dɛbɛ da dɛKɔm dowurɛnɛ nte: Wɛbɛ nwε ɛɲfan kɛsɔtɛr amarɛs ɔn debe dɔn mɔ.

24 Nte oncop ti kəyɔ mə, k'an̄kɛɛ kə wəmarəs wəkin nwe enatəmpərə kə pəsam pəpəŋ mə.

25 Nte wəmarəs enatətam kəluxe pəsam mpe mə, kə wəbe kən osom a pacaməs kə pəyənɛ wəcar, wəran kən kə awut ɔn kə daka dəkə ɔyɔ mə fəp, nte təŋsəŋɛ pəsəŋ debe dən mə.

26 Kə wəmarəs nwe encəpɛ wəbe kən suwu fər kirin̄, pəcloku kə: «Məŋaŋnɛ, ta məbɛlkər im, indeluks'am debe dam fəp!»

27 Kə wəbe kən ɔyənɛ kə nənəfər, k'ɛŋaŋnɛnɛ kə pəsam pəpəkə, k'ɛsak wəmarəs kən k'əŋkə.

28 Nte wəmarəs nwe owur mə, kə ŋambəpɛnɛ kə wanapa kən wəmarəs wələma nwe enatəmpərə sɔ nkən debe da tapəsam pepic mə. Nkən nwe anatəmpərə tapəsam mə, osumpər wətəmpərə kən pəsam duma dəkilim, pəcloku: «Məluks'em debe dəkə məntəmpər'em mə.

29 Kə wanapa kən osumpər kə wɛcək, pəclɛtsɛnɛ kə: «Məŋaŋnɛ, ta məbɛlkər im, indeluks'am debe dam!»

30 Mba kə nwe antəmpərə debe mə ɛfati, k'ɛŋkɛkərə wanapa kən, k'əŋkə pəbɛr kə dəbili, haŋ tɛm nte endelukɛ kə pəsam pəkə ɔntəmpərə kə mə.

31 Nte amarəs alpəs akə ŋanəŋk təkə tencder mə, kə kəmənɛnɛ kəpəŋ kəyi ŋa. Kə ŋaŋkə ŋaləmər wəbe kəŋan məkə mənacɛpər mə fəp.

32 Kə wəbe ewe sɔ wəmarəs nwe, k'oloku kə: «Məna wəmarəs wələc, inaŋaŋnɛn'am debe dəkə mənatəmpər'em mə fəp, bawo mənaɛtsɛn'em,

33 mba məna məntam fɛ kəyənɛ wanapa kam nənəfər, pəmə təkə ina iyən'am nənəfər mə ba?»

34 Mɛtɛlɛ disrɛ, kə wəbe ɔsəŋ wəmarəs wələc nwe

asɔdar, ɲaber kɔ dɔbili ɲactɔrɔs kɔ han pɔclukɛ kɔ debe da pɔsam fɔp, mpɛ ɛnatɔmpɔrɛ kɔ mɔ.

³⁵ Tatɔkɔ tɔ Kanu Papa kem nwɛ eyi nde dɔKɔm mɔ, endekɔyɔ nɔna dɔcɔ nwɛ o nwɛ ɔntɔɲaɲnɛnɛ wɛnc abɛkɛc ɲosoku pɛs mɔ.»

19

Kɔtɔkɛ ka Yesu teta kɔcɛnɛnɛ ka anɛncɛnɛ

Mark 10.1-12

¹ Ntɛ Yesu elip moloku mamɔkɔ mɔ, k'ɛyɛfɛ atɔf ɲa Kalile k'ɔɲkɔ atɔf ɲa Yude ntende mokuru ma kɔɲgbɔkɔ ka Yurdɛn.

² Kɔ kɔnay ka afum alarɛm kɔncɔmɛ kɔ darɔɲ, k'ɛntamɔs di afum.

³ K'aFarisi ɲander ɲawakɔs kɛcɔpɛ Yesu towul dɔmoloku, ɲacyif kɔ: «Sariyɛ sɔwɔsɛ wɔrkun kɛcɛ wɔran kɔn teta tes tɔlɔma ba?»

⁴ Kɔ Yesu olukɛ ɲa: «Nɔɲkaraɲ fɛ Yecicɔs Yosoku ba? Dɔkɔcɔp da doru kɔ Kanu kɛsɛl afum wɔrkun kɔ wɔran,

⁵ kɔ Kanu kɔloku sɔ: «Wɔrkun endesak kas kɔ kɛrɛ pɔsɛktɔrɛnɛ wɔran kɔn, ɲakafɔlɛ ɲayɔnɛ tɛsɛm tin.»

⁶ Ti disrɛ, ɲayi fɛ sɔ mɛrɔɲ mba tɛsɛm tin. Ta fum pɔgbɛy tɔkɔ Kanu kɔnabɛmbɔrɛnɛ mɔ!»

⁷ Kɔ aFarisi ɲayif Yesu sɔ: «Awa, ta ake tɔ Musa osomɛ a mɛnɔɲkɛnɛ mɔsɔɲ wɔran kam areka ɲɛcɛnɛ kɔ a mɔdɛwɔrɛnɛ kɔ ndaram-ɛ?»

⁸ Kɔ Yesu oloku ɲa: «Teta bɛkɛc yonu yeyɛɲki tɔ Musa owosɛnɛ nu kɛcɛ aran anu. Bafɔ tatɔkɔ tɔ tɛnayi dɔkɔcɔp.

⁹ Mba icloku nu: Nwε ence wəran kən pənence wəloma mə, dalakə də ɲayi kə wəkakə, mənε tɔyɔnε a kənencenε kan kə ɲayi fε sariye disrε.»

¹⁰ Kə acεpsε darəɲ a Yesu ɲaloku: «Kə tɔyɔnε tatəkə teyi wərkun kə wəran daco-ε, kətonence kancepər kənence.»

¹¹ Kə Yesu oloku ɲa: «Bafɔ fəp fəwosε tetəkse tatəkə, mənε akə asɔɲ ti mə.

¹² Mes mela mmε mənɲɔɲε wərkun kətonence mə: Aloma ɲayi an kome ɲa ti, aloma ayamse ɲa kənence teta kədif pokome paɲan, aloma ɲafonence ɲasərka kəfan kəɲan kəbəcə dεbe da dəkɔm. Məna nwε mənɲosε kəsumpər ti mə, məsumpər ti.»

Yesu ontolanε awut pətət

Mark 10.13-16; Luk 18.15-17

¹³ Tεm tatəkə tɔ afum ɲanakerε Yesu awut afet ntε tɔɲɔɲε pəden ɲa waca, pətolanε ɲa sɔ Kanu mə. Mba kə acεpsε ɔn darəɲ ɲanɲbən-ɲbənər ɲa.

¹⁴ Kə Yesu oloku acεpsε ɔn darəɲ: «Nəsak awut! Ta nɔyamsər ɲa kəder nnɔ iyi mə, bawo afum anε ɲayi pəmɔ awut afet akanε mə ɲayɔ dεbe da dəkɔm.»

¹⁵ Kə Yesu endenəs ɲa waca dəsəbomp, k'ontolanε ɲa pətət, k'eyεfε k'ɔɲkə.

Wətεmp wəka daka dɛlarəm

Mark 10.17-31; Luk 18.18-30

¹⁶ Gbəncana babəkə kə wərkun wəloma ender pəyif Yesu: «Wətəkse, cəke cɔ pəmar iyɔ tətət ntε tentam kəsɔɲ im kiyi wəyən ka doru o doru mə-ε?»

¹⁷ Mba kə Yesu eyif kə: «Ta ake tɔ məyif'em ntε tɔyɔnε tətət mə-ε? Kanu sona gbɔɲ ɔyɔnε wətət. Kə

məfaŋ kəsətər Kanu kiyi wəyeŋ ka doru o doru-ε, məleləs mosom.» Kə wərkun nwe eyif Yesu: «Mosom mere?»

¹⁸ Kə Yesu oloku kə: «Ta mədiffum. Ta məsumpər dalakə. Ta məbaŋε fum sede sa yem. Ta məkiye.

¹⁹ Məleləs wisi kə wiri. Məbətər wenc əm pəmə təkə məmbətərne mə.»

²⁰ Kə wətemp nwe oloku Yesu: «İleləs maməkə fəp, akebut im sə-ε?»

²¹ Kə Yesu oloku kə: «Kə məfaŋ kəlarε decempi nte tənşəŋε pəsəŋ əm kiyi wəyeŋ ka doru o doru mə-ε, məkə məcaməs daka dəkə məyɔ mə, məsəŋ pəsəm papəkə atəyɔ daka. Kə məyɔ ti-ε, məndekəsətə daka dəlarəm nde dəKəm. Kə məlip-ε, məder məceps'em darəŋ.»

²² Nte wətemp nwe ene moloku maməkə mə, k'olukus dis dədence kə, bawo enayɔ daka dəlarəm.

²³ Awa, kə Yesu oloku acεpsε ɔn darəŋ: «Kance, icloku nu: Pəncuca wəka daka kəberε dəbe da dəKəm.

²⁴ Icloku nu sə, kəberε ka yəkəme dəabi ɲa tēsəmbε kəfəfəreŋε kətas kəberε ka wəka daka dəbe da dəKəm.»

²⁵ Nte acεpsε ɔn darəŋ ɲane moloku maməkə mə, kə təsəŋε ɲa kənaŋkanε cusu kəwos. Kə ɲayiftene: «Awa an'entam ɔn kəfis-ε?»

²⁶ Kə Yesu ɔməməŋ acεpsε ɔn darəŋ, k'oloku ɲa: «Afum ɲafətam, mba Kanu kəntam mes fəp.»

²⁷ Kə Piyer oloku Yesu: «Məcəŋkəl, səna sasak ca fəp kə səncəm'am darəŋ. Cəkə cə tetosu tendekəyi-ε?»

²⁸ Kə Yesu oloku ɲa: «Kance icloku nu teta nəna aŋε nənceps'em darəŋ mə: Kə doru dofu dendeder-ε, Wan ka Wərkun endelek dəbe pənde dəcəm da

nəro da debeki dən, nəna sə nəndekəndə səcəm wəco kə mərəj sa dəbe, nəckiti cusunka wəco kə mərəj ca Yisrayel.

²⁹ Nwε o nwε εsak wolo, awenc anja, kas, kεε, awut kə pəyone fε ti dale dən teta tewe tem, endekəsəto tasar tin ta yayəko εsak mə, pəsəto sə kiya wəyən ka doru o doru.

³⁰ Akirin alarəm ɲandekəyone adarən, adarən alarəm ɲayone akirin.

20

Abəc a nde dənɓəɲkələ ya wən

¹ «Nte tɔ dəbe da dəkəm dowurɛnε wəka abof wələma nwε enawur bətbət suy kəkəten afum anje ɲanɲkəbəcə kə nde ɲɓɓəɲkələ yən ya wən mə.

² Kə ɲantənne kə afum akə əsəto kəkəbəcə kə mə, dəsək din pəsam gbəlen bin, k'ɛɲkekəre ɲa kəbəc nde ɲɓɓəɲkələ ya wən yən.

³ Kə wəka abof nwε owur walaha, k'ɔɲkə pənəɲk afum aləma ɲayi dare disre ta ɲayi kəyɔ nte o nte-ε.

⁴ K'oloku ɲa: «Nəna sə nəkə nəbəc nde dənɓəɲkələ ya wən, indekəsən nu kəway nke pəmar mə.»

⁵ Kə afum anje ɲanɲkə ɲabəc. Kə wəka abof nwε owur dan kəkəten sə abəc aləma, pəndeyi salifana k'owur sə.

⁶ Pəndeyi lahansara, kə wərkun nwε owur, k'ɔɲkə pənəɲk arkun aləma dare disre ta ɲayi kəbəc nte o nte-ε, k'eyif ɲa: «Ta ake tɔ nəyine nnə tɛbətɓət haɲ dɔfɔy ta nəmbəc tələm o tələm-ε?»

⁷ Kə afum anje ɲaloku kə: «Fum ətələk su yɛbəc.» Kə wəka abof oloku ɲa: «Nəna sə nəkə nəbəc nde dənɓəɲkələ yem.» .

⁸ Nte pāndecop kəbiye mə, kə wəka abəf nwe oloku wəkirin ka abəc ɔn: «Məwe abəc, məsəŋ ɲa kəway. Məcop aŋe ɲander telpəs mə, mələpsər akə ɲanunkenena mə.»

⁹ Akə ɲancop yebəc lahansara mə ɲander, kə ɲasəto-səto nwe o nwe gbəlen bin bin.

¹⁰ Kə akə mariki enanunkenə kələk yebəc mə ɲander ɲaccem-cemne kəsəto pəsam ɲacepər akə anunkenena kəsəŋ kəway mə, mba kə ɲa sə ɲasəto nwe o nwe pəsam gbəlen bin bin.

¹¹ Nte ɲayi kəbaŋ kəway kəŋan mə, kə ɲancəpene teta mariki wəka yebəc nwe.

¹² Kə ɲaloku: «Akaŋe ɲander telpəs mə, dec din gbəŋ də ɲambəc, kə məsəŋ ɲa kəway sətəŋnene, səna aŋe sələpe dec kəbəc nne yowon disre mə.»

¹³ Kə wəka abəf oloku wəkin ɲa daco: «Wanapa, iyo f'am pələc, bafə pəsam gbəlen bin bə sətəŋnene ba?

¹⁴ Məbaŋ pəkə pəyone pam mə, məkə. Tante isəŋ əm mə, t'indəsəŋ wəkə enderna telpəs mə.

¹⁵ Pəmar f'em kəyo daka dem təkə infaŋ mə ba? Kəraca kə məyo nte iyo tes tətət mə ba?»

¹⁶ Ti disre akirin ɲandekəyone adarəŋ, adarəŋ ɲayone akirin.»

*Yesu ɔsəŋe kəcəre ta maas defi kə kəfəte kən afi daco
Mark 10.32-34; Luk 18.31-34*

¹⁷ Nte Yesu encpe Yerusalem mə, k'ələk taciŋa acəpse ɔn darəŋ aŋe wəco kə mərəŋ, k'oloku ɲa dəpə:

¹⁸ «Nəcəŋkəl im, Yerusalem ayi kəpe. Aŋkələk Wan ka Wərkun, pabər kə aləŋne apəŋ, kə atəkse

sariye s'aSuyif dāwaca. Akakō ṇadenṇar kō sariye sa defi.

¹⁹ Ṇandebēr kō atōyōnē aSuyif dewaca ntē tōṇsōṇē ṇafani kō, ṇasut kō, ṇacanṇ kō dātōk yēpāmpāl. Tataka ta maas, pāfōtē afi daco.»

Totola ta iya ka awut a Sebede

Mark 10.35-45

²⁰ Iya ka awut a Sebede ɔlɔtərne Yesu kō awut ɔn, k'ontontnē pāctola.

²¹ Kō Yesu eyif kēre kēṇan: «Cāke cō māfan-ε?» K'olukse kō: «Māsōṇ im temer a awut em mērēṇ akanṇe māṇgbātne mō, wākin pānd'am kēca kātōt, wākō pānd'am kēca kāmēriya kō māndeyi dēbē dam disrē-ε.»

²² Kō Yesu oloku: «Nāncārē fē ntē nāyi kātola mō. Nāntam kēwosē kātōrās nkē ina indesōtō mō ba?» Kō ṇawosē «Ey, sāntam ki kēwosē.»

²³ K'oloku ṇa: «Awa nāna sō nāndesōtō kātōrās nkē indesōtō mō, mba ntē tōyōnē kāndē kēca kem kātōt kō kāmēriya mō, bafō in'ōṇsōṇ ti. Afum akō Papa kem olompse dākēcāmē dadōkō mō ṇayō di.»

²⁴ Ntē acēpse ɔn darēṇ aṇē wācō ṇane moloku mānōkō mō, kō pāntēle ṇa nnō awēnc aṇē mērēṇ ṇayi mō.

²⁵ Kō Yesu ewe nnō eyi mō k'oloku ṇa: «Nāncārē a akiriṇ a tōf ya doru ṇantasərne afum aṇan k'abeki apōṇ ṇaṇkōtēne kātām afum aṇan kēronṇ.

²⁶ Ta tatōkō teyi nu daco. Nwē o nwē eṇfanṇ kēbēk nu daco mō, endeyōnē wāmarās konu.

²⁷ Nwē o nwē eṇfanṇ kēcāmē dākēcāmē dōcōkō-cōkō mō, pāmar pēyōnē wācar konu.

28 Ti disre Wan ka Wærkun ender fe padebæce kɔ, mba ender kadebæce afum pəsəŋ sɔ kiyi kən wəyən pəwurus kənay ka afum.»

*Yesu entaməs atənəŋk mērəŋ
Mark 10.46-52; Luk 18.35-43*

29 Nte Yesu kɔ acepsɛ ɔn darəŋ ɲawur Yeriko mɔ, kɔ kənay ka afum alarəm kəncəme Yesu darəŋ.

30 Atənəŋk mērəŋ ɲanandɛ dɔpɔ kəsək, kɔ ɲane a Yesu eyi kəcəpər, awa kɔ ɲaŋkule-kule: «Məyɔne su nɔnɔfər, Mariki, Wan ka Dawuda!»

31 Kɔ kənay ka afum kəgbəŋ-gbəŋər ɲa a ɲacaŋk, mba ɲancnaŋkanɛ kənaŋkanɛ dəm kəkule-kule: «Məyɔne su nɔnɔfər, Mariki, Wan ka Dawuda!»

32 Kɔ Yesu encəme, k'ewe atənəŋk aŋɛ pəcyif ɲa: «Cəke cɔ nəfan a iyɔne nu-ɛ?»

33 Kɔ atənəŋk aŋɛ ɲaloku kɔ: «Mariki, məsəŋɛ su fər kəmepe, yənəŋk!»

34 Kɔ nɔnɔfər dosumpər Yesu tetanjan, k'ɔŋgbuŋɛne ɲa fər. Gbəncana babəkɔ, kɔ ɲaluksərne sɔ kənəŋk, kɔ ɲancəme nkən Yesu darəŋ.

21

*Yesu embɛɛ dare da Yerusalem
Mark 11.1-11; Luk 19.28-40; Isaŋ 12.12-19*

1 Nte Yesu kɔ acepsɛ ɔn darəŋ ɲanclətərne Yerusalem, ɲasərɔyi Bɛtfase ntende tɔrɔ ta Tɔk ya Olif mɔ, k'osom acepsɛ ɔn darəŋ mērəŋ,

2 pəcloku ɲa: «Nəkɔ nde dare dɔkɔ deyɪ nu tekirin mɔ, nəŋkɔbɔp di sɔfale səran pakot si, sɔfɛt səyi si kəsək. Nəsikəli sɔfale sasəkɔ nəker'em.

³ Kə təyənə fum pəyif nu tes təlōma-ε, nəloku kə: «Pəmar Mariki pəyənə si tes təlōma.» Aηsake nu si katəna.»

⁴ Tatəkə tənayi nte təηsəηε moloku məkə Sayibε εnaloku mə meyi:

⁵ «Nəloku afum aka Siyəη nse səyənε Yerusalem mə: Məməmən! Wəbε kam endeder nnə məyi mə!

Elare pəbotu.

Səfale səran s'endε kəron,

səfale səfət wan ka wεsem nwe wεηsare-sare mə.»

⁶ Kə acepse ɔn darəη ηaηkə kəyɔ təkə Yesu εnasom ηa mə.

⁷ Kə ηaηkerε səfale səran kə səfət, nse ηanadenşər suma səηan mə. Kə Yesu endε si kəron.

⁸ Kə afum alarəm akə ηanayi di mə, ηamper-peri suma səηan dəpə teta kəyek-yekəs kə. Alōma ηaccεp wara wa tək ηacper-perε kə wi dəpə.

⁹ Kənay ka afum kənckət kə tekirin, kə akə ηanacəme kə darəη mə ηackule-kule pəpəη: «Hosana, pələl pəyi Wan ka Dawuda! Kanu kəpocε pətət nwe enderεnε tewe ta Mariki mə! Hosana,* pələl peyi Kanu mofo meηeci ma dəKəm!»

¹⁰ Nte Yesu εmbεre Yerusalem mə, kə dare fəp dendikcε pacyiftεnε: «Ana wərkun wəkawε ɔyənε-ε?»

¹¹ Kə kənay ka afum kəloku: «Aηnabi Yesu wəka Nasaret ɔfɔ, dare da atəf ηa Kalile.»

*Yesu nde kəlo kəpəη ka Kanu
Mark 11.15-17; Luk 19.45-46*

21:5 Esayi 62.11 **21:5** Sakary 9.9 * **21:9** Hosana, cəArame = «Məyac su!» Toloku ta kəkər-koru Kanu tɔ.

¹² Kɔ Yesu ɛmbɛɛ nde kɛlɔ kɛpɔŋ ka Kanu disɛ. K'ɛmbɛlɛs akɔ ŋanccamɛs kɔ akɔ ŋancway dɛndo kɛlɔ kɛpɔŋ ka Kanu mɔ, pɛcgbal mɛsa ya asɛkpɛr pɛsam kɔ sɛbɛnc sa acamɛs ntantoriya.

¹³ Yesu pɛcloku ŋa: «Ancic: Pɛmar pawe kɛlɔ kem ɔDɛkɛtola Kanu da afum», mba kɔ nɛna nɛŋkafɛli dɛ tɔgbɔkɛnɛ ta calbante.»

¹⁴ Awa, atɔnɛŋk kɔ atɔtam kɛkɔt ŋalɔtɛrnɛ Yesu dɛndo kɛlɔ kɛpɔŋ ka Kanu, k'ɛntamɛs ŋa.

¹⁵ Mba kɔ pɛntɛlɛ alɔŋnɛ apɔŋ kɔ atɛksɛ sariyɛ s'aSuyif kɛnɛŋk kɛŋan mes mɛmɛ mocwosɛs cusu mɛmɛ nkɔn Yesu ɔncyɔ mɔ, kɔ awut akɔ ŋanckule-kulɛ kɛlɔ kɛpɔŋ ka Kanu disɛ mɔ: «Pɛlɛl pɛyi Wan ka Dawuda!»

¹⁶ Alɔŋnɛ kɔ atɛksɛ akakɔ ŋayif Yesu: «Mɛnɛ tɔkɔ ŋayi kɛloku mɔ?» Kɔ Yesu olukɛ ŋa: «Ɛy, ali katin nɛŋkaraŋ fɛ moloku mame: ɔMɛsɔŋɛ ali awut kɔ cɛnaka ŋakor-kor'ɛm?»

¹⁷ Kɔ Yesu ɛsak ŋa, k'owur dare disɛ k'ɔŋkɔ dare da Betani nde ɛnacepɛrɛnɛ pibi mɔ.

Yesu ontolanɛ pɛlɛc kɛtɔk

Mark 11.12-14,20-25

¹⁸ Dɔckɔsɔk bɛtɔbɛt ntɛ Yesu eyi kɛlukus dare mɔ, kɔ dor dɔyɔ kɔ.

¹⁹ K'ɛnɛŋk kɛtɔk ka yokom ya fik dɔpɔ, k'ɔlɔtɛrnɛ ki, mba bɔpɛr gbɛcɛrɛm y'ɛnabɛp. K'oloku kɛtɔk kaŋkɛ: «Ta pokom pɛdɛtɛrnɛ sɔ mɛna!» Gbɛncana babɔkɔ kɔ kɛtɔk kaŋkɔ kɛwos.

21:13 Moloku ma Aŋnabi Esayi kɔ Yeremy: Esayi 56.7; Yeremy 7.11

21:16 Yabura 8.3

²⁰ Nte aɕɛpsɛ ɔn darɛŋ ɲanɛŋk ti mɔ, kɔ pɛnciyanɛ ɲa ɲacyifnɛ: «Cɛke cɔ kɛtɔk ka fik nke kɛntam kɛwos gbɛncana bambɛ-ɛ?»

²¹ Kɔ Yesu oloku ɲa: «Kance icloku nu: Kɔ nɛntɔmpɛr kɛlan ta nɛnɛsɛrnɛ-ɛ, nɛntam kɛyɔ nte ayɔ kɛtɔk ka fik kanke mɔ. Mba icloku nu sɔ, ali nɛloku tɔrɔ tantɛ: «Mɛyotɛ nnɔ mɛkɔ mɛlɛmnɛ dɛkɛba», tatɔkɔ tenyi.

²² Nte o nte nɛntola Kanu kɛlan disɛ mɔ, nɛŋsɔtɔ ti.»

Deke kɛtam ka Yesu kɛɲyɛfɛ-ɛ ?

Mark 11.27-33; Luk 20.1-8

²³ Kɔ Yesu ɔŋkɔ nde kɛlɔ kɛpɔŋ ka Kanu. Pɛyi kɛtɔksɛ, alɔŋnɛ apɔŋ kɔ abeki a dɔtɔf ɲander ɲayif kɔ: «Kɛtam kɛrɛ kɔ mɛɲyɔnɛ mamɛ-ɛ? An'ɔsɔŋ ɛm kɛtam kanke-ɛ?»

²⁴ Kɔ Yesu olukɛ ɲa: «Ina sɔ, iyif nu toloku tin gbɔŋ, kɔ nɛlukɛ's'em toloku tatɔkɔ-ɛ, inloku nu kɛtam nke inyɔnɛ mamɛ mɔ.

²⁵ Deke kɛgbɛt dɛromun ka Saŋ kɛnayɛfɛ-ɛ? Dɛkɔm, ka dɛafum?» Kɔ afum aŋɛ ɲayɛfɛ kɛgbɛkɛlɛnɛ ɲacloku: «Kɔ sɛlukɛ: «Dɛkɔm», ɛɲyif su: «Ta ake tɔ nɛnatɔlanɛ Saŋ-ɛ?»

²⁶ Mba kɔ sɛlukɛ: «Dɛafum-ɛ», sɛŋnɛsɛ kɛnay ka afum, bawo fɛp fɛnacɛrɛ a Saŋ sayibɛ s'ɛnayɔnɛ.»

²⁷ Kɔ ɲalukɛ Yesu: «Sɛncɛrɛ fɛ.» Kɔ Yesu nkɔn oloku ɲa sɔ: «Ina sɔ, ifɔloku nu kɛtam nke inyɔnɛ mamɛ mɔ.»

Totubɛnɛ ta awut arkun mɛrɛŋ

²⁸ Kɔ Yesu endɛŋɛr sɔ: «Nɛcɛŋkɛl taruku tantɛ indeloku nu mɔ. Cɛke cɔ nɛncɛm-cɛmnɛ tɛta ti-ɛ? Wɛrkun ɛnayi nwe ɛnayɔ awut arkun mɛrɛŋ.

K'oloku Coco cən: «Wan kem, məkə məkə məbəc nde ngbənkalə ya wən wem.»

²⁹ Kə wan wəkəkə olukse kas: «Ala, ifəkə.» Nte tem tepic tencepər mə, kə abəkəc ηenkafələ wan, k'osumpər dəpə, k'ənəkə dəkəbəcə kas.

³⁰ Kə kas kəjan oloku sə toloku tin tayi Təηə. Kə wəkəkə owosene kas: «Awa Papa, inəkə,» mba enakə fə di.

³¹ Awa, icyif nu: Awut akanje merəη, wəre əyə tefan ta kas kəjan-ε?» Kə ηalukse: «Coco.» Kə Yesu oloku ηa: «Kance icloku nu: Abanəs dut kə aran ayi yamayama ηandekəgbontu nu kəbəre ka dəbe da dəkəm.

³² Bawo San Batis enader k'ementər nu dəpə dolompu da Kanu, kə nəntəlan kə. Mba awerəs dut kə aran ayi yamayama ηanalan kə, ali nte nənanənək ti mə, tenasəηe fə nu kəsəkpər bəkəc a nəlan kə.»

Totubcene ta abəc a ngbənkalə ya wən aləc

Mark 12.1-12; Luk 20.9-19

³³ Kə Yesu endenər sə: «Nəcənkal totubcene tələma: Wəka abəf wələma enabəf ngbənkalə ya wən. K'əsəne yi sanka han k'ənənəkər, k'ənəkay dəkəfəcəs da wən, k'encəmbər tetek tobumə, k'əsəη yəbəc ya abəf ηa ngbənkalə ya wən yayəkə afum aləma, ηatəηne kə akakə kəcsəη kə kəway, kə nkən owur k'ənəkə marənt.

³⁴ Tem ta kəpim ka yokom ya ngbənkalə tendəbər, kə wəka ngbənkalə osom acar ən nno abəc ən ηayi mə kəkəban təkə pəmar pəsətə mə.

³⁵ Kə abəc a ngbənkalə ya wən ηasumpər acar akanje, kə ηasut wəkin, kə ηandif wəka merəη kə ηanca-case wəka maas masar.

³⁶ Kɔ wəka ɲgbəkəlɔ osom sɔ acar alɔma, aɲe ɲanala ɲatas acɔkɔ-cɔkɔ mɔ. Kɔ abɛc aɲe ɲayɔ akakɔ tɔkɔ ɲanayɔ afum acɔkɔ-cɔkɔ akɔ pɛcuy pin payi mɔ.

³⁷ Tɛlpəs oɲ, kɔ wəka ɲgbɔɲkəlɔ osom wan kɔn yati, pɛclɔkɔnɛ: «Ntɛ wəkawɛ ɔyɔnɛ wan kem mɔ, ɲaɲkələlɛs kɔ!»

³⁸ Mba ntɛ abɛc ɲanəɲk wan nwɛ mɔ, kɔ ɲalokɛnɛ: «Wələk kɔn kɛ ɔfɔ, wəkawɛ! Nɔdɛr, padif kɔ, kɛ kəndeyɔnɛ kosu.»

³⁹ K'abɛc ɲasumpɛr wan nwɛ, kɔ ɲaɲkekɛrɛ kɔ saɲka sa ɲgbɔɲkəlɔ ya wɛn tadarəɲ, kɔ ɲandif kɔ.

⁴⁰ Awa, kɔ wəka ɲgbɔɲkəlɔ ya wɛn nwɛ endedɛrɛ, cəkɛ c'endeyɔ abɛc akanɛ-ɛ?»

⁴¹ Kɔ ɲalukɛ Yesu: «Pɛdifɔt ayenki bəkɛc akanɛ, ali nɔnɔfɔr ta pɔyɔnɛ ɲa. Pəsəɲ yɛbɛc ya ɲgbɔɲkəlɔ ya wɛn yayɔkɔ abɛc alɔma aɲe ɲande ɲacsəɲ kɔ yokom ya ɲgbɔɲkəlɔ tɛm ta kəpim ka yi mɔ.» ***

⁴² Kɔ Yesu eyif: «Nəɲkaraɲ fɛ ali katin dəYecicəs Yosoku yayɛ ba?

«Togbu mpɛ acəmbɛr kəlɔ ɲanace mɔ
pɛnader pɔyɔnɛ oɲ togbu pɔtɔt pa daco.

DəMariki tɛyɛfɛ,

tes tɔ ntɛ tenciyanɛ su dɔfɔr mɔ.»

⁴³ Ti tɔsəɲɛ ntɛ iloku nu: Kanu kəndebanɛr nu akip ɲa dɛbɛ dɔn, pəsəɲ ɲi afum acuru aɲe ɲendekomɛr yokom yɔtɔt mɔ.

⁴⁴ [Nwɛ ɛntɛmpɛnɛ togbu tatɔkɔ kəronɲ mɔ, ɛntɛpɛ. Məna nwɛ pɛntɛmpɛnɛ kəronɲ mɔ, pomputuk əm.»]†

⁴⁵ Ntɛ ɲane totubɛnɛ tatɔkɔ mɔ, alonɲɛ apəɲ kɔ aFarisi ɲancərə a tetanɲ tɔ Yesu eyi kəlɔku.

21:42 Yabura 118.22-23

† **21:44** Moloku ma werse 44 meyi fɛ

nde yecicəs yokur yolɔma.

⁴⁶ Kɔ ɲantɛn kəsumpər kɔ, mba kɔ ɲanesɛ kənay ka afum, bawo ɲanalan a sayibɛ sɔ Yesu ɛnayɔnɛ.

22

Totubcɛnɛ ta yeri ya kəsata ka kəgbaɲnɛ

Luk 14.16-24

¹ Kɔ Yesu ɔɲgbɔkərə sɔ kəlɔk-lokər afum aɲɛ dɔmotubcɛnɛ, k'oloku:

² «Dɛbɛ da dəkɔm dowurɛnɛ nte: Wəbɛ wəlɔma ɛnayi, nwe ɛnalompəs yeri yɛlarəm ya kəgbaɲnɛ ka wan kɔn wərkun mɔ,

³ k'osom acar ɔn kəkɔwe afum aɲɛ anawe kədetəɲnɛ kəgbaɲnɛ kaɲkɔ mɔ, mba kɔ afum aɲɛ ɲafati kəder.

⁴ K'ɔɲgbɔkərə sɔ kəsom acar alɔma pəcloku ɲa: «Nəkɔ nəlɔku aɲɛ awe mɔ: Awa alip kəlompəs yeri, mura mem kɔ cəna cəboɲu cem andifət ci. Yɛbɛc ya kəlompəs yeri fəp yelip. Nəder pawoləs!».

⁵ Mba aɲɛ awe kəsata kaɲkɔ mɔ, ɲancɛm-cɛmnɛ fɛ kəkɔwosɛ kəwe kaɲkɔ: Kɔ wəkin ɔɲkɔ dale dɔn, kɔ wəkɔ nkɔn ɔɲkɔ dəyɛbɛc yɔn ya kəcəməs.

⁶ Kɔ alɔma ɲasumpər acar kɔ ɲayɔ ɲa pələc kɔ ɲandif ɲa.

⁷ Kɔ mɛtɛlɛ meyi wəbɛ, k'osom asɔdar ɔn ɲakɔ ɲamələk adifət afum akanɛ ɲacɔf sɔ dare danan.

⁸ Kɔ wəbɛ oloku acar ɔn: «Yɛbɛc ya kəlompəs ka yeri ya kəgbaɲnɛ yelip, mba aɲɛ awe mɔ, ɲayɔ fɛ delel dedinɛ yeri yayɛ.

⁹ Nəkɔ nde sɔpɔ səkɔ səwur dare mɔ, nəwe nwe o nwe nəmbəp di mɔ, pədetəɲnɛ kəgbaɲnɛ kaɲkɛ.»

¹⁰ Kɔ acar ɲalɛk dɔpɔ, kɔ ɲalɔɲka afum atət kɔ alɛc aɲɛ ɲanabəp di mɔ fəp, nte tɔɲsɔɲɛ akut ɲɛlarɛ afum aɲɛ awe kəgbaɲnɛ mɔ tɛp.

¹¹ Kɔ wəbɛ ɛmbɛrɛ pəcməmən aɲɛ ewe mə, kənəɲk wərkun wəlɔma nwe ɔntəbɛrɛnɛ yamos ya kəsata mə.

¹² K'eyif kɔ: «Wanapa, cəke cɔ məntam kəbɛrɛ nnɔ ta məmbɛrɛnɛ yamos ya kəsata-ɛ?» Mba wərkun nwe ɛnalukɛ fɛ wəbɛ toloku o toloku.

¹³ Kɔ wəbɛ oloku abəc ɔn: «Nəkot kɔ wɛcək kɔ waca, nələm kɔ nde kubump ka dabanɲka disrɛ. Difo kəbok kɔ kəɲaɲərənɛ sek kəndekɔyi.»

¹⁴ Kɔ Yesu endenɲər: « Afum alarəm ɲɔ Kanu kəɲwe kəbɛrɛ dɛbɛ da dəkəm, mba apic ɲanayek-yek kəbɛrɛ ka di.»

Dut ndɛ asəɲ wəbɛ Sesar mə

Mark 12.13-17; Luk 20.20-26

¹⁵ Mata maməkɔ disrɛ k'aFarisi ɲalɔɲkanɛ, ɲactɛn kəcəpɛ Yesu towul ɲasumpər kɔ dəmoloku.

¹⁶ K'aFarisi ɲasom acəpɛ aɲan darəɲ alɔma kɔ afum a Herodu. Kɔ afum akakɔ ɲaɲkɔ ɲaloku Yesu: «Wətəkɛ, səncərə a məɲloku kance, kɔ məntəkɛ afum dɔpɔ da Kanu kance fəp disrɛ, kənesɛ ka fum kəfɔyi əm, bawo məfɔməmən dəkəcəmə daɲan.

¹⁷ Awa məloku su tɛcɛm-cɛmnɛ tam: Sariyɛ səwosɛ su kəsəɲ Sesar wəbɛ wəka tɔf ya Rom dut ba, ka səwosɛ fɛ su kəsəɲ kɔ di?»

¹⁸ Mba Yesu nwe ɛnacərə mɛcɛm-cɛmnɛ maɲan mɛlɛc mə, olukɛ ɲa: « Nəna abanɲɛnɛ kəlomp! Ta ake tɔ nəɲwakəs em-ɛ, ?

¹⁹ Nəmentər im gbələɲ mbɛ aɲsəɲɛ dut mə.» Kɔ ɲaɲkɛrɛ kɔ gbələɲ ba pəsam papəkɔ.

²⁰ Kɔ Yesu eyif ɲa: «Alulu kɔ yecic ya ana yeyi gbələɲ bambɛ kəron-ɛ?»

²¹ Kɔ ɲalukɛ Yesu: «ɲa wəbɛ Sesar ɲɔ.» Kɔ Yesu oloku ɲa ntɛ: «Nəsɔɲ Sesar yɔkɔ yɔyɔnɛ yɔn mɔ, kɔ Kanu sɔ yɔkɔ yɔyɔnɛ yɔn mɔ.»

²² Ntɛ ɲane moloku mmɛ mɔ, kɔ pənciyanɛ ɲa kɔ ɲasak Yesu kɔ ɲaɲkɔ.

Ayif Yesu teta kəyɛfɛ ka afi daco

Mark 12.18-27; Luk 20.27-38

²³ Awa aSadisi ɲancɛm-cɛmnɛ a kəyɛfɛ defɪ kəyi fɛ. Dɔsɔk din dadɔkɔ kɔ alɔma ɲa daco ɲander ɲayif Yesu:

²⁴ «Wətəkɛ, Musa ɛnaloku: Kɔ fum efi ta ɔyɔ wan, mba pəsak wəran-ɛ, pəmar wɛnc ka wəfi pələk wəcəbokəra wəkakɔ pənɛncɛ, pəsɔɲ wɛnc wəfi yu-ruya.

²⁵ Məcəɲkəl, awɛnc camət-mɛrəɲ alɔma ɲanayi su daco. Kɔ wəcɔkɔ-cɔkɔ ɛnɛncɛ k'efi, mba ntɛ ɛnatɔyɔ wan mɔ, k'ɛsakərə wɛnc wəran kɔn.

²⁶ Tatɔkɔ tɔ wəka mɛrəɲ, wəka maas haɲ wəka camət-mɛrəɲ ɲanafis-fis sɔ fəp, ali wəkin ɛnasak fɛ wan.

²⁷ Ntɛ dɛwɛnc aɲa delip kəfis-fis mɔ, kɔ wəran ɛfəntərə sɔ k'efi.

²⁸ Awa, sɔyif əm: Dɔsɔk ndɛ afi ɲandekəyɛfɛ defɪ mɔ, awɛnc aɲa akanɛ camət-mɛrəɲ an'endekɔsɔtɔ wəran wəkawɛ-ɛ? Bawo fəp faɲan ɲananɛncɛ kɔ!»

²⁹ Kɔ Yesu olukɛ ɲa: «Mɛcɛm-cɛmnɛ monu mɔsɔk fɛ, bawo nəncərə fɛ Yecicəs Yosoku, nəncərə fɛ sɔ fənɔntər fa Kanu.

³⁰ Dɔsɔk ndɛ afi ɲandekəyɛfɛ dɔdefɪ mɔ, wərkun ɔfɔnɛncɛ, wəran ɔfɔlɔ, afɔdekɔ pacnɛncɛ pəmɔ mɛləkɛ mmɛ meyi dəkɔm mɔ.

31 Nte tɔyɔnɛ ta afum kɔyɛfɛ dɔdefi mɔ, nɛnakaraŋ fɛ nte Kanu kɛnaloku nu dɔYecicɛs Yosoku mɔ ba?

32 «In'ɔyɔnɛ Kanu ka Abraham, ka Siyaka, kɔ ka Yakuba.» Bafɔ Kanu ka afi k'ɔyɔnɛ, mba ka ayi wɔyɛŋ.»

33 Cusu cɛnawos kɛnay ka afum aɲɛ ɲanccɛŋkɛl mɛtɔksɛ mɔn mɔ.

*Tosom nte tɛmbɛk dɔkɔcɛmɛ mɔ
Mark 12.28-34; Luk 10.25-37*

34 Nte aFarisi ɲane a moloku mɔtɔt ma Yesu mɔsɔɲɛ aSadisi kɛmɛp cusu mɔ, kɔ ɲa sɔ ɲalɔŋkanɛ.

35 Wɛkin ɲa daco nwe ɛnɔyɔnɛ wɔtɔksɛ sariyɛ s'aSuyif mɔ, eyif Yesu toloku nte tɔɲsɔɲɛ pɛcɛpɛ kɔ towul mɔ pɛsumpɛr kɔ dɛmoloku mɔn:

36 «Wɔtɔksɛ, tosom tere tɛbɛk dɔkɔcɛmɛ mosom ma sariyɛ fɛp daco-ɛ?»

37 Kɔ Yesu oluksɛ kɔ: ««Mɛbɔtɛrɛ Mariki Kanu kam abɛkɛc ɲam fɛp, afɔkɛl ɲam fɛp kɔ mɛcɛmɛmɛnɛ mam fɛp.»

38 Tatɔkɔ tɔyɔnɛ tosom tɔpɔŋ tɔcɔkɔ-cɔkɔ.

39 Tosom ta mɛrɔŋ nte towurɛnɛ tɔcɔkɔ-cɔkɔ mɔ: «Mɛbɔtɛr wɛnc ɛm pɛmɔ tɔkɔ mɛmbɔtɛrɛnɛ mɔ.»

40 Sariyɛ sa Musa kɔ mɛtɔksɛ ma sayibɛ fɛp, mosom mamɔkɔ mɛrɔŋ mɔ mɛɲgbɛkɛrɛnɛ.»

Wɔbɛ nwe Kanu kɔyɛk-yɛk mɔ ɔyɔnɛ Wan ka Dawuda

Mark 12.35-37; Luk 20.41-44

41 Nte aFarisi ɲanalɔŋkanɛ mɔ, kɔ Yesu eyif ɲa toloku nte:

⁴² «Cəke cə nəncəm-cəmnə teta Krist wəbə nwə Kanu kəyək-yək mə-ε? Wan ka ana əfə-ε?» Kə aFarisi ɲaloku: «Wan ka Dawuda əfə.»

⁴³ Kə Yesu eyif ɲa: «Ak'enasəɲə Dawuda kəwə Krist «Mariki mem»-ε? Nte Amera ɲa Kanu yati ɲenasəɲə Dawuda kəloku dəYecicəs Yosoku:

⁴⁴ Kə Mariki Kanu oloku Mariki mem: Məder mənd'em nnə kəca kem kətət, haɲ iclip kəboc aterənə am wəcək wam dəntəf.

⁴⁵ Kə Dawuda ewe ɲə Krist wəbə nwə Kanu kəyək-yək mə «Mariki mem»-ε, cəke cə wəkakə ɛntam sə kəyənə wan ka nkən Dawuda-ε?»

⁴⁶ AFarisi dacə, ali wəkin ɛnatam fə kəlukkə kə toloku. Kələk dəsək dadəkə, ali fum eyenk fə sə abəkək kəyif kə toloku.

23

*Yesu embeɲə atəksə sariyə s'aSuyif kə aFarisi
Mark 12.38-40; Luk 20.45-46*

¹ Kə Yesu ɛɲkafələ k'oloku kənay ka afum kə acəpsə ɔn darəɲ:

² «Atəksə sariyə s'aSuyif kə aFarisi, ɲatəmpər kətəksə sariyə sa Musa.

³ Ti disrə nəcyə, nəccəmə sə mes məkə ɲande ɲacloku nu mə fəp, mba ta nəcyə mes məkə ɲaɲyə mə, bawo təkə ɲaɲloku mə, bafə itə ɲaɲyə.

⁴ ɲa ɲaɲsarəsər afum yesarə nyə yoncuca kəsarə mə, mba ɲasərka ɲafəwosə ali tələr taɲan tin kəgbuɲənə yi.

⁵ ɲayə məyə maɲan fəp nte təɲsəɲə afum ɲanəɲk ɲa mə. Ti disrə, ɲambəksəs səbə səɲan səkə ɲaɲkotnə

dətoḃu kə dəkəca mə, ɲawəkələs tegberi suma səɲan cəsək.

⁶ Pəmbət ɲa kəcndɛ mofo mmɛ aɲlələs ɲa dəkədi yeri dəcəsata mə, kə səcəm səkirin sa dəkətola Kanu daɲan.

⁷ Pəcbət ɲa sɔ nte aɲyif ɲa pələl mofo mmɛ ambəpsɛnɛ mə, afum ɲacwɛ ɲa «Atəksɛ.»

⁸ Mba nəna, ta nəwosɛ pawɛ nu «Atəksɛ,» bawo dəwɛnc aɲa dɔ nəyɔ fəp fonu, Wətəksɛ wəkin gboɲ nəyɔ.

⁹ Ta nələləs nwɛ o nwɛ doru dandɛ nəwɛ wəkayɪ «Papa» bawo, wəkin gboɲ əyɔnɛ Papa konu, Papa mpɛ peyɪ ndɛ dəkəm mə.

¹⁰ Ta nəwosɛ pawɛ nu «abɛ,» bawo wəbɛ wəkin gboɲ nəyɔ nwɛ əyɔnɛ Krist mə.

¹¹ Nwɛ embək dəkəcəmɛ nu dacɔ mə, pəmar pəyɔnɛ wəbəcɛ konu.

¹² Nwɛ endeyoknɛ mə, andetorɛ kə. Nwɛ endetorɛ banca mə, andepɛnɛ kə.»

Yesu ɛnal atəksɛ sariyɛ s'aSuyif kə aFarisi teta kətəloḃp kəɲan

Mark 12.40; Luk 11.39-52; 20.45-47

¹³ «Pələc peyɪ nu nəna atəksɛ sariyɛ s'aSuyif kə aFarisi, nəna abanɛnɛ kəloḃp, nəɲgbətər afum kumba ka dəbɛ da dəkəm, nəna nəfəbɛrɛ, nəwosɛ fɛ sɔ akə ɲafan kəbɛrɛ mə ɲabɛrɛ.

[
14 *]

* **23:14** Yecicəs yokur yələma yendenər moloku mame: «Pələc peyɪ nəna atəksɛ sariyɛ s'aSuyif kə aFarisi, nəna abanɛnɛ kəloḃp! Nəbanər wəbɔ wa acəbokəra, kə nəctola sali səbolu nte tənɟəɲɛ afum ɲafotɛ kəcəm-cəmɛnɛ a afum atət nəyɔnɛ. Teta kabanɛnɛ kələc nkɛ nəndəsətɔ kiti kəyɛɲki!»

15 Pələc peyi nəna atəksə sariyə s'aSuyif kə aFarisi, nəna abanənə kəlomp! Nəckə marənt kəba kə antəf kəronj kəten ka fum wəkin nwe nəmbərsənə dinə donu mə, kə fum wəkəkə elip on kəbəre-ε, nəsonjə kə kəyonə wan wəka yahanama pəcepər nəna kəmerənj.

16 Pələc peyi nu, nəna atənəjk anjə nənəkətenə afum mə! Nən'entəksə a kə fum endərəm kələ kəronj ka Kanu-ε, a təyo fə tələm o tələm. Mba kə təyonə pəderəm kəma ka kələ kəronj ka Kanu-ε, tatəkə təyo tes.

17 Atonkulu atənəjk! Ca yayəkə mərənj pere pəbək dəkəcəmə-ε, kəma ba, ka kələ kəronj ka Kanu nke kəmpus kəma mə?

18 Kə fum oloku nu kəderəm tetek tolonjə Kanu-ε, təyo fə tes. Mba kə fum endərəm polonjə mpə pəfantərə tetek tolonjə kəronj mə-ε, ti təyonə tes.

19 Nəna atənəjk! Pəre pəbək dəkəcəmə-ε: polonjə ba, ka tetek tolonjə mpə pompus pi mə?

20 Awa icloku nu: Məna nwe mənderəm tetek tolonjə mə, mənderəm pi kə ca yəkə yeyi pi kəronj mə fəp.

21 Məna nwe mənderəm kələ kəronj ka Kanu mə, mənderəm ki kə Kanu nke kəyi ki disre mə.

22 Məna nwe mənderəm kəm mə, mənderəm dəcəm da dəbə da Kanu kə Kanu nke kəndə di mə.

23 Pələc peyi nu, nəna atəksə sariyə s'aSuyif kə aFarisi, nəna abanənə kəlomp! Nəcsənj farilə fa mərket, fa malənjkan kə fa ces, nəcsak mes məkə melelə dəsariyə sa Kanu mə, mes mme mə pəmar nəcyə: Nəmentər dolompu, nənfər kə kəsektərne teta Kanu, mba ta nəcsak kəcyə melpəs məkə.

24 Nəna atənəjk aŋe ɲaŋkətenɛ afum mə! Tococ pə nəyi kəcɛɲ-cɛɲ, nəcmɛr yəkəmə!

25 Pələc pəpəɲ peyi nu, nəna atəkse sariye s'aSuyif kə aFarisi, nəna abanɛnɛ kəlomp! Nən'ɛɲyakəs takəronɲ ta apət kə apəlet, mba yɛlarɛ yeri nyɛ nəmbaɲsər afum deke kə dɛcɛlək disrɛ mə.

26 WəFarisi wətənəjk! Məsəkəs kərəsna tedisrɛ ta apət, ntɛ tɔɲsɔɲɛ takəronɲ ta ɲi təsək sə mə.

27 Pələc peyi nu, nəna atəkse sariye s'aSuyif kə aFarisi, nəna abanɛnɛ kəlomp! Cufu ncɛ ancɛm pəfer mə cə nəwureɛnɛ. Cətesɛ todoru mba cɛlarɛ bɛnt ya afum afi kə ca yətəsək fəp.

28 Nəna sə todoru nəwureɛnɛ alompu nnə afum ɲayi mə, mba tedisrɛ tonu, nəlarɛ kəbanɛnɛ kəlomp kə pələc.

29 Pələc peyi nəna, atəkse sariye s'aSuyif kə aFarisi, nəna abanɛnɛ kəlomp! Nəna aŋe nəncəmbər cufu cətət ca sayibɛ, nəcnɛkəs cufu ca alompu mə,

30 nəcloku: «Pəcyɔnɛ a sənayi doru tɛm ta atem asu-ɛ, kə sənənəjkəl fɛ ɲa kəlonɲ ka mecir ma sayibɛ alarəm.

31 Ti disrɛ nəna yati nəwosɛ sɛdɛ sa ti, a nən'ɔyɔnɛ yuruya ya akə ɲanadifət sayibɛ mə.

32 Awa, nələpəs təkə atem anu ɲanacop mə!

33 Nəna bok, dokom da ɲkisin! Cəke cə nəntam kəyɛksər kiti ka yahanama-ɛ?

34 Nəcəɲkəl: Ti təsɔɲɛ ntɛ indesom Sayibɛ, afum acərə kəkətenɛ mes kə atəkse sariye nnə nəyi mə. Nəndekə nəcdif aləma nəccanɲ ɲa tək yɛpəmpəl kəronɲ, nəcsutɛ akə mərəɲkən ndɛ wələ wonu wa dəkətola Kanu, nəcbɛləs ɲa dəsədare kə sədare,

³⁵ nte tənşəne, nəsarə teta mecir ma alompu məkə moloŋe kəyefe tēm ta Abəl wəlompu haŋ kəbəp ka mecir ma Sakary wan ka Barasi, nwe nənadif aŋgbip kə tetek toloŋe daco mə.

³⁶ Icloku nu kance: Kəloŋ ka mecir maməkə fəp deŋemp dandə dendesarə ki.»

Yesu ombok teta Yerusalem

Luk 13.34-35

³⁷ «Yerusalem, Yerusalem, mənə nwe mənədif sayibe mə, məcca-cas akə Kanu kəŋsom nnə məyi mə, isep pəlarəm kəloŋka ka awut am pəmə nte acəkə ŋokombəra ŋoŋloŋka awut banca ya ŋi dəntəf mə! Mba mənawose fe ti.

³⁸ Awa nəcəŋkəl! Andesakərə nu kələ konu kəyə fos.

³⁹ Bawo, icloku nu, nəfəsəŋək im haŋ tēm nte nənde nəcloku: «Kanu kəpocə pətət nwe enderene tewə ta Mariki mə!»

24

Yesu oloku a andeləsər kələ kəpəŋ ka Kanu

Mark 13.1-37; Luk 21.5-36

¹ Nte Yesu owur nde saŋka sa kələ kəpəŋ ka Kanu pəckə mə, kə acəpse ɔn darəŋ ŋander ŋasəŋe kə kəkəkce təcəmbər ta kələ.

² Mba kə Yesu olukse ŋa: «Nəŋəŋək mame fəp? Icloku nu kance, tasar pəfədedeŋse tasar kəroŋ nnə, mpe antədewuŋ mə.»

Pələc kə kətərəs nke kəyi kəder mə

Mark 13.5-13; Luk 21.8-19

³ Tēm nte Yesu ənandə tərə ta Tək ya Olif mə, kə acəpse ɔn darəŋ aləma akə ŋanasol kə nkən mə, kə

ɲayifət kɔ ɲabɔkərə: «Məloku su, tɛm tere tɔ kələsər ka kələ kəpən ka Kanu kəndeder-ɛ? Tɛgbəkərə tere tendementər su a kəder kam nərɔ da debeki dam disrɛ kɔ kəlɪp ka doru kəmbəp-ɛ?»

⁴ Kɔ Yesu olukɛ ɲa: «Nəkembərɛ ta nwɛ o nwɛ pəsənɛ nu kəsələ!

⁵ Afum alarəm ɲandeder ɲaɕbaɲɛnɛ kəbəcɛ tewe tɛm, ɲacloku: «In'oyənɛ Krist wəsom wəka Kanu!» ɲandetalər kənay ka afum alarəm.

⁶ Nəndene pacloku teta kəwan nkɛ kələtərɛ mɔ, kɔ pəyənɛ fɛ ti pacfor teta ki-ɛ: Nəkembərɛ ta nənesɛ, mɛnɛ mes maməkɔ meyi, mba tɔfɔdeyənɛ kərəsna kəlɪp ka doru.

⁷ Bawo afum a atɔf ɲələma ɲandeyɛfərənɛ kɔ afum a atɔf ɲocuru, dəbɛ dəyɛfərənɛ kɔ dəbɛ. Dor kɔ antɔf kəyɪkɛ kɔ yendeyi mofɔ mɛlarəm.

⁸ Maməkɔ fəp mendeyi pəmɔ kəcop ka pucuy pa dokombərə.

⁹ Awa, tɛm tatəkɔ t'andɛlək alɔma nu daco pabər pəcuca dəwaca, padɪf alɔma nu daco. Afum a tɔf ya doru fəp ɲandeter nu teta tewe tɛm.

¹⁰ Tɛm tatəkɔ, acɛpsɛ darənɛ alarəm ɲandesak kəgbəkər kələɲ Kanu, ɲandetiɲkərənɛ, ɲandeterɛnɛ aɲɛ kɔ akɔ.

¹¹ Sayibɛ sa yem səlarəm səndewur, ɲasənɛ afum alarəm kəsələ.

¹² Pələc pende pɛcsamsər kəsamsər dɛm, təsənɛ kəbətər ka afum alarəm kəfər.

¹³ Mba nwɛ endebəkɛnɛ ti haɲ mes maməkɔ melip mɔ, Kanu kəndeyac kɔ.

¹⁴ Andedənɲ Kibaru Kətɔt ka dəbɛ da Kanu ndɛ dender mɔ afum a tɔf ya doru fəp, ntɛ tənɲənɛ aɲɛ ɲantɔcərə Kanu mɔ fəp ɲane ti. Awa, tɛm tatəkɔ

tendecəpər a doru dedelip.

Pucuy pendebəkər afum alarəm

Mark 13.14-23; Luk 21.20-24

¹⁵ Kə nəndenəjk pəyikyik pələsər pəpən mpe Mariki enter mə, mpe Sayibə Daniyel ənaloku ta pi mə, pəndə nde kəfo kəsoku-ε, pəmar wəkaran ka buk bambə pəcərə tante:

¹⁶ Awa təm tatəkə, aje ηandeyi atəf ηa Yude mə, pəmar ηa ηayəkse ηapə mərə kəron.

¹⁷ Nwε tendebəp pəyi dabanjka mə, ta pəbərə kələ kən disrε kəkələk paka,

¹⁸ nwε tendebəp pəyi dalε mə, ta pəlucus nde ndərən kəkələk duma dən.

¹⁹ Pucuy pere pə tendeyənε abəkəs, kə aje ηande ηacməsər dəsək dadəkə mə!

²⁰ Nətola Kanu ta kəyəkse konu kədesurənε dərən kə pəyənε fε ti-ε dəsək da kəηesəm ndε ampuse Mariki mə.

²¹ Bawo pəcuy pendebək, mpe pəntatəyi kəyεfε ntε doru doncop mə han ndəkəl, fum o fum afəsətərəs pəmə tatəkə.

²² Mba Kanu pənatəbelər mataka maməkə-ε, k'ali fum əfədekəfis. Mba ənabelər mataka maməkə teta akə ənayək-yək mə.

²³ Awa, kə wələma oloku nu: «Məcəjkəl: Krist eyi nnə,» kə pəyənε fε ti, «Eyi nde-ε,» ta nəlan wəkayi.

²⁴ Bawo abanənε kəyənε Krist kə sayibə sa yem ηandewur doru, ηacyə məgbəkərə məwεy-wεy kə mes mocuca, ntε tənənε, kə təyənε ηactam-ε, ηatalər akə Kanu kənayək-yək mə.

²⁵ Nəcəjkəl! Iloku nu mes mame ta məntabəp-ε.

²⁶ K'aloku nu: «Nənəŋk, eyi nde dətəgbərə-ε,» ta nəyeksərne kəkə di. K'aloku nu sɔ: «Nənəŋk, eyi nde dukulo dəfət dəkə-ε,» ta nəlan ti.

²⁷ Ti disre kəder ka Wan ka Wərkun kəndeyi pəmɔ təkə pəmot pəŋsəŋ pəwan̄kəra kəyefe nde dec dɛmpɛ han̄ nde dɛŋkalɛ mɔ, tatəkə tɔ kəder ka Wan ka Wərkun kəndeyi.

²⁸ Nde kəbel kəndeyi mɔ, difɔ yɔfən yendebəpsɛnɛ.»

*Kəder ka Wan ka Wərkun
Mark 13.24-27; Luk 21.25-28*

²⁹ Kɔ Yesu enden̄ər sɔ: «Kɔ pucuy pa mata maməkə pencepər-ε, gbəncana babəkə bɔ pəndeyɔ gbərəp, ɲof ɲɔfɔdesɔmar, cɔs cəndetɛmpɛnɛ kəyefe dəkəm, fənɔntər fa kəm fəndeyikɛ.

³⁰ Tɛm tatəkə, tɛgbəkərə ta kəder ka Wan ka Wərkun tendewur dəkəm, afum a tɔf ya doru fəp ɲandekule-kule kənɛsɛ disre, ɲacnəŋk Wan ka Wərkun pəcder kəp kəron̄ dəfənɔntər kɔ nərə da debeki dən̄ disre.

³¹ Tɛgbəkərə ta kəfula luk pəpəŋ itɔ Wan ka Wərkun endesom mɛlɛkɛ ɔn, məkə molon̄ka afum an̄ɛ eyek-yek mon̄kubut man̄kələ ma dəKɔm kɔ antɔf mɔ.»

*Tɛtəkəs ta totubcɛnɛ ta kətək ka fik
Mark 13.28-31; Luk 21.29-33*

³² Kɔ Yesu enden̄ər sɔ: «Nətəkəs totubcɛnɛ ntɛ kətək ka fik kəmentər mɔ: Kɔ wara wa ki wɛcan̄k wɛlɛŋk-ε, nəcərə a kətən̄ kəlɔtərne.

³³ Nəna sɔ, kɔ nəndenəŋk maməkə fəp-ε, nəcərə a Wan ka Wərkun ɔlɔtərne yati.

³⁴ Kance icloku nu: Deɛmp dandɛ dɔfɔcepər ta maməkɔ fəp meyi-ɛ.

³⁵ Kɔm kɔ antɔf yendesɔɛ mba moloku mem mɔfɔdesɔɛ.»

*Kanu gbɔcərɛm kɛcərɛ tɛm ntɛ doru dendelip mɔ
Mark 13.32-37; Luk 17.26-30,34-36*

³⁶ Kɔ Yesu oloku sɔ: «Ntɛ tɔyɔnɛ ta dɔsɔk kɔ tɛm ntɛ doru dendelip mɔ, ali fum ɛncərɛ fɛ ti, ali mɛɛkɛ kɔ Wan ɲa sɔ ɲancərɛ fɛ ti, mɛnɛ Papa sona gbɔɲ.

³⁷ Tɔkɔ tɛnayi tɛm ta Nuha mɔ, itɔ teta kɛder ka Wan ka Wɛrkun kɛndeyi.

³⁸ Ta mataka ma kutup mɛntabɛp-ɛ, afum ɲancdi yeri ɲacmun, ɲacnɛncɛ, ɲacsɔɲ sɔ awut aɲan aran kɛɔ haɲ dɔsɔk ndɛ Nuha ɛnabɛrɛ debil mɔ,

³⁹ ali kɛcɛmcɛmnɛ kɛfɛt kɛnayi fɛ ɲa haɲ kɔ kutup kɛnder kɔ kɛmɛɔk ɲa fəp. Tatɔkɔ tɔ kɛder ka Wan ka Wɛrkun kɛndeyi.

⁴⁰ Awa, kɔ arkun mɛrɔɲ ɲayi dɛɛ-ɛ, palɛk wɛkin, pasak wɛka mɛrɔɲ.

⁴¹ K'aran mɛrɔɲ ɲayi kɛbifɛli mɛɲgbɛn-ɛ, palɛk wɛkin, pasak wɛka mɛrɔɲ.

⁴² Nɛkɛmbɛrnɛ, nɛckar kɛder kɔn tɛm fəp, bawo nɛncərɛ fɛ dɔsɔk ndɛ Mariki monu mɛndɛder mɔ.

⁴³ Nɛcərɛ ti belbel kɔ tɔyɔnɛ wɛka kɛɔ pɛcərɛ tɛm ta pibi ntɛ wɛke ɛndɛder dɛɲkiyɛ mɔ, wɛka kɛɔ ɔfɔdirɛ pɛcbum kumba kɔn ta wɛke pɛbɛrɛ kɛɔ kɔn disrɛ.

⁴⁴ Ti tendesɔɲɛ nɛna sɔ kɛcɛmɛ nɛckar, bawo Wan ka Wɛrkun ɛndɛder tɛm ntɛ nɛntɔyɔ kɔ amera mɔ.»

*Wɛmarɔs wɛlompu kɔ wɛtɔlomɔ
Luk 12.41-48*

⁴⁵ Kɔ Yesu endenɔar sɔ: «Wɛmarɛs wɛsektɔrne mariki mɔn pɛkɔtɛnɛ amera kɛyɔ pɛtɔt wɛre mariki mɔn ɛncɛmbɛr kɛyɔnɛ wɛbum ka amarɛs alpɛs akɔ, pɛcsɔŋ ŋa yeri tɛm ntɛ pɛmar mɔ-ɛ?

⁴⁶ Pɛbɔt wɛmarɛs wɛkakɔ mariki mɔn mender mɛbɔp kɔ pɛsumpɛr yɛbɛc nyɛ ɛnasom kɔ mɔ!

⁴⁷ Kance icloku nu: Mariki mɔn mendesɔŋɛ kɔ kɛyɔnɛ ka wɛcɛmbɛr-cɛmbɛr ka daka dɔn fɛp.

⁴⁸ Mba kɔ wɛmarɛs olokunɛ dɛbɛkɛc: «Mariki mem ɛntayɛfɛ fɛ kɛdɛr,»

⁴⁹ k'oncop kɛsut anapa ɔn amarɛs, pɛcdi yeri pɛcmun kɔ acis,

⁵⁰ mariki ma wɛmarɛs wɛkakɔ endeder dɔsɔk ndɛ ɔntɔyɔ kɔ amera mɔ, dɛc ndɛ ɔntɔcɛrɛ mɔ,

⁵¹ pɛbɛlɛs wɛmarɛs wɛkakɔ, pɛtɔrɛs kɔ pɛpɔŋ pɛmɔ tɔkɔ antɔrɛs abanɛnɛ kɛlomp mɔ. Difɔ kɛbok kɛndeyi kɔ kɛŋanɔrɛnɛ sek.

25

Totubcɛnɛ ta ayecɛra wɛco atɔcɛrɛ arkun

¹ Kɔ Yesu ɔntɔcɛr ntɛ: «Tɛm tatɔkɔ, dɛbɛ da dɛkɔm dɛndeyi pɛmɔ ayecɛra wɛco atɔcɛrɛ arkun anɛ ŋanalek sɛlamp kɛkɔbɛpɛnɛ kɔ wɛgbaŋnɛ mɔ.

² Kɛcamɛt kɛnayi ŋa dacɔ anɛ anatonɲkulu mɔ, kɛcamɛt kɛyi ŋa dacɔ anɛ ŋanacɛrɛ kɛkɔtɛnɛ mes mɔ.

³ Ntɛ atonɲkulu ŋancɛk sɛlamp sɛŋan mɔ, ŋanalekɛnɛ fɛ moro.

⁴ Mba ayecɛra anɛ ŋanayɔnɛ acɛrɛ mes mɔ, ŋalɛk sɛlamp sɛŋan kɔ ŋantɔmpɛrɛnɛ sɔ nwe o nwe moro dɛtɔkɔbɔ.

⁵ Ntɛ wɛgbaŋnɛ oncwon kɛdɛr mɔ, kɔ mere mɔyɔ ayecɛra kɔ ŋandirɛ.

⁶ Cεkcεk cādebāp, kō dim dowur: «Awa wāgbāṇne ender, nāwūr pade pafayne kō!»

⁷ Kō ayecāra aṇe ṇantime kō ṇayefe kēlompās sēlamp saṇan.

⁸ Kō ayecāra atonkulu ṇaloku acāre kākōtene mes: «Nāpocε su moro monu, kēnime kō sēlamp sosu sēnde!»

⁹ Mba kō acāre kākōtene mes ṇaloku: «Moro mosu mōfōtāṇne su kēmōtene kō nāna. Mēne nākō nāway nda akō ṇancamās moro mō!»

¹⁰ Ayecāra atonkulu ṇawur kākōway moro, kō wāgbāṇne ender kumunt kēṇan darēṇ, ayecāra aṇe ṇanayi di mō ṇamberε dukulō kō wāgbāṇne, k'ancan kumba.

¹¹ Nte pāwon pipic mō, kō ayecāra atonkulu ṇander kō ṇaloku: «Mariki, mariki, mēgbite su!»

¹² Mba kō mariki mme moluksε ṇa: «Kance icloku nu: Incāre fe nu!»

¹³ Ta nāpālār, bawo nāncāre fe dōsōk, nāncāre fe sō dec ndε indeder mō.»

Totubcεne ta amarās maas

Luk 19.11-27

¹⁴ «Towurene pāmō nte wērkun εṇfan kākō marānt, pāwe acar ɔṇ pāsōṇ ṇa daka dōn kāmēṇk.

¹⁵ Kō wērkun nwe ɔsōṇ kēma kilo kēcāmāt wēcar wēkin, k'ɔsōṇ wēka mērēṇ kilo kāmērēṇ, kō wēka maas kilo katin, nte ɔsōṇ nwe o nwe tōkō entam mō, k'eyefe k'ōṇkō marānt.

¹⁶ Wēcar nwe anasōṇ kāmēṇk kēma kilo kēcāmāt mō, ɔṇkō pēckafēli-kafēli waca haṇ k'ɔsōtō sō kēma kilo kēcāmāt kēdenjārne.

17 Nwε anasōṅ kema kilo kāmērāṅ kāmēṅk mō, nkān sō ōṅkō pāckafēli-kafēli waca haṅ k'ōsōtō kema kēdenjārne kilo mērāṅ.

18 Wācar nwε anasōṅ kema kilo kin kāmēṅk mō, ōṅkō pākay abi k'ēmēṅk pāsam pa mariki mōn.

19 Ntε pāwōn mō, kō mariki māṅan mender, k'ewe acar aṅε kēdeyif ṅa ntε ṅambēc mō.

20 Wācar wākō anasōṅ kema kilo kēcāmēt kāmēṅk mō, ender pālōku mariki mōn: «Mariki, mānasōṅ im kāmēṅk kema kilo kēcāmēt, iṅkafēli-kafēli waca k'isōtō sō kilo kēcāmēt kēdenjār.»

21 Kō mariki mōn molōku kō: «Tentesε, wācar wētōt mēyōnε nwε pāmar palāṅ mō! Mēlas kēlan teta tes tēfēt, awa dākēcāmε dōpōṅ d'indesōṅ əm kētōmpār. Pēbōt əm kō mariki mam.»

22 Wācar nwε anasōṅ kema kilo mērāṅ kāmēṅk mō, ender pālōku: «Mariki, mānasōṅ im kāmēṅk kema kilo mērāṅ, ntε iṅkafēli-kafēli waca mō, k'isōtō kilo mērāṅ kēdenjār ka ki.»

23 Kō mariki mōn molōku kō: «Tentesε, wācar wētōt mēyōnε nwε pāmar palāṅ mō! Mēlas kēlan teta tes tēfēt, awa dākēcāmε dōpōṅ d'indesōṅ əm kētōmpār. Pēbōt əm kō mariki mam.»

24 Wācar wākō anasōṅ kāmēṅk kema kilo kin mō ender pālōku: «Mariki, incāre a fum wācuca mēyōnε: Kāfo kō mēntel nkε mēnatōgbal defet mō, mēcṗim yokom nyε mēnatōbōf mō.

25 Inanesε, kō tōsōṅ'em kākāmēt kema kam dāntōf: Ikō nkε, mēbaṅ daka dākō dōyōnε dam mō.

26 Kō mariki mōn molōku kō: «Wācar wālec, wāfan! Mēna mēnacāre a intel nde intōgbal defet mō, icṗim yokom nyε intōbōf mō?

27 Pənamar məsəŋ pəsəm pem amənjk pəsəm, kə nte ilukus mə, k'imbanj pəsəm pem isətə sə pi kəronj kəntəŋbɛ.»

28 Kə mariki mmɛ moloku: «Nəbanjər kə kəma, nəsəŋ ki wəkə əsətən'em kəma kilo wəco mə.

29 Bawo, andeberɛnɛ wəkə əyɔ mə hanj pəlar kə, mba wətəyɔ, andebanjər kə ali pəkə əyɔ mə.

30 Nəbɛləs wəcar wətəyɔ dəkəcəmɛ dəkubump ka nde dabanja. Difə kəbok kə kəŋanjərɛnɛ sek kəŋkəyi.»

Kəgbey ka alompu kə alɛc tɛm nte doru dendelip mə

31 Kə Yesu endənər sə: «Kə Wan ka Wərkun endeder nərə da debeki dən disrɛ kə mɛləkɛ fəp-ɛ, pəndɛ dəcəm dən da dəbɛ.

32 Andelonja afum a təfya doru fəp fər yən kirin. Pəgbey anjɛ kə akə pəmə nte wəkək ɛŋgbey ŋkesiya kə cir mə:

33 Pəcəmbər alompu kəca kətət kə alɛc kəca kəmeriya pəmə nte wəkək ɛncəmbər ŋkesiya kəca kən kətət, kə cir kəca kən kəmeriya mə.

34 Awa, wəbɛ pəloku akə ŋayi kə kəca kətət mə: «Nəder nəna anjɛ Papa kem ompocɛ pətət mə. Nələk kɛ, dəbɛ ndɛ anacəmbərə nu kəyɛfɛ nte doru dənacop mə.

35 Bawo dor dənəsumpər im kə nəsəŋ im yeri, kə amera ŋowos im kə nəsəŋ im domun, k'iyənɛ wəcikərə kə nəmban im,

36 inawur dis fos kəfɛ kəctərəs im kə nəmbər im yamos, k'incu kə nətən'em acəl, k'iyi dəbili kə nənder nənəŋk im.»

37 Awa, alompu ŋalukxɛ kə kəyif: «Mariki, ake tɛm tə sənənəŋk əm dor dosumpər əm, kə səsəŋ əm

yeri-ε? Ake tem to amera ηenawos am, ko sasoh am domun-ε?

³⁸ Ake tem to sanananhk am mayone wacikera, ko samban am-ε? Ake tem to manayi dis fos ko sasoh am yamos-ε?

³⁹ Ake tem to sanananhk am maccu ko senten'am acol-ε? Ake tem to manayi dabili, ko sander kadenanhk am-ε?

⁴⁰ Ko wabe oloku ηa: «Kance icloku nu: Tem o tem to nayo tes tin ta mes matot mamako nwe efete dakacame awenc im aηa fep daco ma, ina yati nayo ti.»

⁴¹ Ko tatoko telip-ε, wabe padeloku ako ηayi ko kaca kameriya ma: «Nabal'em day, nana aηe Kanu kasoh palec ma. Nako nabere danenc nde dontonime doru o doru ma, nde analompse ηanhk Nelec ko meleke ma ηi ma.

⁴² Bawo dor denay'em ko nantsoh im yeri, ko amera howos im ko nantsoh im domun.

⁴³ Inayi decikera ko nantoban im, inawur dis fos kafe katoras im, ko nantsoh im yamos, inacu k'iyi dabili ko nantoko kananhk im.»

⁴⁴ Na so ηayif: «Mariki, ake tem to sanananhk am dor day'am, ko payone fe ti amera howos am, ko payone fe ti mayi decikera, mayi dis fos, mayi ta mantamne, ko payone fe ti mayi dabili ta sanhko samar am-ε?»

⁴⁵ Wabe palukse ηa: «Kance icloku nu: Nte nanatoyone ti wakin ako ηafete ma daco, ina nantoyone ti.»

⁴⁶ Akako ηandebere katoras disre ka Kanu nke kantolip doru o doru ma, mba alompu ηandebere kayi wayen ka doru o doru.»

26

Abɛ ɲasekɛ Yesu tɛɲkɛndɔm

Mark 14.1-2; Luk 22.1-2

¹ Ntɛ Yesu elip kɛloku moloku mamɛ mɔ, k'oloku aɛɛpsɛ ɔn darɛɲ:

² «Nɛncɛrɛ a kɔ mata mɛrɛɲ mendeɛɛpɛr-ɛ, kɛsata ka Kɛɛpɛr ka Mɛlɛkɛ Medif kɛɲyi. Andɛbɛr Wan ka Wɛrkun afum dɛwaca ntɛ tɔɲsɔɲɛ ɲacaɲ kɔ tɔk yɛpɛmpɛl kɛrɔɲ mɔ.

³ Aloɲɛ apɔɲ kɔ abeki aSuyif ɲandɛkɔloɲkanɛ ndɛ kɛlɔ kɛpɔɲ ka wɛloɲɛ wɛpɔɲ nwɛ aɲwɛ Kayif mɔ,

⁴ ɲatɔɲɛ kɛsumpɛr Yesu ɛpɛnpɛn disrɛ ɲadif kɔ.

⁵ Ti disrɛ kɔ ɲalokɛnɛ: «Ta pasumpɛr kɔ kɛsata disrɛ ta tedɛsɔɲɛ pidikɛ pedeyi afum daco.»

Wɛran wɛlɔma oloɲɛr domp da Yesu labundɛ

Mark 14.3-9; Luk 7.36-50; Isaɲ 12.1-8

⁶ Ntɛ Yesu ɛnayi Betani ndena Simɔɲ wɛcunɛ sen,

⁷ kɔ wɛran wɛlɔma ɔlɔtɛrnɛ Yesu. Wɛran nwɛ pɛtɔmpɛr tɔkɔbɔ pa alabatɛr * pɛlarɛ labundɛ da nar tɛp ndɛ deyenɲk kɛway mɔ, Yesu pɛyi dɛmɛsa kɔ wɛran nwɛ endɛr pɛloɲɛr kɔ labundɛ ndɛ fɛp dɛrɔmp.

⁸ Kɔ pɛntɛlɛ aɛɛpsɛ a Yesu darɛɲ alɔma, kɔ ɲayifnɛ: «Ta ake tɔ wɛran wɛkawɛ ɛlɛsɛrɛ-lɛsɛrɛ labundɛ dandɛ-ɛ?

⁹ Anatam di kɛcamɛs kɛway kɛyenɲki, pasɔɲ pɛsam papɔkɔ atɔyɔ daka.»

¹⁰ Mba kɔ Yesu oloku: «Nɛɛ kɔ! Ta ake tɔ nɛɲnalɛ kɔ-ɛ? Tɔyɔ tɔtɔt t'ɔyɔ nnɔ ina iyi mɔ.

* **26:7** *Tɔkɔbɔ pa alabatɛr* = Tɔkɔbɔ pɔ mpɛ anclompɛ tasar pɛfɛr pɛpat mɔ. Tasar pɛtɔt papɔkɔ p'ɲwɛ «alabatɛr».

11 Atɔyɔ daka, ɲayi nu daco tem fəp. Mba ina, nɛfɔdey'em tem fəp.

12 Nte oloɲər im labunde dandɛ dərɪs mɔ, kəbel kem k'eyi kəlompəs a pacwup ki.

13 Kance icloku nu: Nnɔ o nnɔ andedəɲk Kibaru Kətɔt kaɲkɛ doru dandɛ kərəkər mɔ, aɲloku sɔ tɔyɔ tɔtɔt nte wəran wəkawɛ ɔyɔ mɔ kəcɛm-cɛməs ka doru.»

*Yudas ɛfan kəbɛr Yesu abɛ a aloɲnɛ apɔɲ dəwaca
Mark 14.10-11; Luk 22.3-6*

14 Wəkin acɛpsɛ a Yesu darəɲ wəco kɔ mɛrəɲ daco, nwe ancwe Yudas wəka dare da Keriyot, ɔɲkɔ nde abɛ a aloɲnɛ ɲayi mɔ,

15 kəkɔyɪf ɲa: «Kɔ tɔyɔnɛ ilɛk Yesu ibɛr nu dəwaca-ɛ, pəsam cəke pɔ nəndesɔɲ im-ɛ?» Kɔ abɛ aɲɛ ɲalɔm gbɛti gbəlɛɲ wəco maas (30), kɔ ɲasɔɲ kɔ.

16 Kɔ Yudas ɛyɛfɛ ɔɲ kəten tɔyɔ nte endɛbɛrɛ Yesu abɛ akakɔ dəwaca mɔ.

*Yesu kɔ acɛpsɛ ɔn darəɲ ɲaloɲkanɛ kəbɔc kəsata
Mark 14.12-21; Luk 22.7-14,21-23; Isaɲ 13.21-30*

17 Dəsək dəcəkɔ-cəkɔ da kəsata ka Cəcom Cətonɔɲkəl Lebin, acɛpsɛ a Yesu darəɲ ɲayɪf kɔ: «Deke məfan səkɔlomp's'am yeri ya kəsata ka Kəcɛpər ka Mɛlɛkɛ Medif-ɛ?»

18 Kɔ Yesu oloku: «Nəkɔ nəbɛrɛ dare ndena fum wəlɔma, nəlɔku kɔ: «Wətəkɛ kosu oloku: Tem tem tɔlɔtərnɛ, nnɔ ndaram indecɛpərənɛ kəsata ka Kəcɛpər ka Mɛlɛkɛ Medif kɔ acɛpsɛ em darəɲ.»

19 Kɔ acɛpsɛ a Yesu darəɲ ɲayɔ təkɔ ɛnasom ɲa mɔ, kɔ ɲalompəs yeri ya kəsata kaɲkɔ.

20 Nte dɔfɔy dɛmbəp mɔ, Yesu ɲandɛ dɛmɛsa kɔ acɛpsɛ ɔn darəɲ aɲɛ wəco kɔ mɛrəɲ.

²¹ Ɗayi kadi yeri, ko Yesu oloku: «Kance icloku nu: Wakin nu daco, endeber im aterene em dawaca.»

²² Ko dis dendence na ko namonene, ko hayefe kayifat Yesu: «Mariki, in'ofa ba?»

²³ Ko Yesu oloku: Nwe samber waca dap din disre kadi yeri mo endeber im aterene em dawaca.

²⁴ Wan ka Warkun endefi pamo tako ancic ti mo. Mba palec pere peyi warkun wakawε endeber Wan ka Warkun aterene on dawaca mo! Kanatam kom ka warkun wakawε kanatam katese ko!»

²⁵ Yudas nwe enayi kayo Yesu capanpan mo, eyif Yesu: «Watakse, in'ofa ba?» Ko Yesu olukse ko: «Man'oloku ti.»

*Yesu ko acεpse on darɔɔɔ ɔamparɔne kadi yeri tɛlpas
Mark 14.22-25; Luk 22.15-20; 1Ko 11.23-26*

²⁶ Nte nanci yeri mo, ko Yesu elek kacom, k'eyif Kanu barka, k'entepi ki k'osonε acεpse on darɔɔɔ pɛcloku: «Naban nasom kacom kanke, dis dem do.»

²⁷ K'elek so tambal ta wen, nte elip kayif Kanu barka mo, k'osonε na pɛcloku: «Nemun wen wawe fap,

²⁸ mecir mem mo, mme alonε kacanεs ka danapa da Kanu ko kanay ka afum teta kanarɔnenε ka kiciya mo.

²⁹ Kance icloku nu: Ifasomun wen hanɔ dosak nde indegbakare so kamun wi ko nana, nde debe da Papa kem mo.»

³⁰ Nte nalip kalenεs melen mokor-kore Kanu mo, Yesu ko acεpse on darɔɔɔ ɔawurnε ntende kaca ka taro ta Tok ya Olif.

*Yesu oloku Piyer a endegbekal kacare kan
Mark 14.26-31; Luk 22.31-34; Isaɔ 13.37-38*

³¹ Nte Yesu kɔ aɕɛpsɛ ɔn darɛŋ ɲambɔp tɔɔ tatɔkɔ mɔ, k'oloku ɲa: «Nɛna akanɛ fɔp nɛndelukus im darɛŋ, bawo Yecicɛs Yosoku yoloku: «Indesut wɛkɛk, ɲkesiya yɔɔl yɛsamsɛr.»

³² Mba k'indɛfɔtɛ afi dacɔ-ɛ, indekɔkar nu Kalile.»

³³ Kɔ Piyɛr oloku kɔ: «Ali fɔp fɔlukus ɛm darɛŋ, ina ifɔlukus ɛm darɛŋ.»

³⁴ Kɔ Yesu oloku Piyɛr: «Kance, iclok'ɛm, pibi pampɛ yati, mɛndɛgbɛkɛl kɛɕɛr'em kɛmaas a kicipi kɛccam.»

³⁵ Mba Piyɛr pɛɕgbɛkɛl ti: «Ali sɛɕfi kɔ mɛna, ifɔgbɛkɛl a incɛr'am.» Aɕɛpsɛ a Yesu darɛŋ akɔ fɔp toloku tin tayi tɔ ɲancloku.

Yesu ontola Kanu nde Ketsemane
Mark 14.32-42; Luk 22.40-46

³⁶ Ti disrɛ kɔ Yesu ender kɔ aɕɛpsɛ ɔn darɛŋ nde kɛfo nkɛ aɲwe Ketsemane† mɔ, k'oloku aɕɛpsɛ ɔn darɛŋ: «Nɛndɛ nnɔ, ibɔlɛ nu pipic itola Kanu.»

³⁷ Kɔ Yesu ɛlɛkɛnɛ Piyɛr kɔ awut a Sebede mɛrɛŋ, nte dis dɛndɛncɛ Yesu kɔ abɛkɛɕ ɲɛlɛɕɛ-lɛɕɛ kɔ mɔ,

³⁸ k'oloku ɲa: «Abɛkɛɕ ɲɛnanɲkanɛ kɛdɛnc'em pɛmɔ ifi. Nɛyi nnɔ, ta padirɛ!»

³⁹ Kɔ Yesu ɔmbɔlɛnɛ ɲa pipic, k'ontotnɛ k'embɛlkɛr kɛɕɛp tobu dɛntɔf, k'ontola nte: «Papa kem, kɔ tɔyɔnɛ mɛwosɛ ti-ɛ, mɛbɔlɛn'em tɔmbɔl pa kɛtɔrɛs pampɛ! Mba bafɔ tɔkɔ ifaɲ ti mɔ, mba tɔkɔ mɛna Papa mɛfaɲ ti mɔ.»

26:31 «Indesut wɛkɛk, ɲkesiya ya yɔɔl yɛsamsɛr.» Sakary 13.7

† **26:36** *Ketsemane* itɔ tatɔkɔ ɕɛArame «Dɛkɛfɔɕɛs moro».

⁴⁰ Kɔ Yesu ender pəbəp acəpsɛ ɔn darəŋ ɲacdirɛ. K'eyif Piyɛr: «Nəntam fɛ kətɔdirɛ kɔ ina ali dec din ba?

⁴¹ Ta nədirɛ, nətola Kanu nte tɔŋsɔŋɛ ta nəmbɛrɛ kəwakəs nke kəŋsɔŋɛ nu kəyɔ mes mɛlɛc mə. Pəmbas mera yonu kəyɔ pətɔt, mba nəyɔ fɛ səkət kəyɔ ti.»

⁴² Kɔ Yesu ɔmbɔlɛ sɔ ta mɛrəŋ k'ontola Kanu nte: «Papa kem, kɔ tɔyɔnɛ a tɔmbəl pampɛ pɔfɔbɔlɛ ta imun pi-ɛ, awa, tɛfan tam teyi!»

⁴³ Kɔ Yesu olukus, k'ender pəbəp acəpsɛ ɔn darəŋ ɲacdɔŋəs, nte fɔr yɛnaləl ɲa mə.

⁴⁴ Kɔ Yesu ɛsak ɲa k'ɔmbɔlɛ sɔ, k'ontola sɔ Kanu ta maas, pəcgbəkɛrɛ sɔ moloku min mayi.

⁴⁵ Kɔ Yesu oluksərɛnɛ nnɔ acəpsɛ ɔn darəŋ ɲayi mə, k'ɛŋgbəŋ-gbəŋər ɲa: «Nəndirɛ sɔ, kəŋɛsəm kɔ nəndɛ! Nəcəŋkəl: Tɛm tɛmbəp, ambɛr Wan ka Wərkun aciya dəwaca!

⁴⁶ Nəyɛfɛ, paŋkɔn! Bawo nwe eyi kəbɛr im afum dəwaca mə, ɔlɔtərɛ.»

Kəsumpər ka Yesu

Mark 14.43-50; Luk 22.47-53; Isaŋ 18.2-11

⁴⁷ Yesu pəsɔrɔlɔk-loku, gbəncana babəkɔ kɔ Yudas nwe ɛnayi acəpsɛ a Yesu aŋɛ wəcɔ kɔ mɛrəŋ dacɔ mə, ender pəsɔlɛ kənay ka afum alarəm aŋɛ ɲanatɔmpər-tɔmpər sakma kɔ tək yosutɛnɛnɛ mə. Alɔŋnɛ apɔŋ kɔ abeki aSuyif ɲanasom ɲa.

⁴⁸ Yudas nwe ɛncbɛr Yesu aterɛnɛ ɔn dəwaca mə, ɛnasɔŋ asɔdar tɛmɔncɛ nte: «Nwe ɲkɔcup mə, nkɔn ɔfɔ wəkakɔ. Nəsumpər kɔ.»

⁴⁹ Gbəncana babəkɔ kɔ Yudas ender, k'ɔlɔtərɛnɛ Yesu, k'ewe kɔ: «Iyif əm, Wətəkse,» k'oncup kɔ.

⁵⁰ Kɔ Yesu oloku kɔ: «Wanapa, ntɛ mɛnder kɛyɔ mɔ, mɛyɔ ti.» Kɔ afum akakɔ ɲancɔɲɛ kɔ ɲantɔpsɛr Yesu waca, kɔ ɲasumpɛr kɔ.

⁵¹ Gbɛncana babɔkɔ kɔ wɛkin asol a Yesu daco, owurɛ dakma k'ɛncɛp wɛcar ka wɛlonɲɛ wɛpɔɲ alɔɲɛs, k'ɛɲgbinti ɲi.

⁵² Kɔ Yesu oloku kɔ: «Mɛlukɛ dakma dam dobom, bawo nwɛ o nwɛ endeyɛfɛrɛnɛ dakma mɔ, dakma dendedif kɔ.

⁵³ Mɛncɛm-cɛmnɛ a ifɔtam kɛwɛ Papa kem nwɛ ɛntam kɛkɛr'em mɛlɛkɛ asɔdar alarɛm cɛgba wɛco kɔ mɛrɛɲ ca wul kɔ wul ba?

⁵⁴ Cɛkɛ cɔ Yecicɛs Yosoku yɛntam kɛlarɛ-ɛ? Bawo yɛnaloku a tantɛ tɔ pɛmar mes mamɛ medɛɛpɛr?»

⁵⁵ Gbɛncana babɔkɔ bɔ Yesu ɛnaloku kɛnay kanɲkɔ: «Nɛwɛr kɛdesumpɛr im, nɛtɔmpɛr-tɔmpɛr sakma kɔ tɔk yosutnɛnɛ pɛmɔ ntɛ ɲyɔnɛ kalbante mɔ. Dɔsɔk o dɔsɔk inder indɛ ndɛ kɛlɔ kɛpɔɲ ka Kanu ictɔkɛ ta nɛnder nɛsumpɛr im-ɛ.

⁵⁶ Mba mamɛ fɛp meyi ntɛ tɔɲsɔɲɛ Yecicɛs ya sayibɛ yɛlarɛ mɔ. Kɔ acɛpɛ darɔɲ ɲasak Yesu kɔ ɲayɛksɛ.

Yesu eyi nda aboc kiti

Mark 14.53-65; Luk 22.54-55,63-71; Isaɲ 18.12-

24

⁵⁷ Afum aɲɛ ɲanasumpɛr Yesu mɔ ɲaɲkɛkɛrɛ kɔ ndɛna wɛlonɲɛ wɛpɔɲ Kayif, dɛndo atɛksɛ sariyɛ kɔ abeki aSuyif ɲanabɔpsɛnɛ.

⁵⁸ Piyɛr ɛnacɛmɛ Yesu darɔɲ pɛbɔlɛ hanɲ ndɛ abanɲka ɲa kɛlɔ ka wɛlonɲɛ wɛpɔɲ. Kɔ Piyɛr ɛmbɛrɛ dɛsanɲka k'ɔɲkɔ pɛndɛ k'abum a kɛlɔ ka wɛlonɲɛ Kayif kɛsɔk pɛckɔkcɛ ntɛ mes ma Yesu mɛndɛkɔlip mɔ.

⁵⁹ Alon^{ne} ap^{on} k'aboc kiti aSuyif fəp ^ηancten yem ny^e ^ηantam kəyemsene Yesu, nte tən^son^e padif kə m^ə.

⁶⁰ Mba ^ηanasot^ə f^e, ali nte sede alarəm ^ηanader ^ηabon^ce kə yem m^ə. Təlpəs kə sede m^erə^η sander,

⁶¹ nse sənaloku: «Yesu oloku: «Intam kəcekəli kələ kəp^{on} ka Kanu, icəmbər s^ə ki mata maas disre.»»

⁶² Kə wəlon^{ne} wəp^{on} eyef^e k'eyif Yesu: «Məfəlukse su təl^m o təl^m b^a? Cəke c^ə mən^loku teta moloku ma sede mme akan^e ^ηambonc am m^ə?»

⁶³ Mba kə Yesu enca^ηk. Kə wəlon^{ne} wəp^{on} oloku k^ə: «Tewe ta Kanu nke kəyi m^ə, məloku su kə təy^əne mən^oy^əne Krist, Wan ka Kanu-ε.»

⁶⁴ Kə Yesu olukse k^ə: «Mən^oloku ti. Mba icloku nu, kəyef^e o^η ndəkəl, nəndenə^ηk Wan ka Wərkun pənde kəca kətət ka Kanu nke kəntam m^es fəp m^ə, pəcder nər^ə da debeki dən disre kəp ka dəKəm kəron^η.»

⁶⁵ Kə wəlon^{ne} wəp^{on} ewal-wali yamos yən pəcloku: «Əl^mməs Kanu! Sede sərə s^ə pəmar payif-ε? Nəne tək^ə ontubcən^ene Kanu m^ə, kəl^mməs ka Kanu k^ə.

⁶⁶ Cəke c^ə nən^cem-cəmne-ε?» Kə ^ηalukse moloku: «Mene padif k^ə.»

⁶⁷ Ti disre kə ^ηayukər Yesu lin dəkəro, kə ^ηantiməs kə ^ηkulma, al^ma ^ηacsut kə waca dəkanca, ^ηacloku:

⁶⁸ «Krist wəyek-yək wəka Kanu, məboncər su m^a, nw^e osut əm m^ə!»

Piyer ^ηgbəkəl kəcərə ka Yesu

Mark 14.66-72; Luk 22.56-62; Isay 18.17,25-27

⁶⁹ Piyer pənde nde daban^ηka, kə wəcar wəyecərə wəl^ma ələtər^{ne} kə, k'oloku: «Məna wəkakə mənd^e m^ə, nən^oenayi kə Yesu wəka Kalile.»

⁷⁰ Mba kɔ Piyer engbekɛl ti afum fɛp fɔr kirin, pɛcloku: «Ina, incɛɛ fɛ ntɛ mɛna mɛfan kɛloku mɔ.»

⁷¹ Ntɛ nkɔn Piyer ɔnckɔ dɛkusunɔka kɛwur mɔ, kɔ wɛran wɛlɔma ɛnɔɔk kɔ sɔ, k'oloku afum akɔ ɔnanayi dɛnda mɔ: «Wɛkawɛ, ɔa ɔnanayi kɔ Yesu wɛka Nasaret.»

⁷² Kɔ Piyer engbekɛl sɔ tatɔkɔ k'ɛnderɛm: «Incɛɛ fɛ wɛrkun wɛkawɛ!»

⁷³ Pɛwon fɛ akɔ ɔnanacɛmɛ di mɔ ɔalɔtɛrne Piyer kɔ ɔayif kɔ: «Mɛna sɔ afum akanɛ ɔɔ nɔyi, tolok-loku tam tementɛr ti.»

⁷⁴ Kɔ Piyer ɛyɛfɛ kɛderɛm: «Kanu kɛtɔrɛs im kɔ pɛyɔnɛ a kɛyemɛ k'indɛ-ɛ! Incɛɛ fɛ fum wɛkawɛ nɔɔle mɔ!» Gbɛncana babɔkɔ kɔ kicipi kɛncam.

⁷⁵ Kɔ Piyer ɛncɛm-cɛmnɛ moloku mɔkɔ Yesu ɛnaloku kɔ mɔ: «Mɛndegbekɛl kɛtɔcɛr'em kɛmaas a kicipi kɛccam.» Kɔ Piyer owur dabanɔka k'ombok belbel.

27

Aɔɔkekɛrɛ Yesu ndena Pilat

Mark 15.1; Luk 23.1-2; Isan 18.28-32

¹ Ntɛ bɛtbɛt bɛmbɛp mɔ, alonɔnɛ apɔɔ kɔ abeki aSuyif fɛp ɔalonɔkanɛ kɔ ɔnantɔnɛ a padif Yesu.

² Ntɛ ɔalip kɛkot kɔ mɔ, kɔ ɔaɔkekɛrɛ kɔ, kɔ ɔnambɛr kɔ Pilat dɛwaca nwe ɛnayɔnɛ wɛkirin wɛka sɛdare sa Yude mɔ.

Defi da Yudas

Asom 1.18-19

³ Ntɛ Yudas nwe ɛnawurɛ Yesu pɛbɛr kɔ aterɛnɛ ɔn dɛwaca ɛnɔɔk a kɛdif k'anɔkɔ Yesu mɔ, kɔ abɔc ɔnɛmbɛrɛ kɔ. K'olukɛ gbɛti gbɛlɛn wɛco maas alonɔnɛ apɔɔ kɔ abeki,

⁴ pæcloku: «Inciya, imber wətəciya nu dəwaca nte tənşəne padif kə mə.» Mba alonəne apəŋ kə abeki ŋaloku: «Yudas, tatəkə təməmən fə səna! Məna tatəkə təməmən!

⁵ Kə Yudas ɛŋgbal pəsam dəndo kələ kəpəŋ ka Kanu, k'eyefə kəfo kanəkə, k'əŋkə pəgbəkne k'efi.

⁶ Kə alonəne apəŋ ŋalonka gbəlen ba gbeti mbə, kə ŋaloku: «Sariye səwosə fə su kəber pəsam papəkə kələ ka kələ kəpəŋ ka Kanu, bawo kəway ka mecir kə.»

⁷ Nte ŋanəŋkenə mə, kə ŋantəŋne kəwayə ka gbeti babəkə dale da wəsəl, pəyənə di dəkəwup da acikəra.

⁸ Ti tənşəne k'asərəwe dəkəwupənə dadəkə han məkə «Dale da Mecir.»

⁹ Kə təyənə moloku mmə sayibə Yeremy ɛnadəŋk mə, mɛlare: «ŋanalek gbeti gbəlen wəco maas. Gbeti babəkə bə aka Yisrayel ŋanatəŋne kəsəŋe kə,

¹⁰ kə ŋasəŋe bi teta dale da wəsəl, pəmə nte Mariki ɛnasom im ti mə.»*

Yesu ɛncəme fər kirin ya Pilat kəkiti

Mark 15.2-5; Luk 23.2-5,9-10; Isaŋ 18.29-38

¹¹ Kə wəbe Pilat eyif Yesu: «Mən'əyənə wəbe ka aSuyif ba?» Kə Yesu olukse kə: «Mən'oloku ti.»

¹² Mba ali toloku tin Yesu ɛnaloku fə kəlukse moloku ma kəyemsənə mmə alonəne apəŋ kə abeki ŋanaboncə kə mə.

¹³ Ti disrə, kə wəbe Pilat eyif kə sə: «Mes mɛləc mɛlarəm mmə ŋambonc am mə, məfəne mi ba?»

¹⁴ Mba ali toloku tin Yesu ɛnalukse fə kə, ti tənawosəs wəbe Pilat kusu pəpəŋ.

* **27:10** Sakary 11.12-13 kə məməmən sə Yeremy 18.2-3; 19.1-2; 32.6-15

Wàbe Pilat osom a padif Yesu

Mark 15.6-14; Luk 23.13-23; Isan 18.39-40

¹⁵ Kàsata ka Kàcepər ka Mələkə Medif, wəkiriŋ ka sədare sa Yude ɛncsaƙe afum yɛŋən køren o køren tataka ta kàsata kaŋkɛ, fum wəkin ayi dɛbili daco nwe kənay ka afum kəncfaŋ mə.

¹⁶ Tɛm tatəkɔ wəyi dɛbili wəlɔma ɛnayi nwe tewɛ tən tɛnasam dətɔf mə, pacwe kɔ Yesu Barabas.

¹⁷ Ntɛ ɲanaloŋkanɛ mə, kɔ Pilat eyif ɲa: «Yesu Barabas kɔ Yesu nwe aŋwe Krist mə, an'ɔ nəfaŋ isak kɔ yɛŋən-ɛ?»

¹⁸ Pilat ɛnacərə a kəraca kənasɔŋɛ ɲalɛk Yesu ɲabɛr kɔ dəwaca.

¹⁹ Tɛm ntɛ Pilat ɛnandɛ dənkiti mə, kɔ wəran kən osom pakɔloku kɔ: «Ta tɔlɔm o tɔlɔm tey'am daco kɔ fum wəlɔmpu wəkawɛ! Bawo pibi pa məkɔ intərɔna belbel icwɛrɛp teta fum wəkawɛ.»

²⁰ Kɔ alonɲɛ apɔŋ kɔ abeki ɲagbiŋɛr kənay ka afum kɔloku a pasakɛ ɲa Barabas, padif Yesu.

²¹ Kɔ wàbe Pilat eyif kənay: «Afum akanɛ mɛrɔŋ an'ɔ nəfaŋ a pasakɛ nu yɛŋən-ɛ?» Kɔ ɲalukɛ kɔ: «Barabas!»

²² Kɔ Pilat eyif ɲa sɔ: «Ak'indeyɔnɛ ɔŋ Yesu nwe aŋwe Krist mə?» Kɔ fəp fɔloku: «Məcaŋ kɔ dətək yɛpəmpəl!»

²³ Kɔ Pilat ɔŋgbəkərə sɔ kəyif ɲa: «Pələc pere p'ɔyɔ-ɛ?» Mba kɔ kənay ka afum kənaŋkanɛ kəkulɛ-kulɛ: «Məcaŋ kɔ dətək yɛpəmpəl!»

²⁴ Ntɛ Pilat ɛnacərə a ɔfɔtam tes o tes, kɔ pidikɛ pa kənay ka afum pɛmbɛk kəbɛk dɛm, k'ɛlɛk domun k'embikɛnɛ waca fɔr ya afum kiriŋ, k'oloku: «Isarɛ fɛ kiciya ka dɛfi da fum wəkawɛ. Nən'endesarɛ kiciya ka kədif kən!»

²⁵ Kɔ afum fəp ɲaloku: «Səwosɛ kəsarɛ teta defi dɔn, sənə kɔ awut asu!»

²⁶ Kɔ Pilat ɛsake afum aɲɛ Barabas, kɔ Barabas ɔɲkɔ yɛɲən. Ntɛ Pilat elip kəsom pasutɛ Yesu tɔrɔɲkɔn mɔ, k'ɛmbɛr kɔ afum dəwaca a pacan kɔ dɔtɔk yɛpəmpəl.

Asɔdar ɲafani Yesu

Mark 15.16-20; Luk 23.11; Isaɲ 19.2-3

²⁷ K'asɔdar a Pilat ɲanɲekərə Yesu tedisrɛ ta kələ kɔn kəpɔɲ, kɔ ɲalonka dɛɲgbɛɲk dadɔkɔ fəp ndɛ dɛnakɛl kɔ mɔ.

²⁸ K'asɔdar ɲawurɛ Yesu yamos yɔn kɔ ɲamber kɔ burumus beyim.

²⁹ Kɔ ɲandunɛ kɔ aɲgbɔɲkələ ɲa bɛɲk nɲɛ ɲanacəp kɔ dərɔmp mɔ, kɔ ɲamber kɔ kəgbɔ dəkəca kətɔt kəyɔnɛ kɔ kəɲgbasar k'abɛ, kɔ ɲancəpɛ kɔ suwu ɲacfani kɔ, ɲacloku: «ɪɲyif əm, wəbɛ ka aSuyif!»

³⁰ Kɔ ɲayukər Yesu lin kɔ ɲalɛk kəgbɔ ɲacsut kɔ dərɔmp.

³¹ Ntɛ ɲalip kəfani Yesu mɔ, kɔ ɲawurɛ kɔ burumus bɔkɔ ɲanabɛr kɔ mɔ, kɔ ɲamber kɔ sɔ yamos yɔn. Kɔ ɲanɲekərə kɔ kəkɔcan kɔ dɔtɔk yɛpəmpəl.

Ancan Yesu dəkɔtɔk kəpəmpəl

Mark 15.21-32; Luk 23.26-43; Isaɲ 19.16-24

³² Ntɛ asɔdar ɲancwur dare mɔ, kɔ ɲanəɲk wərkun wəka dare da Siren wələma nwɛ ancwɛ Simɔɲ mɔ, kɔ ɲancəmbər kɔ yɛbɔc ya kəgbəɲnɛ tɔk yɛpəmpəl nɲɛ anakɔ kəcan Yesu mɔ.

³³ Kɔ ɲanɲkɔ ɲabəp kəfo nkɛ aɲwɛ Kolkota mɔ, itɔ tatɔkɔ «Kəfo ka Kəmbɛmbələ.»

³⁴ K'asədar ɲasəɲ Yesu wən wənəɲkəl pədokət, mba ntɛ ɛnatəm wi temer mə, ɛnawosɛ fɛ wi kəmən.

³⁵ Ntɛ ɲalip kəcan kə dətək yɛpəmpəl mə, kə ɲanɲkot yampunɲun teta kəyer yamos yən.[†]

³⁶ Kə ɲandɛ ɲacbum kə.

³⁷ K'antəp kə domp takəron yecicəs nyɛ yɛnaloku tes ntɛ təsəɲɛ k'andif kə mə: «Fum wəkawɛ Yesu əfə, wəbɛ ka aSuyif.»

³⁸ Anacan sə Yesu kəsək dətək yɛpəmpəl tɛm tin kə calbante mɛrəɲ, wəkin pəyi kə kəca kətət, wəkə pəyi kə kəca kəmeriya.

³⁹ Afum acepər ɲacləməs kə ɲacfɛk kə domp.

⁴⁰ ɲacloku: «Məna nwɛ mənɛkəli kələ kəpəɲ ka Kanu, məcəmbər sə ki mata maas disrɛ mə, məyacnɛ mənəsərka! Kə təyənɛ a Wan ka Kanu məyənɛ-ɛ, mətor on dətək yɛpəmpəl yayɛ!»

⁴¹ Alonɲɛ apəɲ, atəksɛ sariyɛ s'aSuyif kə abeki sə ɲancfani Yesu ɲacloku:

⁴² «ɛnayac aləma, mba əfətam kəyacnɛ nkənsərka! Wəbɛ ka Yisrayel əyənɛ: Awa pətor on ma dətək yɛpəmpəl yayɛ, təsəɲɛ səgbəkər kə kəlan kosu!

⁴³ Əɲgbəkər Kanu amera, awa Kanu kəyac kə on ma, kə təyənɛ Kanu kəmbətər kə. Bawo oloku: «Wan ka Kanu iyənɛ!»»

⁴⁴ Calbante aɲɛ anacan kə Yesu mə ɲacləməs kə tin tayi.

Defi da Yesu

Mark 15.33-41; Luk 23.44-49; Isaɲ 19.28-30

[†] **27:35** Məməmən Yabura 22.18

⁴⁵ Pəndeyi dan kə kubump kəntor dəntəf fəp han salifana.

⁴⁶ Salifana səndebəp, kə Yesu oŋkulε-kulε: «*Eloyi, Eloyi, lema sabaktani?*» Itə tatəkə: «Kanu kem, Kanu kem, ta ake tə məsak'em-ε?»

⁴⁷ Kə afum aləma akə ŋanayi di mə, ŋanane kə dim. Nəncloku kəfətə disre a Aŋnabi Eli eyi kəwe.

⁴⁸ Kə fum wəkin eyekse kəkələk yaŋgba, nyε εnapuk dəməncəncə mə, k'εnepsər yi dəkəmotə k'encenc kə yi a pəmun.

⁴⁹ Mba kə akə ŋaloku: «Məkar ma, pāməmən belbel kə təyənε Eli endeder kədeyəc kə-ε.»

⁵⁰ Kə Yesu oŋkulε sə pəpəŋ, a k'olukse Kanu afəkəl ŋən.

⁵¹ Təm tatəkə tə kəloto kələl nke kəŋkəŋk təkso ta kələ kəpəŋ ka Kanu mə kəŋgbere daco, kəyefe takəroŋ han tantəf. Kə antəf ŋeyefe kəyikce pəpəŋ kə masar məŋgbere,

⁵² kə cufu cəŋgbite, kə cəbel ca afum a Kanu alarəm ŋafətə afi daco.

⁵³ Kə ŋayefe dəcufu nte Yesu əfətə afi daco mə, kə ŋambere Yerusalem dare ndε ampuse Kanu mə, kə ŋamentərne afum alarəm.

⁵⁴ Wəbe k'asədar wəRom kə amarəne ən asədar akə ŋanayi di ŋacbum kəbel ka Yesu mə, ŋanese pəpəŋ nte ŋananəŋk antəf kəyikce, kə təkə tənayi kəfi ka Yesu mə, kə ŋaloku: «Wəkawε, Wan ka Kanu yati ənayi!»

⁵⁵ Aran alarəm ŋanacəme pəbəle ŋacməmən, aran aŋε ŋanasol kə Yesu kəyefe Kalile kədəbəce kə mə.

⁵⁶ Aran akakə daco, Mari wəka Makdala, Mari

iya wəka Sak kə Isifu, kə iya ka awut arkun a Sebede.

Antore Yesu dəkufu

Mark 15.42-47; Luk 23.50-56; Isan 19.38-42

⁵⁷ Nte dɔfɔy dəmbəp mə, kə wərkun wəka daka wələma ender, wəka dare da Arimate ənayi, pacwe kə Isifu. Nkən sɔ wəcɛpsɛ Yesu darəŋ wələma ənayi.

⁵⁸ Kə wərkun nwe ɔŋkə ndena Pilat k'ɔŋkə pətola kə kəbel ka Yesu. Kə Pilat osom a pasəŋ kə ki.

⁵⁹ Kə Isifu elɛk kəbel ka Yesu, k'ɛnɛpsər ki kasanke ka kəloto kətelər kəfu,

⁶⁰ k'ontore kəbel ka Yesu dəkufu nke anatatore wəfi kərəsna mə, kufu nke nkən Isifu anayək ka nkənsərka dətasar mə, k'osuncɛ dəkəbɛrɛ da kufu kanke tasar tɔpəŋ, k'ɔŋkə.

⁶¹ Awa, Mari wəka Makdala kə Mari nwe ənayɔnɛ iya ka Sak kə Isifu mə ŋanayi di, ŋandɛ ŋatɛfərne kufu.

Kəbum ka kufu

⁶² Dɔckɔsɔk da tataka tolompəsneɛ dɔsɔk da kəŋesəm, alonɛ apəŋ k'aFarisi ŋasol kə ŋanke ndena Pilat,

⁶³ kə ŋaloku: «Mariki, səncɛm-cɛmnɛ a wəyemɛ wəkawɛ ɛnaloku nte ənayi wəyɛŋ mə: «Tataka ta maas ta defɪ dem, indefɔtɛ afɪ daco.»

⁶⁴ Awa, məsom afum ŋacbum kufu kən han tataka ta maas, ta acɛpsɛ ɔn darəŋ ŋadedɛr ŋakiyɛ kəbel kən, ŋakafələ kəloku afum: «Nənəŋk, ɔfɔtɛ afɪ daco!» Yem yayəkə yendebɛk sɔ yɛcɛpər yɔcəkɔ-cəkɔ.»

⁶⁵ Kə Pilat oloku ŋa: «Iwosɛ kəsəŋ nu asɔdar, nəyɔ ŋa ŋabum kufu kanke pəmɔ təkɔ nəfan ti mə.»

⁶⁶ Awa, kɔ ɲaɲkɔ ɲalompɛs tobum ta kufu nkɛ, kɔ ɲasuncɛ ki tassar pɔpɔɲ, kɔ ɲancɛmbɛr afum ɲancbum ki.

28

Yesu kɔfɔtɛ kɔn afi daco

Mark 16.1-10; Luk 24.1-12; Isaɲ 20.1-10

¹ Dɔckɔsɔk da dɔsɔk da kɛɲesɛm, sandɛɲ bɛtbɛt, Mari wɛka dare da Makdala kɔ Mari wɛlɔma ɲander kɛmɔmɛn kufu.

² Gbɛncana babɔkɔ kɔ antɔf ɲeyikɛɛ pɔpɔɲ, bawo mɛlɛkɛ ma Mariki mɛnator dɛntɔf kɛdebɪɲkɛli tassar, mɛndɛ sɔ pi kɛrɔɲ.

³ Mɛlɛkɛ mamɔkɔ mɛɲayi pɛmɔ pɛmot pa dɛkɔm, yamos ya mi yeferɛ pɔɲ.

⁴ Kɔ asɔdar abum a kufu ɲayikɛnɛ kɛnesɛ, ɲamɔmpɲɛ pɛmɔ ntɛ ɲaɲfi mɔ.

⁵ Mba kɔ mɛlɛkɛ moloku aran: «Ta nɛna nɛnesɛ, bawo incɛrɛ a Yesu wɛkɔ anacan dɛtɔk yɛpɛmpɛl mɔ, nɛyi kɛtɛn.

⁶ Eyi fɛ dɛ, ɔfɔtɛ afi daco pɛmɔ tɔkɔ ɛnaloku ti mɔ. Nɛdɛr nɛmɔmɛn nnɔ kɛfo nkɛ anaboc kɔ mɔ.

⁷ Nɛkufɛ nɛkɔloku acɛpsɛ ɔn darɛɲ a Yesu ɔfɔtɛ afi daco, awa a nɛɲkɔbɛp kɔ Kalile, difɔ nɛɲkɔnɛɲk kɔ. Nɛcɛɲkɛl: Tatɔkɔ t'iyɔna toloku nu.»

⁸ Kɔ aran aɲɛ ɲambɔlɛ kufu nkɛ katɔna kɛnesɛ kɔ pɛbotu pɔpɔɲ disrɛ, kɔ ɲayɛksɛ kɛkɔloku ti acɛpsɛ a Yesu darɛɲ.

⁹ Gbɛncana babɔkɔ kɔ Yesu endɛr aran aɲɛ tekirin k'eyif ɲa: «Iyif nu!» Kɔ aran aɲɛ ɲabɔtɛrɛnɛ kɔ ɲancɛpɛ kɔ suwu kɔ ɲasumpɛr kɔ wɛcɛk tɛta kɛlɛlɛs kɔn.

¹⁰ Kɔ Yesu oloku ɲa: «Ta nɛnɛsɛ, nɛkɔ nɛloku awɛnc im aɲa a ɲakɔ Kalile, a difɔ ɲandekɔnɔɲk im.

Abum kufu ɲalɔmɔr abɛ mes mmɛ mɛnacepɔr nde dɔkufu mɔ

¹¹ Ntɛ aran aɲɛ ɲanayi dɔpɔ kɛkɔ mɔ, awa kɔ abum a dɔkufu alɔma ɲambɛrɛ dare kɔ ɲalɔmɔr alonɲɛ apɔɲ mes mɔkɔ mɛnacepɔr mɔ fɛp.

¹² Ntɛ ɲalɔɲkanɛ kɔ abeki mɔ, kɔ ɲantɔɲɲɛ kɛsɔɲ asɔdar akakɔ pɛsam pɛlarɔm,

¹³ kɔ ɲasom asɔdar akakɔ ntɛ: «Nɔdɛ nɛloku: «Acɛpsɛ ɔn darɔɲ ɲandɛrna ɲakiyɛ kɔ, tɛtɔɲɲɛ sɔdirɛ.»

¹⁴ Kɔ wɛkirɲɛnɛ ene ti-ɛ, sɔɲkɔcɛrɛ kɛlɔk-lɔkɛr kɔ, ntɛ tɔɲsɔɲɛ ta antɔrɛs nu mɔ.»

¹⁵ Kɔ asɔdar ɲamban pɛsam kɔ ɲayɔ tɔkɔ analoku ɲa mɔ. Kɔ taruku pa yem papɔkɔ pɛsam aSuyif daco han mɔkɔ.

Yesu emɛntɔrɲɛ acɛpsɛ ɔn darɔɲ

Mark 16.14-18; Luk 24.36-49; Isan 20.19-23; Asom 1.6-8

¹⁶ Kɔ acɛpsɛ a Yesu darɔɲ aɲɛ wɛcɔ kɔ pin ɲanɲkɔ Kalile, nde tɔrɔ tɔkɔ Yesu ɛnabɔncɛr ɲa mɔ.

¹⁷ Ntɛ ɲanɔɲk Yesu mɔ, kɔ ɲantɔntɲɛnɛ kɔ, mba kɔ alɔma ɲa daco ɲanalip fɛ kɛlan tɛtɔn.

¹⁸ Kɔ Yesu ɔlɔtɔrɲɛ ɲa, k'oloku: «Kanɔ kɛsɔɲ im kɛtam fɛp kɛyɛfɛ dɔKɔm han dɛntɔf.

¹⁹ Nɛkɔ, nɛsɔɲɛ afum a tɔf ya doru fɛp kɛyɔnɛ acɛpsɛ em darɔɲ, nɛcgbɔt ɲa dɛromun tewɛ ta Kas, ta Wan kɔ t'Amera Nɛcɛmpi,

²⁰ nɛctɛksɛ ɲa kɛlɛlɛs mosom mɔkɔ isom nu mɔ fɛp. Awa kɔ ina iyi nu daco dɔsɔk o dɔsɔk han doru delip.»

Kitabu ka Kanu
Portions of the Holy Bible in the Baga Sitemu language
of Guinea
Des portions de la Sainte Bible dans la langue Baga
Sitemu de Guinée

copyright © 2015 Pioneer Bible Translators

Language: Baga Sitemu

Translation by: Traducteurs Pionniers de la Bible

Contributor: Pioneer Bible Translators

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-04-29

PDF generated using Haiola and XeLaTeX on 29 Apr 2025 from source files dated 29 Apr 2025

e5320012-5c6f-534d-9205-97d787f9a95c